

# गनती

## मूसा इस्त्राएल क मनइयन क गनत ह

**1** यहोवा मूसा क संग मिलापवाला तम्बू में बात किहस। इ बात सीनै रेगिस्तान में भइ। इस्त्राएल क मनइयन जब मिस्र तजि दिहन ओकरे पाछे इ बात दूसर बरिस क दूसर महीना क पहिले दिन क रही। यहोवा मूसा स कहेस, 2“इस्त्राएल क सब मनइयन क गना। हर मनई क सूची ओकर परिवार अउ ओकर परिवार-समूह क संग बनावे। 3तू अउ हारून इस्त्राएल क सबहिं मनइयन क गनब्या। ओन मनसेधुअन क गना जउन बीस बरिस या ओसे जिआदा उमर क अहई। इ सबइ उ पचे अहई जउन इस्त्राएल क फउज में सेवा करत हीं। एनकइ सूची एँके समूह प बनी तइयार करा। 4हर परिवार दल स एक मनई तोहार मदद करी। उ मनई आपन परिवार दल क अगुआ होइ। 5तोहरे साथे रहइ अउ तोहार मदद करइ वाला मनइयन क नाउँ इ अहई:

- रूबेन क परिवार समूह में स सदेऊर क पूत एलीसूर;
- 6सिमोन परिवार समूह स सूरीसद्दे क पूत सलूमिआल;
- 7यहूदा क परिवार समूह स अम्मिनादाब क पूत नहसोन;
- 8इस्साकार क समूह में स सूआर क पूत नतनेल;
- 9जबूलून क परिवार समूह स हेलोन क पूत एलीआब;
- 10यूसुफ क सन्तानन स, एप्रैम क परिवार समूह स अम्मीहूद क पूत एलीसामा अउ मनस्से क परिवार समूह स पदासूर क पूत गमलिले;
- 11बिन्यामीन क परिवार समूह स गिदोनी क पूत अबीदान;
- 12दान क समूह में स अम्मीसद्दे क पूत अहीएजेर;
- 13आसेर क परिवार समूह स आक्रोन क पूत पगीएल;
- 14गाद क परिवार समूह स दूएल क पूत एल्यासाप;
- 15नप्ताली क परिवार समूह स एनाम क पूत अहीरा दल क।”

16इ सब मनइयन आपन लोगन क जरिए आपन परिवार समूह क अगुआ चुना गएन। इ पचे आपन मनइयन क जरिए परिवार समूह क नेता चुना गएन। इ सबइ आपन परिवार समूह क नेता अहई। 17-18इसलिए मूसा अउ हारून उ मनइयन क लिहस जे नाउँ दुआरा चुना गएस अउ एह बरे दूसर महीना क पहिले दिन रहा। मूसा अउ हारून इ मनइयन अउ इस्त्राएल क लोगन क एक संग बोलाएस। तब मनइयन क सूची ओन कई परिवार अउ परिवार समूह क मुताबिक बनी। बीस बरिस या ओसे जिआदा उमर क सबहिं

मनइयन क सूची बनी। 19मूसा ठीक वइसा ही किहेस जइसा यहोवा क हुकुम रहा। मूसा मनइयन क तब गनेस जब उ पचे सीनै क रेगिस्तान में रहेन।

20रूबेन क परिवार समूह क गना गवा। रूबेन इस्त्राएल क पहिलौटी पूत रहा। ओन सबहिं मनइयन क जउन फउज में सेवा करइ क जोगग अहइ सूची बनी जेकर उमिर बीस बरिस या ओसे जिआदा रहेन। ओनकइ सूची ओनके परिवार अउ ओनकइ परिवार समूह क संग बनी। 21रूबेन क परिवार समूह स गना भए मनसेधुअन क गनती 46,500 रही।

22सिमोन क परिवार समूह क गना गवा। बीस बरिस या ओसे जिआदा उमर अउर फउज में सेवा करइ क जोगग सबहिं मनसेधुअन क सूची बनी। ओनकइ सूची ओनके परिवार अउ ओनकइ परिवार समूहन क संग बनी। 23सिमोन क परिवार समूह क गने प सारे मनसेधुअन क गनती 59,300 रही।

24उ पचे गाद क परिवार समूह क गनेन। बीस बरिस या ओसे जिआदा उमर क सबइ मनइयन जउन कि फउज में सेवा करइ जोगग सबहिं मनसेधुअन क नाउँ क सूची बनी। ओनकइ सूची ओनके परिवार समूहन क संग बनी। 25गाद क परिवार समूह क गने प मनसेधुअन क सब गिनती 45,650 रही।

26यहूदा क परिवार समूह क गना गवा। बीस बरिस या ओसे जिआदा उमर अउ फउज में सेवा करइ क जोगग मनसेधुअन क नाउँ क सूची बनी। ओनकइ सूची ओनकइ परिवार अउ ओनके परिवार समूहन क संग बनी। 27यहूदा क परिवार समूह क गने प सब क गनती 74,600 रही।

28इस्साकार क परिवार समूह क गना गवा। बीस बरिस या ओसे जिआदा उमर अउ फउज में सेवा करइ क जोगग सबहिं मनसेधुअन क नाउँ क सूची बनी। ओनकइ सूची ओनके परिवार अउ ओनकइ परिवार समूहन क संग बनी। 29इस्साकार क परिवार समूह क गने प मनसेधुअन क गनती 54,400 रही।

30जबूलून क परिवार समूह क गना गवा। बीस बरिस या ओसे जिआदा उमर अउ फउज में सेवा करइ जोगग सबहिं मनसेधुअन क नाउँ क सूची बनी। ओनकइ सूची ओनके परिवार अउ ओनके परिवार समूहन क संग बनी। 31जबूलून क परिवार समूह क गने प मनसेधुअन क सब गनती 57,400 रही।

32यूसुफ क पूतन स एप्रैम क परिवार समूह क गना गवा। बीस बरिस या ओसे जिआदा उमर अउ फउज में सेवा करइ जोगग सबहिं मनसेधुअन क नाउँ क सूची बनी।

ओनकइ सूची ओनके परिवार अउर परिवार समूहन क संग बनी। 33एप्रैम क परिवार समूह क गने प सब गन्ती 40,500 रही।

34मनस्से क परिवार समूह क गना गवा। बीस बरिस या ओसे जिआदा उमर अउ फउज में सेवा करइ जोगग सबहिं मनसेधुअन क नाउँ क सूची बनी। ओनकइ सूची ओनके परिवार समूहन क संग बनी। 35मनस्से क परिवार समूह क गने प मनसेधुअन क सब गन्ती 32,200 रही।

36बिन्यामीन क परिवार समूह क गना गवा। बीस बरिस या ओसे जिआदा उमर अउ फउज में सेवा करइ जोगग सबहिं मनसेधुअन क नाउँ क सूची बनी। ओनकी सूची ओनके परिवार अउ ओनके परिवार समूहन क संग बनी। 37बिन्यामीन क परिवार समूह क गने प मनसेधुअन क सब गन्ती 35,400 रही।

38दान क परिवार समूह क गना गवा। बीस बरिस या ओसे जिआदा उमर अउ फउज में सेवा करइ जोगग सबहिं मनसेधुअन क नाउँ क सूची बनी। ओनकी सूची ओनके परिवार अउ परिवार समूहन क संग बनी। 39दान क परिवार अउ ओनका परिवार समूहन क गने प सब गन्ती 62,700 रही।

40आसेर क परिवार समूह क गना गवा। बीस बरिस या ओसे जिआदा उमर अउ फउज में सेवा करइ जोगग सबहिं मनसेधुअन क नाउँ क सूची बनी। ओनकी सूची ओनके परिवार अउ परिवार समूहन क संग बनी। 41आसेर क परिवार समूह क गने प मनसेधुअन क सब गन्ती 41,500 रही। 42नप्ताली क परिवार समूह क गना गवा। बीस बरिस या ओसे जिआदा उमर अउ फउज में सेवा करइ जोगग सबहिं मनसेधुअन क नाउँ क सूची बनी। ओनकी सूची ओनके परिवार अउ ओनके परिवार समूहन क संग बनी। 43नप्ताली क परिवार समूह क गने प मनसेधुअन क सब गन्ती 53,400 रही।

44मूसा, हारून अउ इस्राएल क बारह नेता लोग इ सब मनसेधुअन क गनेन। हर परिवार समूह स एक तु नेता रहा। 45इस्राएल क हर एक मनसेधू जउन बीस बरिस या ओसे जिआदा उमर अउ फउज में सेवा करइ जोगग रहा, गना गवा। इ मनसेधुअन क सूची ओनके परिवार क संग बनी। 46मनसेधुअन क सब गन्ती 6,03,550 रही।

47लेवी क परिवार समूह स परिवारे क सूची इस्राएल क दूसर मनसेधुअन क संग नहीं बनी। 48यहोवा मूसा स कहे रहा: 49“लेवी क परिवार समूह क मनइयन क जिन गना। उ क गन्ती इस्राएल क बचा भवा लोगन क संग जिन करा। 50लेवी क मनइयन स कहा कि उ पचे करार क पवितर तम्बू क जिम्मेदार अहई। उ पचे ओकर अउर ओहमाँ स जउन चीजन अहई, ओनका देखा-भाला। उ पचे पवितर तम्बू में अउ ओकर सबहिं चीजन लइके चलिहीं। उ पचे आपन सिबिर ओकरे चारिहुँ कइँती डइहीं अउ ओकर देख भाल करिहीं। 51जब कबहुँ भी पवितर तम्बू क जात्रा पइ लइ जावइ जाइ तउ लेवी क मनइयन क ही तम्बू क निचे उतारइ चाही। जब कबहुँ पवितर तम्बू कउनो ठउरे प लगाइ जाइ तउ लेवी क मनसेधुअन क ही तम्बू क लगाइ चाही।

उ पचे अइसा ही लोगन अहई जउन पवितर तम्बू क देख-रेख करत हीं। जदि कउनो अइसा दूसर मनई जउन कि लेवी नहीं अहइ, पवितर तम्बू क निअरे ओका देख-रेख करइ बरे आवत ह तउ उ मारि डवा जाइ चाही। 52इस्राएल क मनइयन आपन तम्बू आपन समूहन क अनुसार लगइहीं। हर एक मनई क अनुसार आपन सिबिर आपन परिवार समूह क झण्डा क लगे लगावइ चाही। 53मुला लेवी क मनइयन क आपन सिबिर पवितर तम्बू क चारिहुँ कइँती डवइ चाही। लेवी क मनई करार क पवितर तम्बू क रच्छा करिहीं। उ पचे पवितर तम्बू क रच्छा करिहीं उ पचे पवितर तम्बू क रच्छा करिहीं जैसे इस्राएल क मनइयन क कछू बुरा न होइ।”

54एह बरे इस्राएल क मनइयन ओन सबहिं बातन क किहेन जेकर हुकुम यहोवा मूसा क दिहन।

### सिबिर क संजाम

2 यहोवा मूसा अउ हारून स कहेस, 2“इस्राएल क मनइयन क मिलापवाला तम्बू क चारिहुँ कइँती आपन तम्बू लगावइ चाही। हरेक दल क आपन झण्डा होइ अउ हरेक मनई क आपन समूह क झण्डा क लगे आपन तम्बू लगावइ चाही।

3“यहूदा क सिबिर झण्डा क पूरब में होइ जेहर सूरज निकरत ह। यहूदा क मनई हुवँइ सिबिर लगइहीं। यहूदा क मनइयन क अगुआ अम्मीनादाब क पूत नहसोन अहइ। 4इ दल में 74,600 मनसेधू रहेन।

5“इस्साकार क परिवार समूह यहूदा क मनइयन क ठीक पाछे होइ। इस्साकार क मनइयन क नेता सूआर क पूत नतनेल अहइ। 6इ दल में 54,400 मनसेधू रहेन।

7“जबूलून क परिवार समूह भी यहूदा क परिवार समूह स ठीक आगे आपन सिबिर लगाइ। जबूलून क मनइयन क नेता हेलोन क पूत एलीआब अहइ। 8इ दल में 57,400 मनसेधू रहेन।

9“यहूदा क सिबिर में 1,86,400 मनसेधू रहेन। इ सबइ आपन अलग-अलग परिवार समूहन में बैटा भवा रहेन। यहूदा पहिला समूह होइ जउन उ टेमें अगवा चली। जब लोग एक ठउर स दूसर ठउर क जात्रा करिहीं।

10“रूबेन क झण्डा पवितर तम्बू क दक्खिन में होइ। हरेके समूह आपन झण्डा क लगे आपन सिबिर लगाइ। रूबेन क लोगन क प्रधान संदेऊर क पूत एलीसूर बाटइ। 11इ दले में 46,500 मनसेधू रहेन।

12“सिमोन क परिवार समूह क रूबेन क परिवार समूह क ठीक पाछे आपन सिबिर लगाइ। साइमन क मनइयन क अगुआ सूरीसद्दल क पूत सल्लमीएल अहइ। 13इ दले में 59,300 मनसेधू रहेन।

14“गद क परिवार समूह भी रूबेन क मनइयन क ठीक पाछे आपन सिबिर लगाइ। गद क लोगन क प्रधान रूपल क पूत एल्यासाप अहइ। 15इ दले में 45,650 लोगन रहेन।

16“रूबेन क सिबिर में सब दलन क 1,51,450 मनसेधू रहेन। रूबेन क सिबिर दूसर समूह होइ जउन उ समइ चली। जब मनई एक ठउर स दूसर ठउर क जात्रा करिहीं।

17“जब मनई जात्रा करिहीं तउ लेवी क सिबिर ठीक ओकरे, पाछे चली। मिलापवाला तम्बू दूसर सिबिरन क बीचउ बीच ओनके संग रही। मनइयन आपन सिबिर उहइ सिलसिला में लगइहीं जउने क्रम में उ पचे चलिहीं। हरेक मनई आपन परिवार क झण्डा क संग रही।

18“एप्रैम क झण्डा पच्छिम कइँती रही। एप्रैम क परिवार-दलन हुवँइ सिबिर लगइहीं। एप्रैम क लोगन क प्रधान अम्मीहूद क पूत एलीसामा अहइ। 19इ दल में 40,500 लोगन रहेन।

20“मनस्से क परिवार समूह एप्रैम क परिवार क ठीक पाछे आपन सिबिर लगाइ। मनस्से क मनइयन क नेता पदासूर क पूत गम्लीएल अहइ। 21इ दल में 32,200 मनसेधू रहेन।

22“बिन्यामीन क परिवार समूह भी एप्रैम क परिवार क ठीक आगे आपन सिबिर लगाइ। बिन्यामीन क लोगन क नेता गिदोनी क पूत अबीदान अहइ। 23इ दले में 35,400 मनसेधू रहेन।

24“एप्रैम क सिबिर में 1,08,100 मनसेधू रहेन। इ तीसर परिवार होइ जउन तब चली जब मनई एक ठउर स दूसर ठउर क जात्रा करिहीं।

25“दान क सिबिर क निसान उत्तर कइँती होइ। दान क परिवार दलन हुवँइ सिबिर जमाई। दान क मनइयन क प्रधान अम्मीसद्दै क पूत अहीएजेर अहइ। 26इ दले में 62,700 मनसेधू रहेन।

27“आसेर क परिवार समूह दान क परिवार समूह क ठीक पाछे आपन सिबिर डाइ। आसेर क मनइयन क नेता ओक्रान क पूत पगीएल बाटइ। 28इ दले में 41,500 मनसेधू रहेन।

29“नप्ताली क परिवार समूह दान क परिवार समूह क ठीक पाछे आपन सिबिर लगाइ। नप्ताली क मनइयन क प्रधान एनान क पूत अहीरा अहइ। 30इ दले में 53,400 मनसेधू रहेन।

31“दान क सिबिर में 1,57,600 मनसेधू रहेन। जब मनइयन एक ठउर स दूसर ठउर क जात्रा करिहीं तउ इ काफिला आखिरी परिवार समूह होइ। हर एक मनई आपन झण्डा क अनुसार आपन परिवार क संग होइ।”

32सबहिं डेरन में अलग अलग दलन क सब परिवारन क मनसेधुअन क समूचइ गिनती रही 6,03,550 । 33मूसा इस्त्राएल क दूसर मनइयन में लेवी क मनइयन क नहीं गनेस। इ यहोवा क हुकुम रहा। 34यहोवा मूसा क जउन कछू करइ क कहेस उ सब क इस्त्राएलियन मान लिहेन। इस्सर क कहेइ क मुताबिक इस्त्राएल क मनइयन आपन झण्डा तरे आपन सिबिर लगाएन। यहोवा क कहे क मुताबिक इस्त्राएल क मनइयन जात्रा किहन। हरेक मनई आपन परिवार अउ आपन परिवार समूह क संग रहा।

### हारून क याजकन परिवार

3 जउन समइ यहोवा सीनै पहाड़े प मूसा स बात किहस उहइ समइ क हारून अउ मूसा क परिवार क इतिहास इहइ अहइ।

2हारून क चार पूत रहेन। नादाब पहिलौटा पूत रहा। ओकरे पाछे अबिहू, एलीआज़ार अउ ईतामार रहेन। 3इ सबइ अभिसेक करा भवा याजकन रहेन।

एनका याजकन क रूप में यहोवा क सेवा क खास काम सउँपा गवा रहा। 4मुला नादाब अउ अबीहू यहोवा क सेवा करत टेमें प पाप करइ क कारण मर गएन। उ पचे यहोवा क भेंट चढ़ाएन, मुला उ पचे उ आगी क बइपरेन जेकरे बरे यहोवा हुकुम नहीं दिहे रहेन। इ सीनै क रेगिस्तान में भवा। इ तरह नादाब अउ अबिहू हुवाँ मरि गएन। ओनके पूत नहीं रहेन। एह बरे एलीआज़ार अउ ईतामार याजक बनेन अउर यहोवा क सेवा करइ लागेन। उ पचे उ टेमें करत रहेन जब ओनकइ बाप जिअत रहा।

### लेवी बंस क याजकन क सहायक

5यहोवा मूसा स कहेस, 6“लेवी क परिवार समूह क सबहिं मनइयन क याजक हारून क अगवा लिआवा। उ पचे ओनका सेवा करइ हीं। 7लेवी बंस क हारून क उ समइ मदद करिहीं जब उ मिलापवाला तम्बू में सेवा करी अउर लेवी बंसे क इस्त्राएल क सब मनइयन क उ टेमें मदद करिहीं जउने टेमें उ पचे पवितर तम्बू में आराधना करइ अइहीं। 8इस्त्राएल क मनइयन मिलापवाला पवितर तम्बू क हर एक चीज क रच्छा करिहीं, इ ओनकइ कर्तव्य अहइ। मुला इ चीजन क देख-भाल कइके ही लेवी बंस क लोग इस्त्राएल क मनइयन क सेवा करिहीं। पवितर तम्बू में आराधना करइ क ओनका इहइ तरीका होइ।

9“इस्त्राएल क सब मनइयन में स लेवी बंसे क मनई चुना गएन। इ पचे लेवी बंस क हारून अउ ओकरे पूतन क मदद बरे चुना ग रहेन।

10“तू हारून अउ ओकरे पूतन क याजकन तइनात करब्या। उ पचे आपन फरज पूरा करिहीं अउ याजकन क रूप में सेवा करिहीं। कउनो दूसर मनई जउन निअरे आवइ क कोसिस करत ह मारि दीन्ह जाइ चाही।\*”

11यहोवा मूसा स इहइ कहेस, 12“मई तोसे कहेउँ कि इस्त्राएल क हरेक परिवार आपन पहिलौटी क जन्मा पूत मोका देइ-मुला अब मई लेवी बंस क आपन सेवा बरे चुनत हउँ। उ पचे मोर होइहीं। एह बरे इस्त्राएल क सब मनइयन क दूसर सबहिं लोगन क आपन पहिलौटी क पूत मोका नहीं देइ क होइ।

13“जब तू मिस्त्र में रहया, मई मिस्त्र क पहिलौटी क पइदा भवा लरिकन क मार डाए रहा। उ समइ मई इस्त्राएल क सबहिं पहिलौटी क गदेलन क अपने बरे लीन्ह। सबहिं पहिलौटी क पइदा भवा गदेलन अउ सबहिं पहिलौटी क जन्मा गोरु मोर अहइ। मुला अब मई तोहरे पहिलौटी क जन्मा गदेलन क तोहका वापस करत अहउँ अउर लेवी बंसे क आपन बनावत हउँ। मई यहोवा अहउँ।”

14यहोवा फुन सीनै क रेगिस्तान में मूसा स बात किहस। यहोवा कहेस, 15“लेवी बंस क सबहिं परिवार समूहन अउ परिवार समूह क गना। हरेक मनसेधू या गदेलन जउन एक महीना या ओसे जिआद क होई ओनका गना।”

कउनो ... चाही याजक क रूप में सेवा करइ चाहत ह।

16एह बरे मूसा यहोवा क आग्या मानसे। उ ओन सबहि क गनेस।

17लेवी क तीन पूत रहेन। ओनकइ नाउँ रहेन: गोर्सीन, कहात अउ मरारी। 18हरेक पूत परिवार समूहन क प्रधान रहा।

गोर्सीन क परिवार समूहन रहेन लिब्नी अउ सिमी।

19कहात क परिवार समूहन रहेन: अम्राम, यिसहार, हेब्रोन, उज्जीएल।

20मरारी क परिवार समूहन रहेन: महली अउ मूसी।

उ सबइ उ कुल परिवार रहेन जउन लेवी क परिवार समूहन स जुड़ा रहेन।

21लिब्नी अउ सिमियन क परिवार गोर्सीन क परिवार स जुड़ा रहेन। उ सबइ गोर्सीन बंस क परिवार समूहन क रहेन। 22इ दुइनउँ परिवार समूहन में स एक महीना स जिआदा उमर क लरिकन या मनसेधू 7,500 रहेन। 23गोर्सीन बंस क परिवार समूहन क पच्छिउँ में सिबिर डवइ क कहा गवा। उ पचे पवितर तम्बू\* क पाछे आपन सिबिर लगाएन। 24गोर्सीन बंस क परिवार समूहन क प्रधान लाएल क पूत एल्यासाप रहा। 25मिलापवाला तम्बू में गोर्सीन बंस क लोग पवितर तम्बू, बाहरी तम्बू अउ पर्दन क देख-रेख क जिम्मेदार रहेन। उ पचे मिलापवाला तम्बू क प्रवेश दुआर क पर्दा क देख-भाल करत रहेन। 26उ पचे आँगन क पर्दा क देख-रेख करत रहेन। इ पर्दा जउन पवितर तम्बू अउ वेदी क चारिहूँ कइँती फइला रहा। उ पचे रस्सी अउ पर्दा बरे काम में बइपरइ वाली हर एक चिजियन क देख-रेख करत रहेन।

27अग्रामियन, यिसहारियन, हेब्रोनियन अउ उज्जीएल क परिवार कोहात क परिवार स जुड़ा रहेन। उ पचे कोहात बंसी परिवार समूहन क रहेन। 28इ परिवार समूह में एक महीना या ओसे जिआदा उमर क गदेलन अउ मनसेधू 8,600 रहेन। कोहात बंस क मनइयन क पवितर ठउर क देख-रेख क काम सउँपा गवा। 29कोहात बंस क परिवार समूहन क “पवितर तम्बू” क दक्खिन पहँटा दीन्ह गवा। इ उ पहँटा रहा जहाँ उ पचे सिबिर लगाएन। 30कोहात बंस क परिवार समूहन क प्रधान उज्जीएल क पूत एलीसापान रहा। 31ओनकइ काम पवितर सन्दूख, मेज, डीबट, वेदी अउ पवितर ठउर क कामे में आवइवाला सामान क देख-रेख करब रहा। उ पचे पर्दा अउ ओनके संग प्रयोग में आवइवाली सबहि चीजन क देख-रेख करत रहेन।

32लेवी बंस क नेता लोगन क मुखिया एलीआज़ार रहा। उ याजक हारून क पूत रहा। एलीआज़ार पवितर चीजन क देख-रेख करइवालन सबहि मनइयन क कोतवाल रहा।

33-34महली अउ मुसी परिवार समूहन मरारी परिवारे स जुड़ा रहा। एक महीना या ओसे जिआदा उमर क लरिकन अउ मनसेधू परिवार समूह में 6,200 रहेन। 35मरारी समूह क नेता अबीहैल क पूत सूरीएल रहा। इ परिवार समूह क पवितर तम्बू क उत्तर क पहँटा दीन्ह ग रहा। इ उहइ पहँटा अहइ जहाँ उ पचे सिबिर लगाए रहेन। 36मरारी लोगन क पवितर तम्बू क ढाँचा क देखभाल क काम सौंप दीन्ह गवा।

**पवितर तम्बू** या “टाबरनाकेल” तम्बू परमेस्सर आपन मनइयन क बीच रहइ आवा रहा।

उ पचे सबहि छड़न, खंभन अउ आधार अउ पवितर तम्बू क ढाँचा में जउन कछू लगा रहा उ सब कछू क देख-भाल करत रहेन। 37पवितर तम्बू क चारिहूँ कइँती आंगन क सबहि खंभन क देखरेख करत रहेन। एहमें सबइ आधार, तम्बू क खँटी अउ रस्सियन जुड़ी रहिन।

38मूसा, हारून अउ ओकर लरिकन मिलापवाला तम्बू क समन्वा पवितर तम्बू क पूरब कइँती सिबिर लगाएन। उ पचन क पवितर ठउर क देख-भाल क काम दीन्ह गवा। उ पचे इस्राएल क सबहि मनइयन बरे इ किहन। कउनो दूसर मनई जउन पवितर ठउर क निचके आवत, मार दीन्ह जाइ क रहा। 39यहोवा लेवी परिवार समूह क एक महीना या ओसे जिआदा उमर क गदेलन अउ मनसेधुअन क गनइ क हुकुम दिहस। सब गिनती 22,000 रही।

### लेवी बंसी पहिलौटी क लरिकन

#### क जगह लेत हीं

40यहोवा मूसा स कहेस, “इस्राएल में सब एक महीना या ओसे जिआदा उमर क पहिला पइदा भवा लरिकन अउ मनसेधुअन क गना। ओनके नाउँ क एक अनुसार सूची बनावा। 41अब मई इस्राएल क सबहि पहिलौटी क पइदा भवा लरिकन अउ मनसेधुअन क नाहीं लेबा अब मई यानी यहोवा लेवी बंसियन क ही लेब। इस्राएल क दूसर सबहि मनइयन क पहिलौटी क पइदा भवा जनावरन क लेइ क ठउर प अब मई लेवी बंस क मनइयन क पहिलौटी क जनावरन क ही लेब।”

42इ तरह मूसा उ किहस जउन यहोवा हुकुम दिहस। मूसा इस्राएल क पहिलौटी क सतान क गनेस। 43मूसा सबहि पहिलौटी क पइदा भवा एक महीना या ओसे जिआदा उमर क लरिकन अउ मनसेधुअन क सूची बनाएस। उ सूची में 22,273 नाउँ रहेन।

44यहोवा मूसा स इ भी कहेस, 45“मई यानी यहोवा इ हुकुम देत हउँ: ‘इस्राएल क दूसर परिवारन क पहिलौटी क पइदा भवा मनसेधुअन क जगह प लेवी बंस क मनइयन क ल्या। अउर मई दूसर मनइयन क जनावरन क ठउर प लेवी-बंस क जनावरन क लेब। लेवी बंसी मोरउ अहइ। 46लेवी-बंस क मनई 22,000 अहइ अउर दूसर परिवारन क 22,273 पहिलौटी क पइदा भवा पूत अहइ। इ तरह सिरिफ 273 पहिलौटी क पइदा पूत लेवी बंस क मनइयन स जिआदा बाटेन। 47दूइ सौ तेहतर पहिलौटी मनइयन में स हर एक बरे पाँच सेकेल चाँदी जमा करा। (पवितर स्थान क सेकेल क अनुसार एक सेकेल बीस गोरा होत ह) 48उ चाँदी हारून अउ ओकरे पूतन क द्या। इ इस्राएल क 273 मनइयन बरे भुगतान अहइ।”

49मूसा 273 जिआदा मनइयन बरे रूपिया बटोरेस। इ सबइ उ पचे 273 मनई अहइ जेनकइ जगह लेवी बंस परिवार समूह नाहीं लइ सका। 50मूसा इस्राएल क पहिलौटी क पइदा भवा मनइयन स चाँदी बटोरेस। उ 1,365 सेकेल चाँदी पवितर स्थान क सेकेल क अनुसार बटोरेस। 51मूसा यहोवा क आग्या मानेस। मूसा यहोवा क आग्या क मुताबिक उ चाँदी हारून अउ ओकरे पूतन क दिहस।

### कोहात परिवार क सेवा करब

4 यहोवा मूसा अउ हारून स कहेस: 2“कोहात परिवार समूह क मनसेधुअन क गना। (कोहात परिवार समूह लेवी परिवार समूह क एक हींसा अहइ।) 3तीस स पचास बरिस क उमर वाले मनइयन क गना जउन फउज मँ सेवा करइ सकत ह। इ मनइयन मिलापवाला तम्बू मँ कामकाज करिहीं।

4“ओनकइ कामकाज सबन त जियादा पवितर ठउर क देखभाल करब अहइ।

5“जब सिबिर नवा ठउर क जात्रा करई। हारून अउ ओनके पूतन क चाही कि उ पचे मिलापवाला तम्बू मँ जरूर जाई अउ पर्दा उतारई अउ करार क पवितर सन्दूखे क ढौपई। 6तब उ पचे इ सबन्क बढ़िया चाम स बना भवा ढकना स ढौपि देई। तब उ पचे पवितर सन्दूखे प बिछा भवा खाल प एक ठु नीला ओढ़ना फइलइहीं अउ पवितर सन्दूखे प लगा भवा कइ मँ डंडा डइहीं।

7“तब उ पचे एक ठु नीला ओढ़ना पवितर मेजी प फइलइहीं। तब उ सबइ ओह पइ थाली, चम्मच, खोरा अउ पयेबलि बरे गगरी धरिहीं। उ पचे खास रोटी ओकर ऊपर धरइ सकत ह। 8तब तू पचे इ सबहिं चीजन प एक ठु लाल ओढ़ना डउब्या। तब हर एक चीज क बढ़िया चाम स ढौपि द्या। तब मेज क छल्ला मँ डंडा डवा।

9“तब डीबट अउ दिया क नीला ओढ़ना स ढकि द्या अउ साथ ही साथ दिया क गुल काटइवाला कैची, गुल रखइवाला थाली अउर दिया बरे प्रयोग मँ आवइवाला तेल क मेटिया क ढकि द्या। 10तब सबहिं चीजन क नीक चाम मँ लपटावा अउ ँनका ढोवइ बरे प्रयोग मँ आवइवाला डंडन प ँनका धरा।

11“सुनहरी वेदी प एक नीला कपड़ा फइलावा। ओका नीक चाम स ढका। तब वेदी क ढोवइ बरे ओहमँ लगा भवा छल्लन मँ डंडा डवा।

12“पवितर ठउर मँ आराधना क प्रयोग मँ आवइवाली खास चीजन क एक साथे बटोरा। ँनका एक संग बटोस अउ ँनका नीला ओढ़ना मँ बटोरा। तब ँका बढ़िया चाम स ढका। इ चीजन क लइ जाइ बरे ँनका एक ढौचा प धरा जिस प इ लइ जाइ।

13“काँसावाली वेदी स राख क झार द्या अउ ँकरे ऊपर एक बैगनी रंग क ओढ़ना फइलावा। 14तब वेदी प आराधना बरे प्रयोग मँ आवइवाली आगी क गोस्सी, काँटा, बेल्ला अउ खोरा आदी सब चीजन क बटोरा। इ चीजनक काँसा क वेदी प धरा। तब वेदी क ऊपर नीक चाम क ओढ़ना फइलावा। वेदी मँ लगा कइन मँ ँका लइ जाइवाला डंडा डवा।

15“जब हारून अउ ओकर पूत पवितर ठउर क सबहिं पवितर चीजनक ढकना पूरा करि लेई तब कोहात परिवार क मनई अन्दर आइ सकत हीं अउर उ चीजनक लइ जाब सुरु कइ सकत हीं। इ तरह उ पचे पवितर चीजनक छुइहीं नाहीं। तउ उ पचे मरिहीं नाहीं।

16“याजक हारून क पूत एलीआज़ार पवितर तम्बू बरे जिम्मेदार होइ। उ पवितर ठउर अउ ँकर हर चीज बरे

जिम्मेदार होइ। उ डीबट क तेल, महकउआ सुगन्धिवाली\* अगारबत्ती अउ हमेसा दीन्ह जाइवाली भेंट।\*”

17यहोवा मूसा अउ हारून स कहेस, 18“होसियार रहा, इ कोहात बंसी मनइयन क लेवी मनसेधुअन क बीच स बरबाद जिन होइ द्या। 19तोहका इ एह बरे करइ चाही कि कोहात बंसी महा पवितर ठउर ताई जाई अउ मरई नाहीं। हारून अउ ओकरे पूतन क अन्दर जाइ चाही अउ हरेक कोहात बंसी क बतावइ चाही कि उ का करइ। ओन पचन क हर एक मनई क चीज देइ चाही जउन ओका लइ जाइ क अहइ। 20जदि तू अइसा नाहीं करत्या तउ कोहात बंसी अन्दर जाइ सकत हीं अउ पवितर चीजन क लखि सकत हीं। जदि उ पचे एक छिन बरे भी ओन पवितर चीजन कइती निहारत हीं तउ ओनका मरइ क होइ।”

### गोर्सोनी परिवार क सेवा

21यहोवा मूसा स कहेस, 22“गोर्सोनी परिवार क सबहिं मनइयन क गना। ओनकइ सूची परिवार अउ परिवार समूह क मुताबिक बनावा। 23आपन सेवा क कर्तव्य कइ चुकइवालन तीस बरिस स पचास बरिस तक क मनसेधुअन जउन सबइ सेवा करइ बरे जाइ सकत ह क गना। इ सबइ लोग मिलापवाला तम्बू क देख-भाल करिहीं।

24“गोर्सोनी परिवार क इहइ करइ चाही अउ इ चीजन क लइ चलइ चाही। 25ँनका पवितर तम्बू क पर्दा, मिलापवाला तम्बू, एकर ओढ़ावन अउ नीक चाम स बना ओढ़ावन लइ चलइ चाही। ओनका मिलापवाला तम्बू क दुआर क पर्दा भी लइ चलइ चाही। 26ओनका अंगने क ओन पर्दन क भी जउन पवितर तम्बू अउ वेदी क चारिहुँ ओर लगा बाटेन, लइ चलइ चाही। ओनका आंगन क प्रवेश दुआर क पर्दा भी लइ चलइ चाही। ओनका सब लसुरी अउ पर्दा क संग प्रयोग मँ आवइवाली सबहिं चीजन क लइ चलइ चाही। गरसान बंस क मनई उ कउनो भी चीज बरे जिम्मेदार होइहीं जउन इ चीजन स कीन्ह जात हीं। 27हारून अउ ओकर पूत इ सबहिं कामन क निगरानी करिहीं। गोर्सोनी बंस क मनई जउन कछू लइ जइहीं अउ जउन दूसर काम करिहीं ओकर पइ हारून अउ ओकर पूत नज़र राखिहीं। तोहका ओन लोगन क उ सबइ चीज सौंप देइ चाही जेनका ढोवइ बरे उ पचे जिम्मेदार होइहीं। 28इहइ काम अहइ जेका गोर्सोनी बंस क परिवार समूह क लोगन क मिलापवाला तम्बू बरे करइ क अहइ। हारून क पूत ईतामार याजक ओनके काम बरे जिम्मेदार होइ।”

### मरारी परिवार क सेवा

29“मरारी परिवार समूह क परिवार अउ परिवार समूहन क मनसेधुअन क गना। 30तीस स पचास बरिस क सबहिं

**महकउआ सुगन्धिवाली** यहोवा क भेंट क रूप मँ पवितर ठउर मँ हर दिन दीन्ह जाइवाली भेंट अउ अभिसेक बरे तेल क जिम्मेदार होई।

**हमेसा दीन्ह जाइवाली भेंट** जइतून क तेल जउन याजक, देवपुरूस या राजा क मूँडे प डवा जात रहा। इ बतावत रहा कि यहोवा क जरिये आपन खास काम बरे चुना ग रहेन।

मनसेधुअन क जउन सेवा करइ बरे जाइ सकत ह क गना। उ पचे मनइयन मिलापवाला तम्बू बरे खास काम करिहीं। 31जब तू जात्रा करब्या तब ओनकइ इ काम अहइ कि मिलापवाला तम्बू क फरेम (ढाँचा) लइ चला। ओनका पट्टी, खम्भा अउ आधार क लइ चलइ चाही। ओनका ओन तम्बू क खुँटियन क लइ चाही 32अउर ओका आँगन क चारिहुँ कइँती क खम्भा, ओका खुँटियन क साथ, आधार अउ रस्सी क लइ चाही। सब नाउँ क सूची बनावा अउ हरेक मनई क बतावा कि ओका का का चीज लइ जाइ क अहइ। 33इहइ बात अहइँ जेका मरारी बंस क लोग मिलापवाला तम्बू क कामे मँ सेवा बरे करिहीं। हारून क पूत ईतामार याजक ऐंके बरे जिम्मेदार होइ।”

### लेवी बंस परिवार

34मूसा, हारून अउ इस्त्राएल क मनइयन क अगुआ लोग कोहती-बंस क मनइयन क गनेन। उ पचे ऐंनका परिवार अउ परिवार समूहन क मुताबिक गनेन। 35उ पचे तीस स पचास बरिस क उमर क मनइयन क जउन सेवा करइ बरे जाइ सकत ह गनेन। इ पचन क मिलापवाला तम्बू बरे खास काम करइ बरे दीन्ह गएन।

36कहात परिवार समूह मँ जउन इ काम करइ क जोगगता रखत रहेन, 2,750 मनसेधू रहेन। 37इ तरह कोहात परिवार क इ मनइयन क मिलापवाला तम्बू क खास काम करइ बरे जिम्मेदारी दीन्ह गएन। मूसा अउ हारून ऐंका वइसा ही किहेन जइसा यहोवा मूसा स करइ क कहे रहा।

38गेर्सोनी परिवार समूह क भी ओकर परिवारन अउ ओकर परिवार समूहन क अनुसार गना गवा। 39तीस स पचास बरिस क उमर क सबहिं मनइयन क जउन सेवा करइ बरे जाइ सकतेन क गना गएन। इ मनइयन क मिलापवाला तम्बू मँ खास काम करइ क सेवा-काम दीन्ह गवा। 40गेर्सोनी परिवार समूह क परिवारन मँ जउन जोगग रहेन उ पचे 2,630 मनसेधू रहेन। 41इ तरह इ मनसेधुअन क जउन गेर्सोनी परिवार समूह क रहेन, मिलापवाला तम्बू मँ खास काम करइ क सेवा-काम सौंपा गवा। मूसा अउ हारून ऐंका वइसा ही किहेन जइसा यहोवा मूसा क करइ क कहे रहा।

42मरारी परिवार क परिवार अउ परिवार समूहन क भी गना गवा। 43तीस स पचास बरिस क उमर क सबहिं मनसेधू जउन सेवा करइ बरे जाइ सकतेन क गना गएन। इ मनइयन क मिलापवाला तम्बू बरे खास काम करइ क सेवा-काम दीन्ह गवा। 44मरारी परिवार समूह क परिवारन मँ जउन लोग जोगग रहेन, उ पचे 3,200 मनई रहेन। 45इ तरह मरारी परिवार समूह क इ मनइयन क खास काम दीन्ह गवा। मूसा अउ हारून ऐंका वइसा ही किहेन जइसा यहोवा मूसा स करइ क कहे रहा।

46मूसा, हारून अउ इस्त्राएल क मनइयन क नेता लोग लेवी-बंस क सबहिं निअम्बर क गनेन। उ पचे हर एक परिवार अउ हर एक परिवार समूह क गनेन। 47सब मनइयन जउन आपन सेवा कर्तव्य क निभाइ चुका रहेन अउर जउन तीस बरिस स पचास बरिस उमर क रहेन, गना गएन। इ

मनइयन क मिलापवाला तम्बू बरे खास काम करइ क सेवा-काम दीन्ह गवा। उ पचे मिलापवाला तम्बू क चलइ क काम तब किहेन जब उ पचे जात्रा किहेन। 48मनसेधुअन क सारी संख्या 8,580 रही।

49यहोवा इ आदेस मूसा क दिहेन। हर एक मनई क आपन काम दीन्ह ग रहा। अउ हरेक मनसेधू स कहा गवा रहा कि ओका का का लइ चलइ चाही। एह बरे यहोवा जउन हुकुम दिहे रहा उ चीजन क पूरा कीन्ह गवा। सबहिं मनइयन क गना गवा।

### सफाई क बारे मँ नेम

5 यहोवा मूसा स कहेस, 2“इस्त्राएल क मनइयन क हुकुम द्या कि उ हर एक व्यक्ति क चाहे उ मनसेधु या मेहरारू जउन चाम रोग स पीड़ित ह या जेकर सरीर स पीप बहत ह या जउन कि कउनो लहासे क छुअइ क करण असुद्ध होइ गवा अहइ छाउनी स दूर भेज द्या। 3उ पचन्क छाउनी स बाहेर भेज दीन्ह जाइ चाही ताकि उ छाउनी क जउन कि मोरे निवास अहइ क उ पचन्क असुद्ध नाहीं कइ देईं। मई तोहरे छाउनी मँ तू लोगन क बीच रहत हउँ।”

4एह बरे इस्त्राएल क मनइयन परमेस्सर क हुकुम मानेन। उ पचे ओन मनइयन क सिबिर क बाहेर पठइ दिहेन। उ पचे अइसा एह बरे किहेन काहे की यहोवा मूसा क हुकुम दिहस।

### अपराध बरे जुर्माना

5यहोवा मूसा स कहेस, 6“इस्त्राएल क लोगन क इ बतावा, अगर कउनो मनई अउ मेहरारू कउनो अइसा पाप करत ह जेका लोग करत, (कउनो पाप जेका दूसर क खिलाफ कीन्ह गवा ह तउ उ असल मँ परमेस्सर क खिलाफ पाप अहइ) तउ उ तरह क मनसेधू या मेहरारू अपराधी अहइ। 7एह बरे उ मनई लोगन क खिलाफ आपन कीन्ह पाप क कबूलइ। तब उ मनई ओका जरूर सुधार करइ चाही जेका उ किहस ह उ भुगतान मँ पाँचवाँ हींसा जोरइ अउ ओकर भुगतान ओका करइ जेकर बुरा उ किहस ह। 8मुला जउन मनई क उ बुरा किहा ह जदि उ मनई मरि जात ह अउर ओकर कउनो निचके क नातेदार भुगतान लेइ बरे न होइ तउ इ हाल मँ, बुरा करइ वाला मनई यहोवा क भुगतान करी। उ मनई पूरा भुगतान याजक क करी। भुगतान क बरे ओका एक ठू भेंड़ा क बलि अभिसेक क रूप मँ जरूर देइ चाही। याजक ओका बलि ओका अभिसेक करइ बरे देब्या। मुला याजक बचा भुगतान क आपन लगे रख सकत ह।

9“जदि इस्त्राएल क कउनो मनई परमेस्सर क खास भेंट चढ़ावत ह तउ उ याजक जउन ओका अंगीकार कइ सकत ह ओका अपने लगे रख सकत ह। इ ओकर बाटइ। 10एक मनइ क पवितर चीज ओका अपना अहइ (उ ओका दइ सकत ह या ओका आपन बरे रखइ सकत ह।) मुला जदि उ ओनका देत ह तउ उ याजक क होइ जाइ।”

## सक्की भतार लोग

11तब यहोवा मूसा स कहेस, 12“इस्त्राएल क लोगन स इ कहा कउनो मनई क मेहरारु पतिव्रता नाहीं भी होइ सकत। 13उ दूसर मनइयन क संग सोइ सकत ह अउ ऐका आपन भतारे स छुपाइ सकत ह। ओकर भतार ओका कबहुँ जान भी नाहीं सकत जउन बुराई उ किहेस ह होइ सकत ह कि कउनो गवाह भी नाहीं अहइ अगर उ आपन हरकत स नाहीं पकड़ा जाइ। अउ उ मेहरारु भी आपन भतार स आपन पाप क बारे में नाहीं कही। 14मुला भतार संका करब सुरु कइ सकत ह कि ओकर मेहरारु ओकरे विरुद्ध पाप किहेस ह। उ ओकरे बरे जलन रख सकत ह, चाहे उ कउनो बुरा काम नाहीं किहेस ह जेकर कारण उ अविस्वासी होइ जाइ। 15जदि अइसा होत ह तउ उ आपन मेहरारु क याजक क लगे लइ जाइ। भतार एक भेंट भी लइ जाइ। इ भेंट एपा क दसवाँ भाग जौ क आटा होइ। ओका जौ क आटे प तेल या सुगन्धि नाहीं डवइ चाही। इ जौ क आटा यहोवा क अन्न भेंट अहइ। इ एह बरे दीन्ह जात कि भतार ईर्ष्यालु अहइ। इ भेंट इ संकेत करी कि ओका बिस्वास अहइ कि ओकर मेहरारु पतिव्रता नाहीं अहइ।

16“याजक मेहरारु क यहोवा क समन्वा लइ जाइ अउ मेहरारु यहोवा क समन्वा खड़ी होइ। 17तब याजक कछू खास पानी लेइ अउ ओका माटी क कूँड़ा में डई। याजक पवित्र तम्बू क फर्स स कछू माटी पानी में नाई। 18याजक मेहरारु क यहोवा क समन्वा खड़ी रहइ बरे मजबूर करी। तब उ ओकर बार उधारी अउ ओकरे हाथे में अन्नबलि देइ। इ जौ क आटा होइ जउन जेका भतार जलन क कारण ओका दिहे रहा। उहइ टेमें याजक उ खास करुआ पानीवाला माटी क कूँड़ा धरे रही। इ जल ही अहइ जउन मेहरारु क परेसानी पइदा करत ह (सिरिफ अगर उ पाप किहेस ह।)

19“तब याजक मेहरारु क हिदायत देइ कि ओका झूठ नाहीं बोलइ चाही। ओका फुरइ बोलइ क बचन देइ चाही। याजक ओसे कही: ‘जदि तू दूसर मनई क संग नाहीं सोई अहा अउ तू आपन भतार क खिलाफ पाप नाहीं किहे अहा, जबकि तोहार बियाह ओकरे संग हुआ अहइ, तउ इ सराप जल तोहका नोस्कान न पहुँचाइ। 20मुला जदि तू आपन भतार क खिलाफ पाप किहा ह, जदि तू कउनो दूसर मनई क संग सोई अहा तउ तू सुद्ध नाहीं अहा। काहे? काहेकि जउन तोहरे संग सोवा इ बरे अहइ तोहार भतार नाहीं अहइ अउ उ तोहका असुद्ध बनाएन ह। 21एह बरे जब तू इ खास जल क पिउबू तउ तोहका बहोत परेसानी होइ। तोहार पेट फूलि\* आइ अउ तू कउनो लरिका पइदा नाहीं कइ सकबिउ। जदि तू गोइवा स भारी होबिउ तउ तोहार लरिका मरि जाइ। तब तोहार लोग तोहका तजि देइहीं अउ उ पचे तोहरे बारे में बुरी बात करिहीं।’

“तब याजक क मेहरारु स यहोवा क विसेस बचन देइ बरे कहइ चाही। मेहरारु क अंगीकार करइ चाही कि इ सबइ बुरी बातन ओका होइहीं, जदि उ झूठ बोली। 22याजक क कहइ चाही, ‘तू इ जले क लेबिउ जउन तोहरे तन में परेसानी पइदा करी। जदि तू पाप किहा ह तउ तू लरिका क

जनम नाहीं दइ सकबिउ अउर जदि तोहार कउनो लरिका गरभ में अहइ तउ उ जन्मइ स पहिले मरि जाइ।’ तब मेहरारु क कहइ चाही: ‘मई उ अंगीकार करत हई जउन आप कहत हीं।’

23“याजक क इ चिताउनियन क चाम-पत्र प लिखइ चाही। फुन ओका इ लिखावट क पानी में धोवइ चाही। 24तब मेहरारु उ पानी क पिई जउन परेसानी पइदा करत ह। उ पानी ओहमा जाइ अउर जदि उ अपराधी अहइ तउ ओका बहोत परेसानी पइदा करी।

25“तब याजक उ अन्नबलि जउन जलन बरे भेंट अहइ क ओहसे लेइ। उ ओका यहोवा क समन्वा उठाई अउर ओका वेदी तलक लइ जाइ। 26तब याजक आपन अंजुरी में अन्न भरी अउ ओका वेदी प धरी। तब उ ओका बारी। ओकरे पाछे उ मेहरारु स पानी पिअइ क कही। 27जदि मेहरारु भतार क खिलाफ पाप किहे होई तउ पानी ओका परेसान करी। पानी ओकरे सरिर में जाई अउर ओका बहोत कस्ट होइ। अउर कउनो बच्चा जउन ओकरे गरभ में होइ, पइदा होइ स पहिले मरि जाई अउर उ कबहुँ बच्चा क जन्म नाहीं दइ सकी। उ आपन लोगन क बीच अभिसाप होइ जाब्या। 28मुला जदि मेहरारु पति क खिलाफ पाप नाहीं किहे अहइ तउ उ पवित्र अहइ। फुन याजक घोसणा करी कि उ अपराधी नाहीं अहइ। अउर लरिकन क जन्म देइ बरे जोगग होइ जाई।

29“इ तरह इ ईसा क बारे में कानून अहइ। तोहका इहइ करइ चाही जदि कउनो बीही मेहरारु आपन पति क खिलाफ पाप करत ह। 30या जदि कउनो मनई जलन करत ह अउ आपन मेहरारु क बारे में संका करत ह कि उ ओकरे खिलाफ पाप किहे अहइ तउ मनई क इहइ करइ चाही। याजक क कहइ चाही कि उ मेहरारु यहोवा क समन्वा खड़ी होइ। तब याजक इ सबहिं काम क करी। इहइ कनून बा। 31भतार कउनो बुरा करइ क अपराधी नाहीं होइ। मुला मेहरारु कस्ट उठाइ, जदि उ पाप किहे अहइ।”

## नाज़ीरी बंस

6 यहोवा मूसा स कहेस, 2“इ बातन इस्त्राएल क मनइयन स कहा: कउनो मनसेधू या मेहरारु कछू निश्चित समइ बरे आपन आप क परमेस्सर क अपर्ण कइ क कसम खाइ सकत ह। उ मनई नाज़ीरी कहा जाई। 3उ टेम में मनई क कउनो दाखरस या कउनो जियादा नसीली चीज नाहीं पिअइ चाही। मनई क सिरका जउन दाखरस स बना होइ या कउनो जियादा नसीला पिअनी नाहीं पिअइ चाही। उ मनई क अंगूरे क रस नाहीं पिअइ चाही अउर न ही अंगूर या किसमिस खाइ चाही। 4उ पवित्रीकरण क काल में उ मनई क अंगूर स बना कउनो चीज नाहीं खाइ चाही। उ मनई क अंगूरे क बिया या बोबला भी नाहीं खाइ चाही।

5“पवित्रीकरण क काल में उ मनई क आपन बार नाहीं काटइ चाही। उ मनइ क उ टेमें तलक सुद्ध रहइ चाही जब तलक पवित्रीकरण क काल खतम न होइ। ओका आपन बार क लम्बा होइ देइ चाही। उ मनई क बार परमेस्सर क दीन्ह गवा पवित्रीकरण क बचन क एक खास

पेट फूलि तोहार गरभ गिरि जाइ अउ पेट फूलि आई।

हींसा अहइ। उ ओन बारन क परमेस्सर क भेंट क रूप में देई। एह बरे उ मनई आपन बारन क तब तलक लम्बा होइ देइ जब तलक अलग होइ क टेमें खतम होई।

6“इ पवित्रीकरण क काल में इ कउनो नाज़ीर क कउनो ल्हासे क लगे नहीं जाइ चाही। काहेकि उ मनई आपन क पूरी तरह स यहोवा क अर्पित कइ दिहे अहइ। 7जदि ओकर आपन बाप, आपन महतारी, आपन भाई या आपन बहिन भी मरि जाई तउ भी ओका ओनका छुवइ न चाही। इ ओका अपवित्तर करी। ओका इ देखावइ चाही कि ओका अलग कीन्ह ग अहइ अउर आपन क पूरी तरह परमेस्सर क अर्पित कइ चुका अहइ। 8जउन पूरा टेमें में उ अलग कीन्ह गवा उ पूरी तरह आपने यहोवा क अर्पित किहे रहा अहइ।

9“इ होइ सकत ह कि नाज़ीर कउनो दूसर मनई क संग होइ अउ दूसर मनई एकाएक मरि जाइ। जदि नाज़ीरी मरे भए मनई क छुई तउ उ अपवित्तर होइ जाइ। जदि अइसा होत ह तउ नाज़ीरी क मूँड स बार कटवावइ चाही। इ सबइ बार ओकरे खास दीन्ह गए बचन क हींसा रहने। ओका आपन बारन क सतएँ दिन काटइ चाही काहे की उ दिन उ पवित्तर कीन्ह जात ह। 10तब अठवें दिन ओका दुइ फाखता या कबूतरी क दुइ बच्चा याजक क लगे लइ आवइ चाही। ओका याजक बरे ओनका मिलापवाला तम्बू क दुआरे देइ चाही। 11तब याजक एक क कबूतरी पापबलि क रूप में भेंट करी। उ दूसरे कबूतरी क होमबलि क रूप में भेंट करी। अउर याजक उ मनई क ओकरे पाप बरे प्रायश्चित करब्या। (उ पाप किहेस काहे की उ ल्हास क लगे रहा।) उ समइ उ मनई फुन बचन देइ कि मूँडे क बारन क यहोवा बरे भेंट करी। 12एँकर इ अरथ भवा कि उ मनई क फुन पवित्रीकरण क काल में दूसर समइ बरे आपन आप क यहोवा क अर्पित कइ देइ चाही। उ मनई क एक बरिस क नर मेमना लावइ चाही। उ एँका दोखबलि क रूप में देइ। ओकरे पवित्रीकरण क सब दिन बिसराइ दीन्ह जात अहइ। उ मनई क नवा अलग होइके टेमें सुरु करइ क होइ। इ जरुर कीन्ह जाइ काहे की उ पवित्रीकरण पहिले काल में एक ल्हास क छुए रहा।

13“जब मनई क अलग होइ क टेमें पूरा होइ जाइ तउ ओका इ जरुर करइ चाही। ओका मिलापवाला तम्बू क दुआर प जाइ चाही। 14हुवौं उ आपन भेंट यहोवा क देइ। ओकर भेंट होइ चाही:

होमबलि बरे बिन दोखे क एक बरिस क नर मेमना पापबलि क भेंट खातिर बिन दोखे क एक बरिस क मादा मेमना। मेलबलि बरे बिन दोखे क एक नर भेड़ा।

15बे खमीरे क बनी भइ रोटिन-नीक आटा में साना भवा तेले स बना केक-एँके ऊपर लावइ चाही। अउर दूसर अन्नबलि अउ पयेबलि जउन इ भेंटन क एक हींसा अहइ।

16“तब याजक इ चीजन क यहोवा क देइ। याजक पापबलि अउ होमबलि चढ़ाई। 17याजक बे खमीरे क रोटी क टोकरी यहोवा क देइ। तब उ यहोवा क मेलबलि क रूप में भेड़ा क मारी। उ यहोवा क अन्नबलि अउ पयेबलि क संग एँका देइ।

18“नाज़ीर क मिलापवाला तम्बू क दुआर प जाइ चाही। हुवौं ओका आपन बार कटवावइ चाही जेका उ यहोवा बरे बढाए रहा। ओन बारन क मेलबलि क नीचे आगी क ऊपर रखई चाही।

19“जब नाज़ीर आपन बारन क काटि चुकी तउ याजक ओका भेड़ा क एक तु उसना भवा काँध अउ टोकरी स एक तु बड़वार अउ एक तु नान्ह क केक देइ। इ दुइनउँ केक बे खमीरे क बना होइहीं। 20तब याजक इ चीजन क यहोवा क अगवा हलाई। इ एक तु उत्तोलनबलि अहइ। इ चीजन पवित्तर अहइँ अउ याजक क अहइँ। भेड़ा क छाती अउ जाँघ भी यहोवा क समन्वा हलावा जइहीं। इ चीजन भी याजक क बाटिन। एँकरे पाछे नाज़ीरी दाखरस पी सकत ह।

21“जदि कउनो मनई नाज़ीर होइ चाहत ह तउ ओका यहोवा क इ सबहिं भेंट देइ चाही। इ नेमें ओन मनइयन बरे अहइँ जउन नाज़ीर होइ क बचन लेत हीं। जदि कउनो मनई जियादा देइ क बचन देत ह तउ ओका आपन बचन क निभावइ बरे नाज़ीर क नेमें क मुताबिक करइ चाही।”

### याजक क आसीर्बाद

22यहोवा मूसा स कहेस, 23“हारून अउ ओकरे पूतन स कहा। इस्राएल क लोगन क आसीर्बाद देइ क तरीका इहइ अहइ, ओनसे कहा:

24यहोवा तोहका आसीस देइ अउ तोहार रच्छा करई।

25यहोवा क कृपा-दृस्टि तोहे प उजागर होइ। उ तोहसे पिरेम करइ।

26यहोवा क दृस्टि तोह प होइ। उ तोह पइ दाय़ा करी उ तोहका सान्ति क साथ आसीर्बाद देइ।”

27तब यहोवा कहेस, “इ तरह हारून अउ ओकर पूत इस्राएल क मनइयन क समन्वा मोर नाउँ लेइहीं अउ मईँ ओनका आसीर्बाद देब।”

### पवित्तर तम्बू क समर्पण

7 जउने दिन मूसा पवित्तर तम्बू क लगाउब समापन किहेस, उ एँका यहोवा क अर्पण किहेस। मूसा तम्बू अउ एहमौं प्रयोग में आवइवाली चीजन, अउर वेदी अउ एहमौं प्रयोग आवइवाली चीजन अउर वेदी अउ एहमौं प्रयोग आवइवाली चिजिन प खास तेल डाएस इ ओन सबइ चीजन क पवित्तर किहेस।

2तब इस्राएल क नेता लोग भेंट चढ़ाएन। इ पचे आपन आपन परिवारे क मुखिया रहे रहने जउन आपन परिवार समूहन क नेता रहने। इ नेता लोग मनइयन क गनेन। 3इ सबइ नेता यहोवा बरे भेंट लइ आएन। उ पचे चारिहुँ ओर स ढँकी छः तु गाड़ी अउ बारह तु बर्धा क लइ आएन। (हर एक नेता क जरिये एक तु बर्धा दीन्ह गइ रही। अउर दुइ नेता क जरिये एक ठू गाड़ी दीन्ह गइ रही) नेता लोग पवित्तर तम्बू में यहोवा क इ चीजन क दिहेन।

4यहोवा मूसा स कहेस, 5“नेता लोग क इ चीजन क अंगीकार करा। इ चीजन क लेवि-बंस क मनइयन क द्या। इ ओनका मिलापवाला तम्बू प काम करइ मैं सहायक होइ।”

6एह बरे मूसा चारिहूँ कइँती स ढकी भइ गाड़ियन अउ गइयन क लिहस। उ इ चीजन क लेवी-बंस क लोगन क दिहस। 7उ दुइ गाड़ी अउ चार तु गाइ गोर्सीन बंसी लोगन क दिहस। ओनका आपन काम बरे ओन गाड़ियन अउ गइयन क जरूरत रही। 8तब मूसा चार तु गाड़ी अउ आठ तु गइया मरारी बंस क मनइयन क दिहस। ओनका आपन काम बरे गाड़ी अउ गइयन क जरूरत रही। याजक हारून क पूत ईतामार इ सबहिं मनइयन क काम बरे जिम्मेदार रहा। 9मूसा कोहात बंसी मनइयन क कउनो गाइ या कउनो गाड़ी नाहीं दिहस। इ मनइयन क पवित्तर चीजन आपन कौंधे प ढोउब रहा इहइ कारज ओनका करइ बरे सौपा ग रहा।

10जउन दिन मूसा वेदी प तेल डाएस, उहइ दिन नेता लोग वेदी क अर्पण बरे आपन भेंट चढ़ावइ बरे लइ आएन। उ पचे आपन भेंट वेदी क समन्वा यहोवा क भेंट किहना। 11यहोवा पहिले स ही मूसा स कहे रहा, “हर दिन एक एक नेता वेदी प भेंट चढ़ावइ लइ जाइ।”

12-83\*बारहु-नेतन में स हर एक नेता आपन आपन भेंट लइ आवा।

उ सबइ भेंट इ अहइँ: हर एक नेता चाँदी क एक तु थाली लइ आवा जेकर वजन एक सौ तीस सेकेल अउर एक चाँदी क खोरा जेकर वजन सत्तर सेकेल रहा। इ दुइनउँ उपहार क पवित्तर स्थान क सेकेल क अनुसार भवा बटखरा स तउला गवा रहा। हर खोरा अउ हर थाली में तेल महीन आटा भरा रहा। इ अन्नबलि क रूप में प्रयोग में लइ जात रहा। हर नेता सोना क एक बड़का कलछुला भी लइ आवा जेकर वजन दस सेकेल रहा। इ कलछुला में धूप भरी रही।

हर नेता एक तु बछवा, एक भेड़ा अउ एक बरिस क नर मेमना भी लइ आवा। इ गोरुअन होमबलि बरे रहेन। हर नेता पापबलि क रूप में बइपरइ बरे एक बोकरा भी लावा। हर नेता दुइ गाइ, पाँच भेड़ा, पाँच बोकरा अउ एक एक बरिस क पाँच मेमना लिआवा। इ सबन क एक मलेबलि बरे बलि दीन्ह गइ।

पहिले दिन अम्मीनादाब क पूत नहसोन, जउन यहूदा क परिवार समूह स रहा, आपन भेंट लिआवा।

दूसर दिन सूआर क बेटवा नतनेल जउन इस्साकार क नेता रहा, आपन भेंट लिआवा।

तीसरे दिन हेलोन क बेटवा एलीआब जउन जबूलून क नेता रहा, आपन भेंट लिआवा।

चउथे दिन सदेऊर क पूत एलीसूर जउन रूबेनियन क नेता रहा, आपन भेंट लिआवा।

पाँचए दिन सूरीसदुदई क पूत सलुनीएल जउन सिमोनियन क नेता रहा, आपन भेंट लिआवा।

छठएँ दिन दूएल क बेटा एल्यासाप जउन गादियन क नेता रहा, आपन भेंट लिआवा।

सतएँ दिन अम्मीहूद क बेटवा एलीसामा जउन एप्रैम क नेता रहा, आपन भेंट लिआवा।

अठएँ दिन पदासूर क पूत गम्लीएल जउन मनस्से क मनइयन क नेता रहा, आपन भेंट लिआवा।

नवें दिन गिदोनी क पूत अबीदान जउन बिन्यामीन क मनइयन क नेता रहा, आपन भेंट लिआवा।

दसएँ दिन अम्मीसदुदई क बेटवा अहीयाजर जउन दान क लोगन क नेता रहा, आपन भेंट लिआवा।

ग्यारहवें दिन ओक्रान क बेटवा पजीएल जउन आसेर क लोगन क नेता रहा, आपन भेंट लिआवा।

अउर फिन बारहवें दिन एनान क बेटवा अहीरा जउन नप्ताली मनइयन क नेता रहा, आपन भेंट लइके आवा।

84इ तरह इ सबहिं चीजन इस्त्राएली मनइयन क नेता लोगन क भेंट रही। इ चीजन तब लाइ गइन जब मूसा खास तेल वेदी प एका अर्पण बरे डाएस। उ पचे बारह चाँदी क तस्तरी, बारह चाँदी क खोरा अउ बारह सोना क चम्मच लाएन। 85चाँदी क हर तस्तरी क वजन लग भग एक सौ सेकेल रहा। अउर हरेक खोरा क चाँदी क वजन लगभग सत्तर सेकेल रहा। चाँदी क तस्तरियन अउ चाँदी क खोरा क कुल माना गवा वजन\* दुइ हजार चार सौ सेकेल रहा। 86धूप स लबालब सोना क चम्मच में स हर एक क माना गवा वजन चार औंस रहा। बारह सोने क चम्मचन क कुल वजन करीब करीब उ पौंड रहा।

87होमबलि बरे गोरुअन क कुल गनती बारह बर्धी, बारह भेड़ा अउ बारह एक बरिस क भेड़ी क नर बच्चा रहेन। हुवाँ अन्नबलि भी रहा। यहोवा क पापबलि क रूप में प्रयोग में आवइ वाला कुल बारह बोकरा भी रहेन। 88नेता लोग मेलबलि क रूप में प्रयोग अउ मारा जाइ बरे गोरुअन क दिहना। इ सबइ गोरुअन क एक साथ गनती चौबीस बर्धी, साठ भेड़ा, साठ बोकरा अउ साठ एक बरिस क भेड़ी क नर बच्चा भी रहेन। इ तरह उ पचे वेदी क इ चीजन अर्पण कई बरे भेंट किहेन। इ मूसा वेदी प खास तेल डाइ क पाछे भवा।

89मूसा मिलापवाला तम्बू में यहोवा स बात करइ गवा। उ टेमें उ आपन स बात करत भइ यहोवा क वाणी सुनेस। उ वाणी करार क सन्दूखे क ऊपर क बिसेख ढकना क दुइनउँ करूब सरगदूतन क बगल स आवत रही। इ तरह परमेस्सर मूसा स बात किहस।

### डीबट

8 यहोवा मूसा स कहेस, 2“हारून स बात करा अउ ओसे कहा, “उ ठउरन प सात दिया धरा जेका मईँ तोहका देखीएँ ह। उ सबइ दियन डीबट क समन्वा क डेबरा क रोसन करिहीं।”

3हारून इ किहेस। हारून ओनेँ दियन क ठीक ठउर प धरेस अउ ओनकइ मुँह अइसा कइ दिहस कि ओसे डीबट क समन्वा क पहुँटा उजियर होइ सकइ। उ मूसा क दीन्ह गवा यहोवा क हुकुम क मानेस। 4डीबट सोने क पाटी स बना रहा। सोना क उपयोग पावा स लइ क उपर डीबट क

**पद 12-83** मूल पाठ में हर एक नेता क सूची अलग-अलग दीन्ह गइ अहइ। मुला हर एक भेंट क लिखा भवा पाठ एक समान अहइ। यह बरे सुविधा क धियान देत भए पद-गनती 12 से 83 ताई हिआँ एक साथेन दिआइके अनुसार कीन्ह ग रहा।

**माना गवा वजन** “पवित्तर सेकेल।” एक तु पौंडे में चालीस सेकेल होत रहेन। पवित्तर तम्बू अउ मन्दिर में तउल क काम में आवइ वाला माना भवा बटखरा।

सोना क फूल तलक कीन्ह गवा रहा। इ सब उहइ तरह बना रहा जइसा यहोवा मूसा क देखौए रहा।

### लेवी बंस क मनइयन क समर्पण

5 यहोवा मूसा स कहेस, 6 "लेवी बंस क मनइयन क इस्त्राएल क दूसर मनइयन स अलग लइ जा। ओने लेवी बंसी मनइयन क सुद्ध करा। 7 इ तोहका सुद्ध बनावइ बरे करइ क होइ। पापबलि स खास पानी\* ओन प छिरका। इ पानी ओनका सुद्ध करी। तब उ पचे पूरा सरिर स बार उस्तरा स कटवइहीं अउ आपन ओढ़ना क धोइहीं। इ ओनके सरिर क सुद्ध करी।

8 "तब उ पचे एक नवा बर्धा अउ ओकरे संग प्रयोग में आवइवाली अन्नबलि लेइहीं। इ अन्नबलि तेले स साना भवा आटा होइ। तब दूसर बर्धा क पाप बरे भेंट क रूप में ल्या। 9 लेवी बंस क मनइयन क मिलापवाला तम्बू क समन्वा पहँटा में लिआवा। तब इस्त्राएल क सबहि मनइयन क चारिहूँ कइँती स बटोरा। 10 तब तोहका लेवी बंस क मनइयन क यहोवा क समन्वा लइ आवा। अउ इस्त्राएल क लोग आपन हाथ ओन प धरीहीं। 11 तब हारून लेवी बंस क लोगन क यहोवा क समन्वा लाइ। उ पचे यहोवा बरे उत्तोलनबलि क रूप में होइहीं। इ ढंग स लेवी बंस क लोग यहोवा क विसेस काम करइ बरे तइयार होइहीं।

12 "लेवी बंस क लोगन स कहा कि उ पचे आपन हाथ बर्धा क मूँटे प धरिहीं। एक बर्धा यहोवा क पापबलि क रूप में होइ। दूसर बर्धा यहोवा क होमबलि क रूप में काम आइ। इ भेंट लेवी-बंस क मनइयन क पाप बरे प्रायश्चित करी। 13 लवि बंस क मनइयन स कहा कि उ पचे हारून अउ ओकरे पूतन क अगावा खड़ा होइ। तब यहोवा क समन्वा लेवी बंस क मनइयन क उत्तोलनबलि क रूप में अर्पण करा। 14 इ तरीका स लेवी बंस क लोग खास होइहीं। उ पचे इस्त्राएल क दूसर मनइयन स अलग होइहीं। अउ लेवी बंस क लोग हमार होइहीं।

15 "एह बरे लेवी बंस क मनइयन क सुद्ध करा। अउ ओनका यहोवा क समन्वा उत्तोलन बलि क रूप में हाजिर करा। जब इ पूरा हो जाइ तब उ पचे आइ सकत हीं अउर मिलापवाला तम्बू में आपन काम कइ सकत हीं। 16 इ सबइ लेवी बंसी इस्त्राएल क लोग अहीं जउन मोका दीन्ह ग अहइँ। मई ओनका आपन लोग क रूप में अंगीकार किएँ ह। बीते भए जमाना में हर एक इस्त्राएली परिवार में पहिलौटी क पइदा लरिका मोका दीन्ह जात रहा मुला मई लेवी बंस क मनइयन क इस्त्राएल क दूसर परिवारन क पहिलौटी क बेटवन क जगह प अंगीकार कियेउँ ह। 17 इस्त्राएल क हर मनई जउन हर एक परिवार में पहिले पइदा भवा ह, मोर अहइ। जदि उ मनई या गोरु अहइ तउ भी मोर अहइ। मई मिस्त्र में सबहि पहिला पइदा गदेलन अउ जनावर क मारि डिएँ रहा। एह बरे मई पहिला पइदा पूतन क अलग कियेउँ जेहँसे उ पचे मोर होइ सकइँ। 18 अब मई लेवी बंस क मनइयन क लइ लिहैउँ ह। मई

इस्त्राएल क दूसर लोगन क परिवारन में पहिला पइदा भएन गदेलन क ठउर प ऐनका अंगीकार कियेउँ ह। 19 मई इस्त्राएल क सबहि लोगन स लेवी बंस क मनइयन क चुनेउँ ह। मई ओनका हारून अउ ओकरे पूतन क ऐनका उपहार क रूप में दिहैउँ ह। मई चाहत हउँ कि उ पचे मिलापवाला तम्बू में काम करइँ। उ पचे इस्त्राएल क सबहि मनइयन बरे सेवा करिहीं। अउर उ पचे ओन बलिदानन क देइ में मदद करिहीं जउन इस्त्राएल क लोगन क पापन क प्रायश्चित करिहीं। तब कउनो बड़ा रोग या कष्ट इस्त्राएल क लोगन क नाहीं होइ जब उ पचे पवितर ठउर क लगे अइहीं।"

20 एह बरे मूसा, हारून अउ इस्त्राएल क सबहि लोगन यहोवा क हुकुम मानेन। उ पचे लेवी बंस क खातिर वइसा ही कियेन, जइसा यहोवा ओनके बरे मूसा क हुकुम दिहे रहा। 21 लेवी लोग आपन क फर्छा कियेन अउ आपन ओढ़ना क धोएन। तब हारून ओनका यहोवा क समन्वा उत्तोलन बलि क रूप में हाजिर कियेस। हारून उ भेंटन क भी चढ़ाएस जेका ओनकर पापन क प्रायश्चित करइ बरे चढ़ावा गवा रहा जउन ओनका पवितर कइ दिहे रहा। 22 ओकरे पाछे लेवी बंस क लोग आपन काम करइ बरे मिलापवाला तम्बू क आएन। हारून अउ ओकर पूतन ओनकइ देखरेख कियेन। उ पचे लेवी बंस क मनइयन क काम बरे जिम्मेदार रहेन। हारून अउ ओकर पूतन ओन आदेसन क मानेन जेका यहोवा मूसा क दिहे रहेन।

23 यहोवा मूसा स कहेस, 24 "लेवी बंस क मनइयन बरे इ विसेस आदेस अहइ: हर एक लेवी बंस क मनसेधू क, जउन पचीस बरिस या ओसे जिआदा उमर क अहइ, जरूर आवइ चाही अउ मिलापवाला तम्बू में क काम में हाथ बटावइ चाही। 25 जब कउनो मनई पचास साल क होइ जाइ तउ ओका रोजाना क कामे स छुट्टी लेइ चाही। ओका फुन काम करइ क जरूरत नाहीं अहइ। 26 पचास साल या ओसे जियादा उमर क लोग मिलापवाला तम्बू में आपन भाइयन क ओनके काम में मदद दइ सकत हीं। मुला उ पचे खुद काम नाहीं करिहीं। तोहका इ सब करइ चाही जब तू लेवि मनइयन क ओनका काम करइ क द्या।"

### फसह त्यौहार

9 यहोवा मूसा स सीने रेगिस्तान में कहेस। उ टेमें दूसर बरिस क पहिला महीना रहा। जब इस्त्राएल क मनइयन मिस्त्र स निकरा रहेन। यहोवा मूसा स कहेस, 2 "लोगन क तय कीन्ह गवा टेमें पइ फसह क दवत जरूर मनावइ चाही। 3 उ तय कीन्ह गवा समइ इ महीना क चउदहवाँ दिन अहइ। ओनका गोधूरि क टेमें फसह क भोजन खाइ चाही। ओका इ सबइ कानून अउ नेम क पालन करइ चाही जेका त्यौहार में कीन्ह जात ह।"

4 एह बरे मोसा इस्त्राएल क लोगन क फसह क त्यौहार मनावई बरे कहेस। 5 अउर लोग पहिला महीन क चउदहवाँ दिन वइसा ही कियेन। इस्त्राएल क मनइयन हर एक काम वइसन कियेन जइसा यहोवा मूसा क हुकुम दिहे रहेन।

6 मुला कछू लोग फसह त्यौहार क भोज उ दिन नाहीं खाइ सकेन। उ पचे एक ल्हास क कारण सुद्ध नाहीं रहेन।

**पापबलि स खास पानी** इ पानी में लाल गइयन क राख रही जेका पाप बरे भेंट क रूप में वेदी प जरावा ग रहा।

एह बरे उ दिन उ पचे मूसा अउ हारून क लगे गएन। 7उ पचे मूसा स कहेन, “हम पचे एक लहासे क छुअइ क कारण असुद्ध भवा अहेन। याजकन लोग तय कीन्ह ग टेमें प हमेका यहोवा क चढ़ावा देइ स रोक दिहस। तउ हम पचे इस्त्राएल क दूसर मनइयन क संग फसह त्योंहार नाहीं मनाइ सकित। हमका का करइ चाही?”

8मूसा ओनसे कहेस, “मई यहोवा स पूछब कि उ एकरे बारे में का कहत ह।”

9तब यहोवा मूसा स कहेस, 10“इस्त्राएल क लोगन स इ बातन कहा: इ विधि तोहार अउर तोहारे सन्तानन बरे होब्या। इ होइ सकत ह कि तू ठीक टेमें प फसह त्योंहार न मनाइ सका काहे की तू या तोहारे सन्तानन क कउनो मनई लहास क छुइ जाइ क कारण असुद्ध होइ या होइ सकत ह कि उ कउनो लम्बी जात्रा प गवा भवा अहा।” 11उ फसह त्योंहार दूसर महीना क चउदहवाँ दिन गोधूरि क समइ मनावइ। उ मेमना, बे खमीरे क रोटी अउ करुआ सागापात खाइ। 12दूसर दिन क भिन्सारे तलक ओका ओहमाँ स कउनो भी भोजन नाहीं तजइ चाही। ओका भेड़ी क कउनो हाइ क भी नाहीं तोइइ चाही। उ मनई क फसह क नेमें क मानइ चाही। 13कउनो भी व्यक्ति जउन पवितर अहइ अउर लम्बी जात्रा पइ नाहीं अहइ तउ फसह त्योंहार ठीक समइ पइ ही मनावइ चाही। जदि उ मनई फसह त्योंहार ठीक समइ पइ नाहीं मनावत ह तउ ओका आपन मनइयन स अलगइ पठइ दीन्ह जाइ। उ अपराधी बा काहे की उ यहोवा क ठीक टेमें प भेंट नाहीं चढ़ाएस। तउ ओका जरुर सजा दीन्ह जाइ चाही।

14“तू सबइ क बीच बसइया गेर इस्त्राएली फसह त्योंहार में आवइ चाहइ तउ तोहारे संग हीसा लइ सकत ह। इ कनून में अहइ मुला उ मनई क फसह क सब नेमें मानइ चाही। उहइ नेमें सब बरे अहई।”

### बादर अउ आगी

15जउने दिन पवितर तम्बू अउ करार क तम्बू लगावा गवा। यहोवा क बादर ऐंका घेरि लिहस। रात में, उ बादर आगी क नाई देखाइ देत रहा। 16बादर पवितर तम्बू प बराबर थमा रहा। अउर राति में बादर आगी क तरह देखीत रहा। 17जब बादर पवितर तम्बू प आपन ठउर स तम्बू प ठहरत रहा, इस्त्राएलियन ऐंकर पाछा करत रहेन। जब बादर थमि जात्रा रहा तब इस्त्राएल क लोग हुवैइ सिबिर डवत रहेन। 18इहइ ढरी रहा कि यहोवा मनइयन क देखाएस कि कब जात्रा करई, कब रुकि जाई अउ कब सिबिर डवई। अउ जबहि तबहि बादर पवितर तम्बू क ऊपर ठहरि जात, लोग उहइ ठउर प सिबिर दसाए रहतेन। 19कबहुँ कबहुँ बादर बहोत दिन तलक पवितर तम्बू प जमा रहत। इस्त्राएलियन यहोवा क हुकुम मनतेन अउ जात्रा नाहीं करत रहेन। 20कबहुँ कबहुँ बादर पवितर तम्बू प कछू दिन बरे ठहरत रहत रहा यहोवा क हुकुम क अनुसार उ ठहरत अउ यहोवा क हुकुम क अनुसार उ चलत। 21कबहुँ कबहुँ बादर रात में ठहरि जात अउ दूसर दिन भिन्सारे चलि पड़त। तउ मनइयन आपन चीजन क बटोरतेन अउ एकर पाछा करतेन। या अगर बादर एक दिन अउ एक रात ठहरत अउर तब इ चलि सुरू

करत तउ मनइयन ओकर साथ चलि रहत। 22जदि बादर तम्बू क ऊपर दुइ दिन, या एक महीना या एक बरिस ठउरत तउ लोग यहोवा क हुकुम मनतेन। उ पचे उहइ सिबिर में ठउरतेन अउ तब ताई न चलतेन जब तलक बादर न चलत। जब बादर आपन ठउर स उठत अउ चलत रहत तबहि लोग चलतेन। 23इ तरह लोग यहोवा क हुकुम क मनतेन। उ पचे हुवैइ सिबिर जमउतेन जहाँ यहोवा बतावत। उ पचे तब चलतेन जब यहोवा ओनका अइसा बतावत। लोग धियान स निहरतेन अउ यहोवा क हुकुम मूसा क जरिए मनतेन।

### चाँदी क तुरहियन

10 यहोवा मूसा स कहेस, 2“तुरहियन बनवइ बरे चाँदी क प्रयोग करा। चाँदी क पतरी बनाइके ओसे दुइ तुरहियन बनावा। इ सबइ तुरहियन क उपयोग मनइयन क एक संग बोलावइ अउ इ बतावइ बरे कि सिबिर क लइक कब चलइ चाही। 3जब तू इ तुरहियन क बजउब्या, तउ सबहि मनइयन क मिलापवाला तम्बू क प्रवेश दुआर प बटुर जाइ चाही। 4अगर तू एक ही तुरही दर तलक बजउब्या तब सिरिफ नेता लोग अइहीं। (इस्त्राएल क बारहु परिवारे क मुखिया तोहारे समन्वा बटुर जइहीं।)

5“जब तू तुरहियन क चेताउनी क रूप में बजाउब इ मनइयन क सिबिर क लेकइ चलइ चाही। जब तू पहिली दाई तू तुरहियन क चेताउनी क रूप में बजउब्या, तउ मिलापवाला तम्बू क पूरब कइँती क परिवार दलन क चलब सुरू करइ चाही। 6दूसरी दाई जब तू तुरहियन क चेताउनी क रूप में बजउब्या, मिलापवाला तम्बू क ढक्खिन कइँती क परिवार दलन क सिबिर जमाए भए मनइयन क आगे चलब सुरू करइ क होइ। 7जब तू कउनो खास सभा बरे मनइयन क बटोरइ चाहा, तउ तुरहियन क दूसरे ढंग स लम्बी थिरान अवाजे में बजावा। 8सिरिफ हारून क याजक बेटवन ही तुरहियन बजाइ सकत हीं। इ तू सब पचन बरे नेमें अहइ जउन हमेसा अगवा क पीढ़ी दर पीढ़ी चलत रही।

9“जदि तू आपन देस में दुस्मन स लड़त रहा हवा तउ ओनसे लड़इ स पहिले तुरहियन क चेताउनी क रूप म बजावा। तब यहोवा तोहार परमेस्सर तोहार बात सुनी अउ तू सबन क दुस्मनन स बचाइ। 10तू सबन क आपन खास बइठक, नवा चन्द्रमा क दिना पइ अउ खुसी क टेमें प तुरहियन बजावइ चाही। जब तू पचे होमबलि अउ मेलबलि द्या, तउ तुरहियन बजावा। इ यहोवा तोहार परमेस्सर बरे तोहका याद रखइ बरे खास तरीका होइ।”

### इस्त्राएल क लोग सिबिर लइ जात हीं

11जब इस्त्राएल क मनइयन मिस्र छोड़ी दिहेन ओकरे पाछे दूसर बरिस क दूसर महीना क बीसवाँ दिन करार क तम्बू क ऊपर स बादर उठा। 12एह बरे इस्त्राएल क मनइयन आपन जात्रा सुरू कियेन। उ सबइ सीनै क रेगिस्तान तजि दिहेन अउ तब तलक जात्रा करत रहेन जब ताई बादर पारान क रेगिस्तान में नाहीं थमा। 13इ पहिली दाई रही जब मनइयन सिबिर लइ गएन। जइसा यहोवा मूसा क हुकुम दिहेस वइसा सिबिर क चलाएन।

14सबसे पहिले यहूदा क सिबिर स तीन दल गएन। उ पचे झण्डा लइके जात्रा किहेन। पहिला समूह यहूदा क परिवार समूह क रहा। अम्मीनादाब क पूत नहसोन उ दल क नेता रहा। 15ओकरे पाछे इस्साकार क परिवार समूह आवा। सूआर क पूत नतनेल उ समूह क नेता रहा। 16अउर तब जबूलून क परिवार समूह आवा। हेलोन क पूत एलीआब उ समूह क नेता रहा।

17तब पवित्तर तम्बू उतारा गवा। गेसोन अउ मरारी परिवार क मनइयन पवित्तर तम्बू क लइके चलेन। एह बरे इ परिवारे क लोग कतार में ठीक पाछे रहेन।

18तब रूबेन क सिबिर स तीन दल आएन। उ पचे आपन निसान लइके जात्रा किहेन। पहिला समूह रूबेन परिवार क रहा। सदेऊर क पूत एलीआज़ार इ समूह क नेता रहा। 19ओकरे पाछे सिमोन क परिवार समूह आवा। सूरीसद्वै क पूत सल्लमीएल उ समूह क नेता रहा। 20अउर तब गाद क परिवार समूह आवा। दूएल क पूत एलिअसफ इ समूह क नेता रहा। 21तब कोहात परिवार क लोग आएन। उ पचे ओन परित्र चीजन क ढोएन जउन पवित्तर ठउर में धरी रहिन। अब पवित्तर तम्बू क इ समूहन क नवा सिबिर में पहुँचइ क पहिले लगाइ द्या।

22एकरे पाछे एप्रैम क सिबिर क तीन समूह आएन। उ पचे आपन झण्डा लइके जात्रा किहेन। पहिला समूह एप्रैम क परिवार समूह रहा। अम्मीहूद क पूत एलीसामा उ समूह क नेता रहा। 23ओकरे पाछे मनस्से क परिवार समूह आवा। पदासूर क पूत गम्लीएल उ दले क नेता रहा। 24तब बिन्यामीन क परिवार समूह आवा। गिदौनी क पूत अबीदान उ दले क नेता रहा।

25कतार में आखिरी तीन तु परिवार समूह दूसर सबहि परिवार समूह बरे पीछ रच्छक रहेन। इ सब समूह दान क सिबिर स रहेन। उ पचे आपन निसान क संग जात्रा किहेन। पहिला समूह दान क परिवार समूह क रहा। अम्मीसद्वै क पूत अहीएजेर उ समूह क नेता रहा।

26ओकरे ठीक पाछे आसेर क परिवार समूह आवा। ओक्रान क पूत पजीएल उ समूह क नेता रहा। 27तब नप्ताली क परिवार समूह आवा। एनान क पूत अहीरा उ समूह क नेता रहा। 28इहइ तरह इस्त्राएल एक जगह स दूसर जगह पइ आपन समूहन क साथ, जब कबहुँ भी उ सिबिर लइ जाइ जात्रा करत रहेन।

29रुएल क पूत होबाब मिद्यानी रहा। (रुएल मूसा क ससुर रहा।) मूसा होबाब स कहेस, “हम पचे उ देस क जात्रा करत अही जेका यहोवा हम पचन क देइ क बचन दिहे अहइ। एह बरे हम लोगन क संग आवा। हम पचे तोहरे संग नीक बेउहार करब। यहोवा इस्त्राएल बरे नीक चीज देइ क बचन दिहे अहइ।”

30मुला होबाब जवाब दिहेस, “नाही; मई तोहरे संग न जाब। मई आपन देस अउ मनइयन क लगे जाब।”

31तब मूसा कहेस, “मेहरबानी कइके हमका जिन तजा। तू जानत अहा कि रेगिस्तान में हम पचन्क कइसा सिबिर लगाइ क होइ। तू हमार रह क देखइया होब्या। 32अगर तू हमरे संग आवत हया तउ यहोवा जउन कछू नीक चीज

देइहीं, हम तोहर संग हींसा बाँटबा।” 33उ सबइ यहोवा क पहाड़े स जात्रा सुरू किहेन। याजक लोग करार क सन्दूख लिहन अउ मनइयन क अगवा चलेन। उ पचे सिबिर डावइ बरे उचित ठउर क निहारत निहारत तीन दिना तलक लोगन क आगे-आगे सन्दूख लइ चलत रहेन। 34यहोवा क बदरा ओनके ऊपर मँडरात रहा। अउर हर एक भिन्सारे जब उ पचे आपन सिबिर क तजि देत रहेन तउ ओनका रह देखौवइ बरे बदरा हुवाँ रहत रहा।

35जब पवित्तर सन्दूख सिबिर स बाहर कइ जात रहा। मूसा हमेसा कहत रहा:

“परमेस्सर! उठा तोहार दुस्मन छितराइ जाई तोहार दुस्मन तोहरे समन्वा स पराइ जाई।”

36अउर जब पवित्तर सन्दूख आपन ठउर प धरा जात रहा, तब मूसा सब कहत रहा,

“हे परमेस्सर इस्त्राएल क दसिहुँ हजार बंस क लगे लउटि आवा।”

### लोग फुन सिकाइत करत हीं

**11** मनइयन आपन कस्ट क सिकाइत करब सुरू किहेन। यहोवा ओनकइ सिकाइत सुनेस। जब यहोवा इ बातन सुनेस तउ कोहाइ गवा। यहोवा क तरफ स आगी लोगन क बीच लग गइ। आगी सिबिर क कोना क कछू बाहरी भाग क भस्म कइ दिहस। 2एह बरे लोग मूसा क मदद बरे पुकारेन। मूसा यहोवा स बिनती किहेस अउ आगी क बरब बन्द होइग। 3एह बरे उ ठउर क नाउँ तबेर पड़ि गवा। मनइयन उ ठउर क इहइ नाम दिहन काहे की यहोवा ओनके बीच आगी बारे रहा।

### सत्तर पुरनिया नेतन

4गरीब लोगन क भीड़ अउर इस्त्राएलियन क बीच आम जन-समूह दूसर खाइ बरे इच्छा जाहिर किहेन। हाली ही इस्त्राएल क मनइयन फुन सिकाइत करब सुरू किहेन। मनइयन कहेन, “हम पचे गोस खाइ चाहित ह। 5हम पचे मछरी क याद करित ह जउन हम मिस्र में खावा ह। उ मछरियन क कउनो दाम नाहीं देइ क पड़त रहा। हम पचन क लगे ढेर क भाजी रहिन जइसे ककरियन, खरबूजा, चीव (एक किसिम क पियाज), पियाज अउ लहसुन। 6मुला अब हम ताकत खोइ चुका अही। इ मन्ना क छोड़िके खाइ बरे हम कछू नाहीं लखइ सकत ह।” 7(मन्ना धन्ना बिया क नाई रहा अउ पेड़ क गोदं क नाई देखात रहा। 8लोग ऐंका बटोरत रहेन अउ तब एक पीसिके आटा बनवत रहेन। या उ पचे ऐंका खूँदइ बरे चक्की बइपरतेन, ऐंका बासन में पकउतेन या ऐंकर केक बनावत रहेन। “केक” क स्वाद जैतून क तेल स पकी भइ रोटी क तरह रहा। 9हर रात क भुईया ओस स गीली होइ जात तउ मन्ना जमीने प टपकत रहा।

10मूसा हर एक परिवार क मनइयन क आपन आपन तम्बू क दुआरे प खड़ा भएन सिकाइत करत सुनेस। यहोवा बहोत कोहाइ गवा। ऐंसे मूसा बहोत हलाकान भवा। 11मूसा यहोवा स पूछेस, “यहोवा! आप आपन सेवक लोगन प इ मुसीबत

काहे डया ह। मई का गलती किहेउँ ह? मई तोहका नाखुस करइ का किहे उँ ह? तू मोहे प इ सबहिं मनइयन क जिम्मेदारी काहे ओढ़ाया ह? 12तू जानत ह कि मई इ सबहिं मनइयन क बाप नाहीं अहउँ। तू जानत ह कि मई ऐंका नाहीं पइदा किहेउँ ह। मुला मोका ऐंकाइ फिकिर करइ चाही जइसे धाई गदेली क कोरा मँ लइ चलत ह। तू हमका अइसा करइ क काहे मजबूर करत ह? तू मोका काहे जबरियावत ह कि मई ऐंका उ देस क लइ चलउँ जेका देइ क बचन ओनके पुरखन क तू दिहा ह। 13मोरे लगे इ मनइयन बरे जियादा गोस नाहीं अहइ। मुला उ पचे लगातार मोसे सिकाइत करत अहइ। उ सबइ कहत हीं, 'हमका खाइके गोस द्या।' 14मई अकेल्ला इ सब मनइयन क देख-भाल नाहीं कइ सक्ति। इ मोरे बरे भारी बोझा अहइ। 15जदि आप ओनके कस्ट क मोका देइ क काम चलावत रहइ चाहत हीं तउ आप मोका अबहिं मारि डवइ। जदि आप मोका सेवक मानत हीं तउ अबहिं मोका मरि जाइ देई। तब मोर सबहिं कस्ट खतम होइ जइहीं।"

16यहोवा मूसा स कहेस, "मोरे लगे इस्राएल क सत्तर बुजुर्गन लइ आवा जउन मनइयन क अफसर अउ पुरनिया होई। ऐंका मिलापवाला तम्बू मँ लिआवा। हुवाँ ओनाका आपन संग खड़ा करा। 17तब मई आउब अउ तोहसे बात करब। अब तोह प आतिमा आइ बा। मुला मई ओनका भी उ आतिमा देब। तब उ पचे मनइयन क देख भाल करइ मँ मदद करिहीं। इ तरह तोहका इ मनइयन बरे अकेले बोझा नाहीं उठाइ क होइ।"

18"मनइयन स कहा, "भियान खातिर आपन क तइयार करा। भियान तू पचे गोस खाब्या। यहोवा सुनेस ह जबहिं तू सबइ रोया अउ चीख्या ह। यहोवा तू पचन क बातन सुनेस ह जब तू मनइयन स कह्या, 'हमका खाइ बरे गोस द्या। हम पचन क इ मिस्त्र मँ नीक रहा।' तउ यहोवा अब तू पचन क गोस देइ। अउर तू पचे ओका खाब्या। 19तू पचे सिरिफ ओका एक दिन नाहीं, दुइ, पाँच, दस या बीस दिन भी खाइ सकब्या। 20तू पचे उ माँस महीना भर खाब्या। तू पचे उ गोस तब तलक खाब्या जब तलक ओसे ऊब न जाब्या। इ होइ, काहे की तू पचे यहोवा क खिलाफ सिकाइत किहा ह। यहोवा तू मनइयन मँ घूमत ह अउ तोहार जरुरत क समझत ह। मुला तू पचे ओकरे अगवा रोया, चिचियाया अउ ओराहना दिहा। तू मनइयन स कहा, 'हम पचे आखिर मिस्त्र काहे छोड़ि दीन्ह?'"

21मूसा कहेस, "यहोवा! हिआँ 6,00,000 मनसेधू साथ चलत अहइ। अउर तू कहत ह, मई ओनका पूरा महीना भइ खाइके गोस देब।" 22जदि हमका सबहिं भेड़ी अउ गोरु मारइ क होइ तउ भी ऐंते बड़े तावद मँ मनइयन क महीना भर खाइके भरपूर न होइ। अउर जदि हम समुदर क सारी मछरियन क धइ लेइ तउ भी ओनके बरे पूर्ति न होइ।" 23मुला यहोवा मूसा स कहेस, "यहोवा क सक्ती क जिन समेटा। तू देखब्या कि जदि मई कहत हउँ कि मई कछू करब तउ मई ओका कइ सकत हउँ।"

24एह बरे मूसा मनइयन स बतियाइ बाहेर गवा। मूसा ओनका उहइ बताएस जउन यहोवा कहे रहा। तब मूसा

सत्तर बुजुर्ग क बटोरेस। मूसा ओनसे पक्तर तम्बू क चारिहूँ कइती खड़ा होइके कहेस। 25तब यहोवा एक बादर मँ उतरा अउ उ मूसा स बात कहेस। आतिमा मूसा प सवार रही। यहोवा उहइ आतिमा क सत्तर बुजुर्गन लोगन प डाल दिहस। जब ओन सबन मँ आतिमा आइ तउ उ पचे भविस्सबाणी करइ लागेन। मुला ओकर बाद उ पचे अइसा अउर कभी नाहीं किहस।

26सत्तर बुजुर्गन मँ स दुइ ठु, एल्दाद अउ मेदाद तम्बू मँ स बाहेर नाहीं गएन। ओनकइ नाउँ बुजुर्गन क सूची मँ रहा मुला उ पचे सिबिर मँ रहेन। मुला परम आतिमा ओन पइ भी आइ अउ उ पचे सिबिर मँ भविस्सबानी करइ लागेन। 27एक ठु जवान दउड़ा अउ मूसा क सूचना दिहस। उ मनई कहेस, "एल्दाद अउ मेदाद सिबिर मँ भविस्सबाणी करत अहइ।"

28नून क पूत यहोसू मूसा स कहेस, "मूसा, तोहका ओनका रोकइ चाही।" (यहोसू मूसा क सहायक तब स रहा जब उ किसोर रहा।)

29मुला मूसा जवाब दिहस, "का तू मोह बरे जलन करत अहइ? मई चाहत हउँ कि यहोवा क सब लोग भविस्सबाणी करइ क जोगग होइ जाई। मई चाहत हउँ कि यहोवा आपन आतिमा ओन सबहिं प पठवइ।" 30तब मूसा अउ इस्राएल क नेता सिबिर मँ लउटि गएन।

### बटेन् आइन

31तबहिं यहोवा समुदर कइती स आँधी चलाएस। आँधी उ पहँटा मँ बटेरन क पठाएस। बटेरन सिबिर क चारिहूँ कइती उड़इ लागिन। हुआँ ऐंता बटेरन रहिन कि भुइँया ढँकि गइ। भुइँया प बटेरन क तीन फुट गहरी परत जमा होइ गइ। कउनो मनई एक दिन मँ ओतनी दूर जाइ सकत रहा जेतती दूर तलक चारिहूँ कइती बटेर रहिन। 32मनई अहदंकेन अउ बाहेर आएन। उ पचे सारा दिन अउ सारी रात बटेरन क बटोरेन। अउर फिन अगला दिन भी उ सबइ बटेरन क बटोरेन। हर मिला कम स कम साठ बुसल या ओसे जियादा बटेरन बटोरेस। तब मनइयन बटेरन क आपन सिबिर क चारिहूँ कइती धूप मँ फइलाएन।

33मनइयन गोस खाब सुरु किहन, मुला यहोवा कोहाइ गवा। जब गोस ओनके मुँहना मँ रहा अउ ऐंकरे पहिले कि मनइयन लील लेई यहोवा ओनका बहोत बेराम कइ दिहस। ढेर लोगन हुवई मरि बिलाइ गएन अउर ओनका माटी दइ दीन्ह गइ। 34एह बरे मनइयन उ ठउरे क नाउँ किब्रोथ-हतावा राखेन। उ पचे उ ठउर क उहइ नाउँ दिहेन। इ उहइ जगह बाटइ जहाँ उ पचे मनइयन क माटी दिहेन जउ स्वाद क भोजन क गहरी इच्छा धरत रहेन।

35मनइयन किब्रोथ-हतावा स हंसेरोत क जात्रा किहेनन अउ हुवई ठहरि गएन।

### मिरियम अउ हारून मूसा क सिकाइत करत हीं

12 मिरियम अउ हारून मूसा क खिलाफ बकइ लागीं। उ पचे ओकर अंगुस्तनुमाइ किहेन काहे की ओकर मेहरारु इथियोपिया क रही। उ पचे बिचारेन कि मूसा क इ

नीक नाहीं कि इथियोपिया क मेहरारु स बियाह करइ। 2उ पचे आपुस में कहेन, “यहोवा मनइयन स बात करइ मूसा क बीच में डाए बा। मुला सिरिफ मूसा ही नाहीं। यहोवा हम पचन क जरिये भी कहेस ह।” यहोवा एका अनकेस। 3(मूसा एक बहोतइ विनम्र मनई रहा। उ न तु डींग हॉकत रहा अउर न सेखी बघारत रहा। उ धरती पइ के कउनो मनइयन स जियादा विनम्र रहा। 4एह बरे यहोवा एकाएक आवा अउ मूसा, हारून अउ मिरियम स बोला। यहोवा कहेस, “तू तीनहुँ अब मिलापवाला तम्बू में आवा!”

एह बरे मूसा, हारून अउ मिरियम तम्बू में गएन। 5यहोवा तम्बू क दुआर प खड़ा भवा। यहोवा हारून अउ मरियन क आपन लगे आवइ क कहेस। जब दुइनउँ ओनके निअरे आएन तउ 6परमेस्सर कहेस, “मोरउ सुना! अगर तोहरे बीच एक नबी अहइ, तउ मई, परमेस्सर खुद ओह पइ परगट होब या ओकर संग सपना में बात करब्या। 7मुला मूसा दूसर तरह क अहइ। मूसा मोर बिस्सासी दास अहइ। ओका मोरे पूरा घराना क जिम्मेदारी सोंपा गवा ह। 8जब मई ओसे बात करत हउँ तउ मई ओकरे अमन्वा समन्वा बतियात हउँ। मई छिपा भवा अरथ क कहतूत क ओकरे संग नाहीं बइपरत। मई ओका सफ साफ बातन क बतावत हउँ जउन मई ओसे जानइ चाहत हउँ। अउ मूसा यहोवा क सरूप क साफ साफ निहारि सकत ह। तउ काहे तू पचे मोर दास मूसा क खिलाफ बोलइ क हिम्मत किहा ह?”

9यहोवा ओन पइ कोहाइ गवा। यहोवा ओनका तजि दिहस। 10बादर तम्बू स उठा। हारून पाछे घूमा अउ मिरियम क लखेस। ओकर बदन क चाम कोढ़, सफेद बरफ क नाई होइ गइ। ओका भयानक चर्म रोग होइ गवा।

11तबहिं हारून मूसा स कहेस, “महोदय! कृपा कइके छिमा करा जउन मूरखपना क पाप हम पचे किहे अही।” 12ओकरी चमड़ी क रंग उ तरह न उड़ि जाइ देई जइसे मरा भवा लरिका क होत ह। (कबहुँ कबहुँ इ तरह क गदेली अधगला चमड़ी क साथ पइदा होइ जात ह।)

13एह बरे मूसा यहोवा स परार्थना किहेस, “परमेस्सर मेहरबानी कइके इ बीमारी स ओका नीक करा।” 14यहोवा मूसा क उत्तर दिहेस, “जदि ओकर बाप ओकरे चेहरा प थूक देइ तउ उ सात दिना तलक लजाई रही। एह बरे ओका सात दिना तलक सिबिर स बाहेर राखा। उ टेमें क पाछे इ वापस लउट सकत ह।”

15एह बरे उ पचे मिरियम क सात दिना तलक बरे बाहेर लइ गएन। तब तलक लोगन हुवाँ स नाहीं चलेंन जब तलक उ फुन वापस नाहीं लाइ गइ। 16ओकरे पाछे मनइयन हसेरथ क तजेन अउ उ सबइ पारान रेगिस्तान क जात्रा किहन। मनइयन उ रेगिस्तान में सिबिर डाएन।

### खुफिया कनान क गएन

**13** यहोवा मूसा स कहेस, 2“कछू मनइयन क कनान देस क बारे में गहराइ स जानइ बरे पठवा। इ उहइ देस अहइ जेका मई इस्राएल क मनइयन क देब। हर एक बारहु परिवार समूहन स एक नेता पठवा।”

3एह बरे मूसा यहोवा क हुकुम मानेस। उ पारान क रेगिस्तान स नेता लोगन क पठाएस। 4इ सबइ ओनकइ नाउँ अहई:

जककूर क पूत सम्मू-रूबेन परिवार समूह स।

5होरी क पूत सापात - सिमोन क परिवार समूह स।

6योपुन्ने क पूत कालेब - यहूदा क परिवार समूह स।

7योसेप क पूत यिगास - इस्राकार क परिवार समूह स।

8नून क पूत होसे - एप्रैम क परिवार समूह स।

9रापू क पूत पलती - बिन्यामीन क परिवार समूह स।

10सोदी क पूत गद्दीएल - जबलून क परिवार समूह स।

11सूसी क पूत गद्दी - यूसुफ क (जउन मनस्से स) परिवार समूह स।

12गमल्ली क पूत अम्मीएल - दान क परिवार समूह स।

13मीकाएल क पूत सतूर - आसेर क परिवार समूह स।

14वोप्सी क पूत नहूबी - नप्ताली परिवार समूह स।

15माकी क पूत गूएल - गाद क परिवार समूह स।

16उ नाउँ ओन मनइयन क अहई जेनका मूसा पहँटा क लखइ अउ जाँच करइ बरे पठाएस। (मूसा नून क पूत होसे क दूसर नाउँ स पुकारेस। मूसा ओका यहोसू कहेस।)

17मूसा जब ओनका कनान क खोज-बीन बरे पठावत रहा, तब उ कहेस, “नेगेव स होइके जा तब पहाड़ी देस में जाब्या 18इ लखा कि भूइयाँ कइसा अहइ अउर तब तू उ मनइ क बारे जानकारी ल्या जउन हुमाँ रहत हीं। उ पचे सक्तीवाला अहई या कमजोर बाटेन। उ पचे तनिक अहई या जियादा तदाद में बाटेन? 19उ पहँटा क बारे में जानकारी ल्या जेहमाँ उ पचे रहत हीं। का उ नीक प्रदेस अहइ या बुरा? कउने तरह क सहर में उ पचे रहत हीं? का उ नगरन क चहरदेवार बाटेन? क एन गाँव क देवारन नाहीं अहइ? 20प्रदेस क बारे में अउर जानकारी ल्या। का भुइयाँ उपज बरे नीक बाटइ या बंजर जमीन अहइ? का धरती प बृच्छ उगा बाटेन? साहसी बना अउ उ धरती स कछू फल लइ आवा।” (इ अंगूर क पहली फसल क टेम होइ।)

21तब उ पचे पहँटा क छान-बीन किहेन। उ पचे जिन नाउँ क रेगिस्तान स रहोब अउ लेबो हमात तलक गएन। 22उ पचे नेगव स होइके तब तलक जात्रा करत रहेन जब तलक उ पचे हेब्रोन नगर पहुँच गएन। (हेब्रोन मिस्र में सोअन नगर क बसइ क सात बरिस पहिले बना रहा।) अहीमन, सेसै अउ तल्मै हुवाँ रहत रहेन। इ सबइ अनाक क सन्तान रहेन। 23तब उ पचे एस्कोल क घाटी में गएन। उ सबइ हुवाँ अंगूरे क बेल काटेन। उ साखा में अंगूर क

गुच्छ रहा। मनइयन में स दुइ मनई आपन बीच एक डंडा प धइके ओका लइ आएन। उ पचे कछू अनार अउ अंजीर भी लइ आएन। 24उ ठउरे क नाउँ एस्कोल क घाटी रहा। काहेकी इ उहइ ठउर अहइ जहाँ इस्त्राएल क मनइयन अंगूरे क गुच्छ काटेन।

25उ मनइयन उ पहुँटा क छानबीन चालीस दिन तलक किहेन। तब उ पचे सिबिर क लउटेन। 26उ पचे मूसा, हारून अउ दूसर इस्त्राएल क लोगन क लगे कादेस में लउटि गएन। इ पारान रेगिस्तान में रहा। तब उ पचे मूसा, हारून अउ सबहिँ मनइयन क, जउन कछू लखेन, सब कछू सुनाएन। अउर उ पचे ओनका उ प्रदेस क फल क देखाएन। 27उ पचे मूसा स इ कहेन, “हम पचे उ पहुँटा में गए जहाँ आप हमका पठएन। उ प्रदेस बहोत नीक बाटइहिँ दूध अउ मधु क नदी बहत हीं। इ सबइ उ कछू फल अहइँ जेका हम पचे हुआँ पावा ह। 28मुला हुवाँ जउन मनइयन रहत हीं उ पचे बहोतइ सक्तीवाला अउ मजबूत बाटेन। ओनकइ सहर क मजबूती स रच्छा कीन्ह ग अहइ। हम पचे हुवाँ अनाक बंसी मनइयन क लखा। 29अमालेकी लोग नेगेव में रहत हीं। हिन्ती, यबूसी अउ एमोरी पहाड़ी प्रदेस में रहत हीं। कनानी लोग समुदर क किनारे अउ यरदन नदिया क तीरे रहत हीं।”

30तब कालेब मूसा क नचिके मनइयन क सान्त होइके कहेस। कालेब कहेस, “हम पचन क हुवाँ जाइ चाही अउ उ प्रदेस क आपन बरे लेइ चाही। हम पचे उ प्रदेस क आसानी स लइ सकित हीं।”

31मुला जउन मनई ओकरे संग गवा उ बोला, “हम पचे उ मनइयन क खिलाफ नाहीं लड़ि सकित। उ पचे हम लोगन स जियादा सक्तीसाली अहइँ।” 32अउर उ मनइयन सबहिँ इस्त्राएली लोगन स कहेन कि उ पहुँटा क लोगन क हरावइ बरे उ पचे जियादा ताकतवर नाहीं रहेन। उ पचे कहेन, “जउने पहुँटा क हम पचे लखा उ ताकतवर मनइयन स भरा बाटइ। उ पचे ऐतना जियादा सक्तीवाला अहइँ कि जउन कउनो मनई हुवाँ जाइ ओका आसनी स हराइ सकत हीं। 33हम सबइ हुवाँ देत्य नेपीलियन लोगन क लखा। (अनाक सन्तानन नपीली लोगन में स अहइ।) उ पचे हम पचन क लखेन जइसे हम पचे टिड्डा रहेन। हाँ हम पचे झींगुर क नाई ओनकइ बरे रहे।”

### लोग फुन सिकाइत करत हीं

**14** उ रात सिबिर क सब मनइयन जोर स रोउब सुरु किहन। 2इस्त्राएल क सबहिँ लोग हारून अउ मूसा क खिलाफ फुन सिकाइत किहन। सब मनइयन एक संग आएन अउ मूसा अउ हारून स कहेन, “हम पचन क मिस्त्र या रेगिस्तान में मरि जाइ चाही रहा। आपन इ नवा देस में तरिवारि स मरि जाइ क बजाय इ बहोतइ नीक भवा होत। 3का यहोवा हम पचन क इ नवा प्रदेस में मरइ बरे लइ आएन? हमरी मेहररुअन अउ हमरे गदेलन क हम पचन स छीन लइ लीन्ह जाइ अउ हम तरिवारे स मारि डवा जाब। इ हम पचन बरे नीक होइ कि हम पचे मिस्त्र क लउटि जाइ।”

4तब मनइयन एक दूसर स कहेन, “हम पचन क दूसर नेता चुनइ चाही अउ मिस्त्र लउटि चलइ चाही।”

5मूसा अउ हारून हुवाँ बटुरा भवा सारे इस्त्राएली मनइयन क समन्वा भुइयोँ प गिरि गएन। 6अउर उ दुइनउँ मनई जउन नवा पहुँटा का छानबीन करइ बरे गए रहेन आपन ओढ़ना क सोक परगट करइ बरे फाइ दिहस। (उ पचे दुइनउँ नून क पूत यहोसू अउ यपुन्ने क पूत कालेब रहेन।) 7इ दुइनउँ हुवाँ बटुरा भाए इस्त्राएलियन स कहेन, “जउने पहुँटा क हम पचे लखे अही, उ बहोतइ नीक बाटइ। 8अउर यदि यहोवा हम पचन स खुस अहइ तउ उ हम पचन क उ पहुँटा में लइ चली। उ पहुँटा नीक अउ उपजाउ अहइ, अइसा बाटइ जइसन हुवाँ दूध अउ मधु क नदी बहत होइँ। अउर यहोवा उ पहुँटा क हम पचन क देइ बरे आपन सक्ती क बइपरी। 9मुला हम पचन क यहोवा क खिलाफ नाहीं जाइ चाही। हम पचन क उ पहुँटा क लोगन स नाहीं सिबिरइ चाही। हम पचे ओनका आसानी स हराइ देब। ओनके लगे कछू सुरच्छा नाहीं अहइ, ओनका सुरच्छित राखइ बरे ओनके लगे कछू नाहीं अहइ। मुला हम पचन क संग यहोवा अहइ। एह बरे इ मनइयन स जिन सिबिरअ।”

10तब इस्त्राएल क सबहिँ लोग यहोसू अउ कालेब क पाथर मारि देइ क बात करइ लागेन। मुला यहोवा क तेज मिलापवाला तम्बू प आवा। इस्त्राएल क सबहिँ लोग ऐका लखि सकत रहेन। 11यहोवा मूसा स कहेस, “इ पचे इ तरह मोका घिना स लखत रइहीं? उ पचे परगट करत रहेन कि उ पचे मोह पइ बिस्सास नाहीं करतेन। उ सबइ परगट करत हीं कि ओनकइ मोहे प बिस्सास नाहीं अहइ अउर उ पचे देखोवत हीं कि उ पचे मोरी सक्ती प बिस्सास नाहीं करतेन। उ सबइ मोहे प बिस्सास करइ स तब भी मना कइ देत हीं जबहि मई ओनका बहोत स सक्तिसाली संकेत दिहेउँ ह। मई ओनके बीच कइ बड़की चीजन किहेउँ ह। 12मई ओनका नास एक महामारी स करब अउ मई ओका बेदखल कइ देब, अउ तोहार प्रयोग दूसर रास्ट्र बनवइ बरे करब। अउर तोहार रास्ट्र इ सब लोग स बड़ा अउ जियादा ताकतवर होइ।”

13तब मूसा यहोवा स कहेस, “जदि आप अइसा करत हीं तउ मिस्त्र में लोग इ सुनिहीं कि आपन सबहिँ मनइयन क मारि डएन। आप आपन बड़की सक्ती स प्रयोग ओन मनइयन क मिस्त्र स बाहेर लइ आवइ में किहन। 14अउर मिस्त्र क लोग इ भूइँया (कनान) में रहइवालन स तोहार महान सक्ती क बारे में कइहीं। हे यहोवा! उ पचे पहिले स सुनि लिहेन कि। तू ऐन लोगन (इस्त्राएलियन) क परमेस्सर अहइ। उ पचे सबइ जानत ह कि तू प्रत्येच्छ रूप स आपन लोगन क समन्वा परगट भवा। उ पचे तोहरे बादर क बारे में जानत ह जउन उ पचनक ऊपर ठहरत ह। तू उ बादर क प्रयोग दिन में ओन लोगन क राह दिखावइ बरे किहा अउर राति में उ बादर लोगन क राह दिखावइ बरे आगी में बदल जात रहा। 15एह बरे आप क अब मनइयन क मारइ नाहीं चाही। जदि आप ओनका मारत हीं तउ सबहिँ रास्ट्र, जउन आपक सक्ती क बारे में सुनि चुका अहइँ, कइहीं, 16यहोवा इ मनइयन क उ पहुँटा में लइ जाइ में समर्थ नाहीं रहेन

जउने पहुँटा क उ पचे ओनका देइ क बचन दिहे रहैन। एह बरे यहोवा ओनका मरु भूमि में मारि दिहन।

17“एह बरे सुआमी आपन सामर्थ देखावा! देखावा वइसा ही जइसा देखेवइ क कहे रह्या! 18तू कहे रहा, ‘यहोवा कोहाइ में धीरा करत हीं। यहोवा पिरेम स भरपूर अहई। यहोवा पाप क छिमा करत हीं अउर ओन मनइयन क छिमा करत हीं जउन ओनके खिलाफ भी होइ जात हीं। मुला यहोवा ओन मनइयन क जरुर सजा देइहीं जउन अपराधी अहई। यहोवा पूत, पूतन अउ ओकर पूतहू क भी सजा देत हीं।’ 19एह बरे इ मनइयन क आपन बड़का पिरेम देखावा। ओनके पाप क छिमा करा। ओनका उहइ तरह छिमा करा जइसा तू मिस्र छोड़इ क टेमें स अब तलक छिमा करत आवत ह।”

20यहोवा उत्तर दिहस, “मई मनइयन क तोहरे कहे क मुताबिक छिमा कइ दीन्ह ह। 21मुला मई तोहसे फुरइ कहत हउँ काहे की मई जब तलक रहबूँ अउ मोर महिमा इ धरती प फइली अहइ। एह बरे मई तोहका इ बचन देत हउँ। 22उ मनइयन में स कउनो भी मनई जेका मई मिस्र स बाहेर लइ आएँ, उ पचे कनान क भूइया क कबहुँ नाहीं क लखिहीं। उ मनइयन मिस्र में मोर तेज अउ मोर संकेत क लखेन ह। अउर उ मनइयन उ महान कारज क निहारेन ह जउन मई रेगिस्तान में कीन्ह ह। मुला उ पचे मोर आग्या क नाहीं मानेन अउर दसहु बार मोर परीच्छा किहेन ह। 23मई ओनके पुरखन क बचन दिहेउँ ह। मई प्रण किहेउँ रहा कि ओनका एक बड़का देस देब। मुला ओहमा स कउनो मनई जउन मोरे खिलाफ होइ चुका ह उ देस में घुस न पाइ। 24मुला मोर सेवक कालेब एने स अलग रहा। उ पूरी तरह मोर बात मानत रहा। एह बरे मई ओका उ देस में लइ जब जेका उ पहिले लखेस ह। अउ ओकर सत्तानन भी उ पहुँटा क उत्तराधिकार होइ जाब। 25अमालेकियन अउ कनानी लोग घाटी में रहत अहई। भियान इ जगहिया क तज़ा अउ रेगिस्तान कइँती लउटि जा। लाल सागर स होइके जा।”

### यहोवा मनइयन क सजा देत हीं

26यहोवा मूसा अउ हारून स कहेस, 27“इ पचे कब तलक मोरे खिलाफ सिकाइत करत रहईं? मई इ मनइयन क ओराहना अउ पीरा क सुन चुकेउँ ह। 28एह बरे एनसे कहा, ‘यहोवा कहत ह उ फुरइ ही सबहि काम करी जेकरे बारे में तू पचे सिकाइत किहा ह। 29तू मनइयन क इ सब होइ। तू मनइयन क देह इ रेगिस्तान में मरा भवा गिरिहीं। हर एक मनई जउन बीस बरिस या जियादा उमर क रहा। हमार मनइयन क निअंबर क रूप में गना गवा। अउर तू पचन में स हर कउनो मोरे यानी परमेस्सर क खिलाफ सिकाइत किहस। एह बरे तू मनइयन में स हर एक रेगिस्तान में मरी। 30तू पचन में स कउनो भी कबहुँ उ देस में नाहीं घुसी जेका मई तोहका देइ क बचन दिहेउँ ह। सिरिफ युपुन्ने क पूत कालेब अउ नून क पूत यहोसू उ देस में प्रवेस करिहीं। 31तू पचे सिबिरइ गए रह्या अउ तू पचे ओराहना दिहा कि उ नवा देस में तोहार दुस्मनन तोहरे गदेलन क तोहसे छिन लेइहीं। मुला मई तोहसे कहत हउँ कि मई ओन

गदेलन क देस में लइ जाब। उ पचे उ चीजन क भोग करिहीं जेनकइ भोग तू अंगीकार नाहीं किहा। 32जहाँ तलक तू पचन क बात बा, तू पचे इ रेगिस्ताने में मरि बिलाइ जाब्या।

33“तोहार बेटवन हिआँ रेगिस्तान में चालीस बरिस तलक गड़ेरिया क रूप में आपन जिन्नगी बिताइ। उ पचे तोहार अबिस्सासी क कारण कस्ट झेलब। उ पचे इ रेगिस्तान में तब तलक कस्ट झेलिहीं जब तलक तू सबहि मरि नाहीं जाब्या। 34तू पचे आपन पाप बरे चालीस बरिस तलक कस्ट झेलब्या। (तू पचे इ देस क छानबीन में चालीस दिन लगाया। ओकरे हर दिन बरे एक बरिस होइ।) तू पचे जनब्या कि हमार तू पचन क खिलाफ होब केतँना खतरनाक अहइ।

35“मई यहोवा अहउँ अउर मई इ घोसना करत हउँ। अउर मई बचन देत हउँ कि मई इ सबहि बुरे मनइयन बरे इ करब। इ पचे मोरे खिलाफ एक संग आएन। एह बरे उ सबइ इ रेगिस्तान में मरिहीं।”

36जउन मनइयन क मूसा नवा प्रदेस क छान-बीन करइ पठाएस ह उ पचे अइसा रहेन जउन लउटि आएन अउर सबहि इस्त्राएलियन में सिकाइत करत भए सँचर गएन। उ मनइयन कहेन कि मनई उ प्रदेस में प्रवेस करइ खातिर जियादा बरिआर नाहीं रहेन। 37उ मनइयन उ भूइयाँ क बारे में बुरी खबर लइहीं। एह बरे यहोवा एक बेरामी पइदा कइके ओन सबहि क मरि बिलाइ जाइ दिहस। 38मुला नून क पूत यहोसू अउ युपुन्ने क पूत कालेब ओन मनइयन में रहेन जेनका देस क छानबीन करइ पठवा गवा रहा। अउर यहोवा ओन दुइनउँ मनइयन क बचाएस। ओनका उ बेरामी नाहीं भइ जउन दूसर मनइयन क मारि डाएस।

### मनइयन कनान में जाइके जतन करत हीं।

39मूसा इ सबइ बातन इस्त्राएल क मनइयन स कहेस। लोग बहोत जियादा दुखी भएन। 40दूसर दिन बहोतइ तइके मनइयन ऊँचा पहाड़ी पहुँटा कइँती बढब सुरु किहेन। मनइयन कहेन, “हम पचे पाप किहे अहेन। हम पचन क दुःख अहइ कि हम पचे यहोवा प बिस्सास नाहीं किहेन ह। हम पचे उ ठउरे प जाब जेका यहोवा देइ क बचन दिहे अहइ।”

41मुला मूसा कहेस, “तू पचे यहोवा क हुकुम क काहे नाहीं मानत अहा? तू पचे कामयाब न होइ सकब्या। 42उ देस में जिन जा। यहोवा तू पचन क संग नाहीं अहइ। तू पचे आसनी स आपन दुस्मनन स हारि जाब्या। 43अमालेकी अउ कनानी लोग हुवाँ तोहरे खिलाफ लड़ीहीं। तू पचे यहोवा स खिलाफत किहा ह। एह बरे उ तोहरे संग न होइ जब तू पचे ओनसे लइब्या। अउर तू सबहि लइइ में मारा जाब्या।”

44मुला मनइयन मूसा प बिस्सास नाहीं किहेन। उ पचे ऊँची पहाड़ी कइँती गएन। मुला मूसा अउ यहोवा क करार क सन्दूख मनइयन क संग नाहीं गएन। 45तब अमालेकी अउ कनानी लोग जउन पहाड़ी देस में रहत रहेन, आएन अउ उ पचे इस्त्राएलियन प हमला बोलि दिहन। अमालेकी अउ कनानी लोग ओनका आसनी स हराइ दिहन अउ होर्मा तलक ओनका खदेरेन।

## बलि क नेम

**15** यहोवा मूसा स कहेस, **2**“इस्त्राएल क मनइयन स बात करा अउ ओनसे कहा: मई तू पचन क इ धरती घर क रूप में देत अहई। जब तू उ देस में घुसब्या, **3**जब तू परमेस्सर क होमबलि चाहे उ गइयन, भेड़िन अउ बोकरीयन होइ क होमबलि क रूप में बलि क रूप में, मनौती भेंट क रूप में, बचनबलि क रूप में, मेलबलि क रूप में या खास पवितर क रूप में चढ़ाउब्या तउ इ परमेस्सर बरे एक सुहावना सुगन्धित अहइ।

**4**“अउर उ टेमें जउन आपन भेंट लइ आइ ओका यहोवा क अन्नबलि देइ क होइ। इ अन्नबलि एक चौथाई हीन जइतून क तेले में सनी भइ एपा क दसवाँ हीसा बढ़िया आटा क होइ। **5**हर दाई जब तू एक तु मेमना होमबलि क रूप में या बलिदान क रूप में द्या तउ तोहका एक चौथाई हीन दाखरस पयेबलि क रूप में तइयार करइ चाही।

**6**“हर समइ जब तू भेड़ा क भेंट करइहीं तउ तोहका अन्नबलि क रूप में एक तिहाई हीन जइतून क तेले में सनी भइ एपा क दुइ दसवाँ हीसा बढ़िया आटा क जरूर भेंट करइ चाही। **7**अउर तोहका एक तिहाई हीन पेयबलि जरूर चढ़ावइ चाही। एनका परमेस्सर क भेंट करा। इ परमेस्सर बरे सुहावना सुगन्ध अहइ।

**8**“होमबलि, मेलबलि या कउनो मन्त बरे यहोवा क एक भेंट क रूप में एक बछवा तइयार कइ सकत ह। **9**एह बरे तोहका बर्धा क संग अन्नबलि भी लइ आवइ चाही। अन्नबलि आधा हीन जइतून क तेले स सनी भइ एपा क तीन दसवाँ हीसा बढ़िया आटा क होइ चाही। **10**आधा हीन दाखरस भी पयेबलि क रूप में लइ आवा। आगी में बारी गइ इ भेंट परमेस्सर बरे महकउआ सुगन्ध अहइ। **11**हर एक बछवा या भेड़ा या मेमना या बोकरी क बच्चा, जेका तू यहोवा क भेंट करा, उहइ तरह तइयार करइ चाही। **12**जनावरन क गन्ती क अनुसार तू परमेस्सर क भेंट करा, हर एक एकही तरीका स तइयार करा।

**13**“एह बरे इ तरीका स हर एक इस्त्राएली क होमबलि देइ चाही जेकर गंध परमेस्सर क प्रसन्न करी। **14**तोहरे बीच बिदेसी रहब। अगर उ पचे होमबलि देइ चाहत हीं तउ ओनका वइसे ही देइ चाही जइसे तू करत ह। ताकि इ परमेस्सर बरे सुहावना सुगन्ध होइ। **15**उहइ नेमें हर एक इस्त्राएली बरे होइ चाही अउ तोहरे बीच बसइया बिदेसी बरे भी होइ। इ नेमें हमेसा लागू रही। तू अउ तोहरे बीच बसइया मनइयन यहोवा क समन्वा बराबर होइहीं। **16**एकर अरथ अहइ कि तू सबन क एक ही कनून अउ नेमें क मानइ चाही। उ सबइ कनून अउ नेमें इस्त्राएल क परिवार में पइदा भए तोहरे अउ जउन तोहरे बीच रहत ही, ओनके बरे अहइ।”

**17**यहोवा मूसा स कहेस, **18**“इस्त्राएल क लोगन स इ कहा: मई तोहका दूसर देस में लइ जात हउं। **19**जब तू उ भोजन करब्या जउन उ पहेँटा में पइदा होइ तउ भोजन क कछू हीसा यहोवा क भेंट क रूप में द्या। **20**तू अनाजे क बटोरब्या अउ एँका आटा क रूप में पिसब्या। तू आटा क रोटी बनवइ बरे गुँधब्या। तू पहिला गुँधा भाव आटा स बना

रोटी परमेस्सर क अर्पित करब्या। उ अइसा अन्नबलि होइ जउन खरिहान स आवत ह। **21**इ नेमें सदा बरे बा। एकर अरथ अहइ कि जउन अन्न क तू आटा क रूप में गुँधत ह ओकर पहिली रोटी यहोवा क देइ चाही।

**22**“अगर तू यहोवा क जरिये मूसा की दीन्ह गवा आदेस में स कउनो क मानव भूलि जा तउ तू का करब्या? मूसा क जरिये दीन्ह गए यहोवा क इ हुकुम अहई। **23**इ आदेस उहइ दिन स सुरु होइ ग रहेन जउने दिन यहोवा एँका तोहका दिहेस ह। अउर इ आदेस भविस्स में भी लागू रइहीं। **24**जदि समुदाय अनजाने में कि उ पचे पाप करत हीं तउ सब जने मिलिके एक होमबलि बर्धा क परमेस्सर क चढ़ावइ। इ परमेस्सर बरे सुहावना सुगन्ध अहइ। बर्धा क बलि क संग परमेस्सर क हिदायत क अनुसार अन्नबलि अउर पयेबलि चढ़ा। तोहका एक तु बोकरा भी पापबलि क रूप में देइ चाही।

**25**“याजक क लोगन क पाप स सुद्धि बरे ओकर प्रायश्चित करइ चाही। उ इस्त्राएल क सब लोगन बरे अइसा करी। लोगन इ नाहीं जाने रहेन कि उ सबइ पाप करत बाटेन। मुला जब उ पचे इ जानेन तब उ पचे होमबलि अउ पापबलि लेइ बरे आएन। इ तरह मनइयन ओकर गलती बरे छिमा पाइ हीं। **26**इस्त्राएल क सब मनइयन अउ ओनके बीच रहइवाला सब लोग छिमा कइ दीन्ह जइहीं। उ पचे एह बरे छिमा कइ दीन्ह जइहीं कि उ सबइ नाहीं जानतेन कि उ पचे बुरा करत बाटेन।

**27**“मुला एक ठू मनई बिना इरादे स पाप करत ह तउ ओका एक बरिस एक तु मादा बोकरी पापबलि क रूप में आपन पाप बरे लावइ चाही। **28**याजक यहोवा क समन्वा पाप बरे जउन उ मनइ गलती स किहेस ह प्रायश्चित करी अउ उ मनई छिमा पाइ। **29**इ हर मनई बरे कनून अहइ जउन पाप करत ह, मुला जानत नाहीं कि बुरा किहेस ह। इहइ कनून इस्त्राएल क परिवार में पइदा भए मनइयन बरे अहइ या दूसर मनइयन बरे जउन तोहरे बीच रहत हीं।

**30**“मुला कउनो मनई जउन पाप करत ह अउ जानत ह कि उ बुरा करत ह। उ मनई क आपन लोगन स अलग पठइ देइ चाही। इ इस्त्राएल क परिवार में जन्मा मनई अउ कउनो भी दूसर मनई बरे, जउन तोहरे बीच रहत ह, एक समान बाटइ। **31**उ मनई यहोवा क हुकुम क खिलाफ गवा अहइ। उ यहोवा क हुकुम क तिस्सकार करइ। उ मनई क तोहरे दले स अलगाइ दीन्ह जाइ चाही। उ मनई अपराधी ही रही अउ सजा भोगी।”

## एक तु मनई अराम क दिन काम करत ह।

**32**इ टेमें इस्त्राएल क मनई अबहिं रेगिस्तान में रहेन। अइसा भवा कि एक मनई क बारइ बरे कछू काठ मिला। एह बरे उ मनई लकड़ी बटोरत रहा मुला उ सबित क दिन रहा। कछू दूसर मनई ओका इ करत लखेन। **33**जउन मनई ओका लकड़ी बटोरत करत देखेन। उ पचे ओका मूसा अउ हारून क लगे लइ आएन। अउर सबहिं लोग चारिहुँ कइँती बठुर गएन। **34**उ पचे उ मनई क हुवाँ रखेन काहे की उ पचे नाहीं जानत रहेन कि ओकर संग का करइ चाहीं।

35तब यहोवा मूसा स कहेस, “इ मनई क मरि जाइ चाही। पूरा धार्मिक सभा क ओका सिबिर स बाहेर लइ जाइ चाही अउर ओका पाथर स मार डवइ चाही।” 36एह बरे सबइ लोगन ओका सिबिर स बाहेर लइ गएन। उ ओका तब तलक पाथर मारेन जब तलक उ मरि नाहीं गवा। उ पचे इ वइसा ही किहेन जइसा मूसा क यहोवा हुकुम दिहे रहा।

### परमेस्सर नेमें क सुमिरइ में मनइयन क मदद करत ह

37यहोवा मूसा स कहेस, 38“इस्त्राएल क लोगन स बतियाअ अउ ओनसे इ कहा, “मई तू सबन क आपन हुकुम क सुमिरइ क देब। धागा क कइउ खण्ड क एक साथ बाँधा अउ ओनका आपन बस्तर क कोना प धइ दया। एक ठु नीला रंग क डोरा हर एक अइसे गुच्छा में नावा। अब एँका तू पहिरब्या अउ भविस्स क सबहिं दिनन में पहिरब्या। 39तू पचे इ गुच्छन क लखत रहब्या अउ यहोवा जउन हुकुम तोहका दिहे अहइ ओका सुमरत रहब्या। तब तू हुकुम क मनब्या। तू पचे हुकुम क न बिसरब्या। अउर आपन आँखिन अउ जरुरत स बस मैं आइके कउनो पाप न करब्या। 40तू हमरे सब हुकुम मानइ क सुमिरब्या। अउर तोहका तोहार परमेस्सर क अपर्ण कीन्ह जाइहीं। 41मई तोहार परमेस्सर यहोवा अहउँ। उ मई अहउँ जउन तोहका मिस्त्र स बाहेर लइ आएउँ ह। मई इ किहेउँ ह। एह बरे मई तोहार परमेस्सर रहब। मई तोहार परमेस्सर यहोवा अहउँ।”

### कोरह, दातान अउ अबीराम मूसा क खिलाफ होइ जात हीं

**16** कोरह, दातान, अबीराम अउ ओनें मूसा क खिलाफ होइ गएन। (कोरह यिसहार क पूत रहा। यिसहार कहात क पूत रहा। कहात लेवी क पूत रहा। एलीआब क पूत दातान अउ अबीराम भाई रहेन। अउर ओनें पेलेत क पूत रहा। दातान, अबीराम अउ ओन रूबेन क सन्तानन रहेन।) 2इ चार मनइयन इस्त्राएल क 250 मनइयन क एक संग बटोरिन अउर इ पचे मूसा क खिलाफ आएन। इ पचे नेता रहेन अउ जउन इस्त्राएलियन क जरिये चुना ग रहेन। सब मनइयन ओनका जानत रहेन। 3उ पचे एक ठु गुट क रूप में मूसा अउ हारून क खिलाफ बात करइ बरे आएन। इ मनइयन मूसा अउ हारून स कहेन, “हम लोगन क काबू करइ बन्द करा। इस्त्राएल क सब मनई पवितर अहईं। यहोवा ओनके संग अहइ। तू सबइ अपने आप क काहे परमेस्सर क (दूसर) मनइयन स जियादा महत्वपूर्ण मानत बाट्या?”

4जइसेन मूसा इ बात सुनेस तउ उ मुँहे क बले गिर गवा। 5तब मूसा कोरह अउ ओकरे मनवइयन स कहेस, “काल्ह भिन्सारे यहोवा देखईहीं कि कउन मनई फुरइ ओकर बाटइ। यहोवा देखईहीं कि कउन मनई फुरइ पवितर अहइ। अउर यहोवा ओका आपन निअरे लइ जइहीं। यहोवा उ मनई क चुनी अउ ओका आपन निचके लइ जाइ। 6एह बरे कोरह, तोहका अउ तोहरे सबहिं मनवइयन क इ करइ चाही। 7भियान कउनो खास अगियारी क गोरसी में आगी अउ धूप धरा अउ उ गोरसी क यहोवा क अगवा लिआंवा।

यहोवा उहइ मनई क चुनिहीं जउन फुरइ पवितर होइ। लेवी क पूतन रूका! तू का करइ क कोसिस करत अहा।”

8मूसा कोरह स इ भी कहेस, “लेवी बंसी लोगो! मोरहु सुना। 9तू पचन क खुस होइ चाही कि इस्त्राएल क परमेस्सर तोहका चुनेस ह अउ खास बनएस ह। तू पचे बाकी इस्त्राएलियन स अलग अहा। यहोवा तोहका आपन लगे बोलाएस ह कि तू यहोवा क आराधना में इस्त्राएल क मनइयन क खास मदद बरे यहोवा क पवितर तम्बू में खास काम कइ सका। का इ तोहका बरे काफी नाहीं बा? 10यहोवा तोहका अउ लेवी बंस क मनइयन क आपन निचके लइ आवा ह। मुला अब तू याजकन बनइ चाहत बाट्या। 11तू अउ तोहार मनवइयन एक अउट ग अहा अउ यहोवा क खिलाफ आवा अहा! का हारून कउनो बुरा किहे अहइ? नाही! तउ ओकरे खिलाफ काहे ओराहना देत अहा?”

12तब मूसा एलीआब क पूत दातान अउ अबीराम क बोलाएस। मुला दुइनउँ मनइयन कहेन, “हम पचे न आउब। 13तू हमका उ देस स निकारि लिआया ह जउन धनवाद रहा। जहाँ दूध अउ सहद क धारा बहत रहिन। तू हम पचन क हिआँ रेगिस्तान में मारइ बरे लिआया ह। का अब तू अपने आप क हम पइ राजकुमार बनबू चाहत अहइ? 14हम पचे तोहार पाछा काहे करी? तू हम पचन क नवा देस में नाहीं लइ आया ह- जउन भरपूर अहइ- जहाँ दूध अउ सहद की नदी बहत रहत हीं। तू हम पचन क उ देस नहीं दिए रहा जेका देइ क परमेस्सर बचन दिहे रहा। तू हम पचन क खेत या अंगूर क बगिया नाहीं दिहे रहा। का तू इ लोगन क आँखन क अंधा करब्या? नाहीं, हम पचे तोहार लगे न आउब।”

15एह बरे मूसा बहोतइ कोहाइ गवा। उ यहोवा स कहेस, “एँकइ भेंट जिन ल्या। मई एँसे कछू नाहीं लीन्ह-एक गदहा तलक नाहीं। मई इ मनइयन में स कउनो क बुरा नाहीं कीन्ह।”

16तब मूसा कोरह स कहेस, “तोहका अउ तोहरे मनवइयन क भियान यहोवा क समन्वा खड़ा होइ चाही। अउर हारून तोहरे संग यहोवा क समन्वा खड़ा होइ। 17तू सबन में स हर कउनो क एक ठु आग-दान रखइ चाही अउर ओहमा आगी अउ धूप होइ चाही अउर एका यहोवा क समन्वा चढ़ावइ चाही। इ सारी आगी क गोरसी 250 नेता लोगन क होइ चाही। तोहका अउर हारून क आपन गोरसी क संग हुवाँ रहइ चाही।”

18तउ हर एक मनई एक एक ठु आगी क गोरसी लिहेस अउ ओहमाँ सुलगन धूप धरेस। तब उ पचे मिलापवाला तम्बू क दुआरे खड़ा भएन। मूसा अउ हारून भी हुवाँ खड़ा भएन। 19कोरह आपन सबहिं लोगन क एक संग मिलापवाला तम्बू क दुआरे बटोरिस। तब यहोवा मौजूदगी सबइ जमा लोगन क दुआरा लखइ जाइ।

20यहोवा मूसा अउ हारून स कहेस, 21“इ मनइयन स दूर हटा। मई अब ओनकर नास करइ चाहत हउँ।”

22मुला मूसा अउ हारून भुइयँ प निहुरेन अउ चिचियानेन, “परमेस्सर! तू जानत ह कि मनइयन क सोचत हीं। तू सब प्राणी क आत्मा क परमेस्सर। का एक मनई क पाप क

कारण सारा किरोध मण्डली प होइ। एक मनई फुरइ पाप किहे अहइ।”

23तब यहोवा मूसा स कहेस, 24“मनइयन स कहा कि उ पचे कोरह, दातान अउ अबीराम क सिबिर स दूर हटि जाई।”

25मूसा खड़ा भवा अउ दातान अउ अबीराम क लगे गवा। इस्त्राएल क सबहि बुजुर्गन ओकरे पाछे चलेन। 26मूसा धार्मिक सभा स कहेस, “इ बुरा लोगन तम्बू स दूरि हटि जा। ऐनकइ चीज क जिन छुआ। यदि तू पचे छूब्या तउ ऐनके पापन क कारण बिलाइ जाब्या।”

27एह बरे मनइयन कोरह, दातान अउ अबीराम क तम्बू स दूर परानेन। दातान अउ अबीराम आपन तम्बू क बाहरे आपन मेहरारु, लरिकन अउ गदेलन क संग खड़ा रहेन।

28तब मूसा कहेस, “मई तोहका परमान देब कि यहोवा मोका ओन चीजन क करइ क पठए बाटइ जउन मई तोहका केहउँ ह। मई देखाउब कि उ सबइ मोर बिचार नाहीं रहेन। 29इ मनइयन हिआँ मरिहीं। मुला इ पचे साधारन रीति स मरत ह जउने तरह आदमी हमेसा मरत ह तउ इ परगट होइ कि यहोवा फुरे मोका नाहीं पठाएस। 30मुला यदि यहोवा ऐनका दूसर रीति स मरइ देत ह तउ तू पचे जनब्या कि इ मनइयन सचमुच यहोवा क खिलाफ पाप किहे अहई। इहइ प्रमाण बाटइ: भुइयाँ फाटि जाइ अउ इ मनइयन क डकार जाइ। उ सबइ आपन कब्रन मँ जिअत जइहीं। अउर ऐनकइ हर चीज ऐनके संग जाइ।”

31तब मूसा इ बातन क कहब खतम किहेस। मनइयन क गोड़े क तरे जमीन फाटि गइ। 32इ अइसा रहा कि मान ल्या धरती आपन मुँह बाएस अउ ऐनका खाइ लिहस अउ ओनके सारा परिवार अउ कोरह क सबहि मनइयन अउ ओनकइ सब चीजन धरती मँ चली गइन। 33उ पचे जिअत भ कब्र मँ चला गएन। ओनकइ हर एक चीज ओनके संग गइ। तब धरती ओनके ऊपर बन्द होइ गइ। उ पचे मर बिलाइ गएन अउ उ सबइ सभा स लोप हो गएन।

34इस्त्राएल क मनइयन नास कीन्ह जात मनइयन क रोउब चिचियाब सुनेन। एह बरे उ सबइ चारिहुँ कइँती दौड़ेन अउ कहइ लागेन, “धरती हम लोगन क लील जाइ।”

35तबइ यहोवा स आगी आइ अउ 250 मनइयन क, जउन धूप भेंट करत रहेन, माटी मँ मिलाइ दिहस।

36यहोवा मूसा स कहेस, 37-38“याजक हारून क पूत एलीआज़ार स कहा कि उ आगी क गोरसी क बटोरइ। सिबिर स दूर क पहँटा मँ ओस कोइला अउ राखी क छितरावइ क कहा। इ मनइयन मोरे खिलाफ पाप किहेन ह अउर ओनकइ पाप क दाम जिन्नगी खतम होइ गइ। मुला धूप क गोरसी अबहुँ पवितर बाटइ। इ गोरसियन पवितर अहई काहे की उ पचे यहोवा क दिहन ह। धूप गोरसी क पीटि पीटि के पत्तर मँ बदलि द्या। तब इ धातु क पत्तर क उपयोग वेदी क ढाँपि बरे करा। इ पत्तरन इस्त्राएल क लोगन बरे चिताउनी क रूप मँ रहइ द्या।”

39तब याजक एलीआज़ार काँसा क उ सबइ तसला बटोरस जेनका उ पचे लइ आए रहेन। उ सबइ मनई जरि गएन, मुला बासन तब भी हुवाँ रहेन। तब एलीआज़ार कछू

मनइयन क बासन क धातु क चपटी पीटइ क कहेस। तब उ धातु क चपटी चादर क वेदी प धरेस। 40उ ऐका वइसेन ही किहेस जइसा यहोवा मूसा क जरिये हुकुम दीन्ह ग रहा। इ चीन्हा रहा कि जेकाँ इस्त्राएल क लोग सुमिर सकई कि सिरिफ हारून क परिवार क मनई क यहोवा क समन्वा सुगन्धि देइ क अधिकार बाटइ। यदि कउनो दूसर मनई परमेस्सर क समन्वा सुगन्धि बारत ह तउ उ मनई कोरह अउ ओकर मनवइयन क तरह होइ जाइ।

### हारून मनइयन क रच्छ करत ह

41अगले दिन इस्त्राएल क मनइयन मूसा अउ हारून क खिलाफ ओराहना दिहेन। उ पचे कहेन, “तू सबइ यहोवा क मनइयन क मारि डया ह।”

42मूसा अउ हारून मिलापवाला तम्बू क दुआर प ठाड़ रहेन। मनई उ ठउर प मूसा अउ हारून क खिलाफ सिकाइत बरे बटुर गएन। मुला जब उ पचे मिलापवाला तम्बू क लखेन कि बदरा ओका ढाँकि लिहेस, अउर यहोवा हुआँ परगट भवा। 43तब मूसा अउ हारून मिलापवाला तम्बू क समन्वा गएन।

44तब यहोवा मूसा स कहेस, 45“उ मनइयन स दूरि हटि जा जेका अब मई नास करब।” मूसा अउ हारून भुइँया प भहराइ पड़ेन।

46तब मूसा हारून स कहेस, “वेदी क आगी आपन काँसा क बासन मँ ल्या। तब एहमँ सुगन्धि नावा। लोगन क भीड़ मँ ओनके पापन क प्रायश्चित करइ बरे हाली जा। यहोवा ओन पइ कोहान बा। महामारी ओन लोगन क बीच मँ फैलइ सुरू होइ गवा अहइ।”

47-48तउ हारून वइसे किहस जइसेन मूसा कहे रहा। धूप अउ आगी लइ लिहे क पाछे उ मनइयन क बीच दौड़के पहोँचा। मुला मनइयन मँ बेरामी पहिले ही सुरू होइ चुकी रही। तब हारून मुर्दा मनइयन क बीच अउ जउन जिअत रहेन खड़ा भवा। हारून लोगन क प्रायश्चित बरे सुगन्धि सुलगाइ दिहस। अउर तब बेरामी रुकि गइ। 49मुला हारून क पापे स प्रायश्चित स पहिले 14,700 लोग उ महामारी स मरि गए रहेन। उ कोरह क कारण मरे भवा लोगन क अतिरिक्त अहइ। 50तब हारून मिलापवाला तम्बू क दुआर प मूसा क लगे लउटा। मनइयन मँ भयंकर महामरगी रोक थाम दीन्ह गइ।

### यहोवा परमान देत हीं कि हारून

#### महा याजक अहइ

17 यहोवा मूसा स कहेस, 2“इस्त्राएल क मनइयन स कहा। आपन लोगन स बारह लकड़ी क कुबरी लइ लेईं। बारहु परिवार समूहन मँ स हर एक नेता स एक कुबरी ल्या। हर एक मनई क कुबरी प नाउँ लिखि द्या। 3अउ लेवी क कुबरी प हारून क नाउँ लिखि द्या। बारह परिवार समूहन क हर एक मुखिया क कुबरी होइ चाही। 4इ टहरइ वाली कुबरियन क मिलापवाला तम्बू मँ करार क सन्दूख क अगवा धइ द्या। इ उहइ ठउर अहइ जहाँ मइ तोहसे भेंटत अहउँ। 5मई एक मनई क सच्चा होइवाला याजक चुनब। तू

जानि लेब्या कि कउने मनई क मई चुनेउँ ह। काहे की उ कुबरी में नई पाती निकरब सुरु होइ। इ तरह मई मनइयन क आपन अउ तोहरे खिलाफ सदा ओराहना देइ स रोकबा।”

6तउ मूसा इस्त्राएली मनइयन स बात किहस। प्रधान में स हर एक ओका एक तु कुबरी दिहस। सब कुबरियन क गनती बारह रही। हर ए परिवार दल क नेता क एक कुबरी ओहमौ रही। हारून क कुबरी ओहमौ रही। 7मूसा करार क मिलापवाला तम्बू में यहोवा क समन्वा कुबरियन क धइ दिहस।

8अगला दिन मूसा तम्बू में घुसा। उ लखेस कि हारून क उ कुबरी, जउन लेवी बंस क रही, सिरिफ एक अइसी रही कि जेहसे नई पाती निकरब सुरु भई रहिन। उ कुबरी में डारि फूटि आइन अउ ओहमा बदाम लग गए रहेन। 9एह बरे मूसा यहोवा क ठउर स सबहिं कुबरियन क लइ आवा। मूसा इस्त्राएल क मनइयन क कुबरियन देखौएस अउ हर एक मनई आपन कुबरी वापिस लइ लिहस।

10तब यहोवा मूसा स कहेस, “हारून क कुबरी क करार वाला सन्दूखे क समन्वा रख द्या। इ ओनें मनइयन क चिताउनी होइ जउन हमेसा मोरे खिलाफ जात हीं। इ ओनकइ मोरे खिलाफ सिकाइत क रोककी। इ तरह उ पचे मरिहीं नहीं।” 11तउ मूसा ओन हुकुमन क मानेस जउन यहोवा दिहे रहा।

12इस्त्राएल क मनइयन मूसा स कहेस, “हम पचे जानित ह कि हम सबइ मरि जाब। हम विनास होइ गए। हम सबहिं विनास होइ गवा। 13कउनो मनई जउन यहोवा क पवितर ठउर क निअरे आवत ह मरि जाइ। का इ फुरइ बा कि हम सबइ मरि गएन?”

### याजकन अउ लेवी बंसी लोगन क कारज

**18** यहोवा हारून स कहेस, “तू तोहार पूतन, अउ तोहरे पिता क परिवारे क सब मनई कउनो पाप जउन पवितर ठउरे क सम्बंधित कीन्ह ग अहइ क जिम्मेदार अहइँ। तू अउ तोहार पूत याजकिये स सम्बन्धि कउनो भी बरे जिम्मेदार होइहीं।\* 2दूसर लेवी मनइयन क आपन साथ देइ बरे आपन परिवार समूह स लइ आवा। उ सबइ तोहार अउ तोहरे पूतन क मदद साच्छी क तम्बू क काम करइ में करिहीं। 3लेवी परिवार क उ सबइ मनई तोहरे मातहत अहइँ। उ पचे उ सबहिं कामे क करिहीं जेनका तम्बू में किया जाब अहइ। मुला उ पचेन क वेदी या पवितर ठउर क बर्तनन क लगे न जाइ चाही। जदि उ पचे अइसा करिहीं तउ उ सबइ मरि जइहीं अउ तू भी मरि जाब्या। 4उ पचे तोहरे संग होइहीं अउ तोहरे संग काम करिहीं। उ पचे मिलापवाला तम्बू क देखइ रेखइ क जिम्मेदार होइहीं। सब कारज, जेका तम्बू में कीन्ह जाइ चाही, उ पचे करिहीं। दूसर कउनो भी उ ठउर क नगिचे न आइ जहाँ तू अहा।

5“पवितर ठउर अउ वेदी क देख-रेख करइ क जिम्मेदार तू अहा। मई इस्त्राएल क मनइयन प फुन कोहाइ नहीं चाहत हउँ। 6मई खुद तोहरे मनइयन यानी लेवी बंस क लोगन क

खुद इस्त्राएल क सबहिं मनइयन में स चुनेउँ ह। उ पचे यहोवा क दीन्ह गवा उपहार अहइ अउर उ पचन्क परमेस्सर क सेवा करइ अउर मिलापवाला तम्बू क काम करइ बरे आर्पित कीन्ह गवा अहइ। 7मुला सिरिफ तू अउ तोहार पूत याजकन क रूप में सेवा कइ सकत हीं। अकेले तू ही वेदी क लगे जाइ सकत ह। तू अकेले महापवितर ठउर क पर्दा क भितरे जाइ सकत ह। याजक क रूप में तोहार सेवा एक तु उपहार जेका मई तोहका देत हउँ। कउनो भी दूसर, जउन पवितर ठउर क लगे आइ, मारि डवा जाइ।”

8तब यहोवा हारून स कहेस, “मई खुद तोहका मनइयन जउन खास भेंट चढ़ाएन ह जिम्मेदारी दिहेउँ ह। इस्त्राएल क लोग जउन सारी भेंट मोक देइहीं उ मई तोहका देत अहउँ। तू अउ तोहार पूत इ पवितर भेंटन क आपुस में बाटि सकत ह। इ हमेसा तोहार होइ। 9इ ओन सबहिं पवितर भेंटन में इ तोहार आपन हींसा होइ जेका जलावा नहीं गवा ह। हरेक भेंटन, हरेक अन्नबलि, हरेक पापबलि अउ हरेक दोखबलि जउन उ मोरे लगे लइ आवत हीं, इ सबइ तोहर अउ तोहरे पूतन बरे बहोत पवितर भेंटन होइ हीं। 10उ सबन चीजन क महापवितर ठउरे में खा। तोहरे परिवार क हर मरद मनसेधू एँका खाइ सकत ह मुला तोहका सुमिरइ चाही कि उ सबइ भेंट पवितर अहइँ।

11“अउर उ सबहिं चीजिन जेका इस्त्राएली उत्तोलन बलि क रूप में देइहीं, तोहरइ होइहीं। मई एँका तोहका, तोहार पूतन अउ तोहार बिटियन क देत हउँ। इ तोहार हींसा अहइ। तोहरे परिवार क हर एक मनई जउन सुद्ध होई, एँका खाइ सकी।

12“अउर मई सारा बढ़िया जइतून क तेल अउ सबन त बढ़िया नीक नई दाखरस अउ अनाज तोहका देत अहउँ। इ सबइ उहइ चीजन बाटिन जेका इस्त्राएल क लोग मोक यानी आपन यहोवा क देत हीं। इ सबइ उ चीजियन बाटिन जेका उ पचे आपन फसिल पाक जाए प बटोरत हीं। 13सबइ चीज जउन तोहार भूँया स आवत ही क पहिला फल परमेस्सर क अहइ। एह बरे इ चीजन क मई तोहका देब। अउर हर एक मनई जउन परिवार में सुद्ध होई एँका खाइ सकी।

14“अउर हर एक इस्त्राएल में जउन यहोवा क दीन्ह जात हीं, तोहार बा।

15“कउनो भी परिवारे में पहिलौटी क पूत या गोरु परमेस्सर क भेंट होइ। उ तोहार होइ। मुला तोहका हर एक पहिलौटी लरिका अउ पहिला पइदा भवा असुद्ध गोरु क फुन स वापिस लइ लेइ चाही। तब पहिला पइदा बच्चा फुन उ परिवार क होइ जाइ। 16जब लरिका बच्चा एक महीना क होइ जाई तबइ तोहका ओकर बरे दाम लइ लेइ चाही। ओका मुक्त करावइ क मूल्य पाँच सेकेल चाँदी पवितर स्थान क अधिकारिक माप अनुसार होइ चाही। एक सेकेल बीस गेरा क बराबर होत ह।

17“मुला तोहका पहिलौटी क गइया या भेड़ी या बोकरा क दाम नहीं लेइ चाही। उ सबइ गोरु तउ पवितर बाटेन। ओनकइ रकत वेदी प छिछकारा अउर ओनकइ चर्बा बारा। इ भेंट आगी क जरिए दीन्ह जात ह। इ भेंट क महकब मोरे बरे यानी यहोवा बरे सोहइवाली गंध होइ। 18मुला इ

**तू ... होइहीं** जदि अचानक कउनो अनफिट याजक पवितर स्थान, में दाखिल होत ह या बलि चढ़ावत ह।

गोरुअन क गोस तोहार होइ जइसे कि उत्तोलन बलि क छाती तोहार होइ अउर भेंटन क दहिनी जाँघन तोहार होइ। 19कउनो भी चीज, जेका लोग पवित्र भेंट क रूप में मोका चढ़ावत ही, मई यहोवा ओका तोहका देत हउँ। इ तोहार हीसा अहइ। मई एँका तोहका, तोहार बेटहनन अउ तोहार बिटिहिनियन क देत अहउँ। इ यहोवा क संग किया गवा करार अहइ जउन हमेसा बना रही। मई इ बचन तोहका अउ तोहरे सन्तानन क देत अहउँ।”

20यहोवा हारून स इ भी कहेस, “तू कउनो भी भुइयों न पउब्या। अउर अइसी कउनो भी चीज नहीं रखब्या जइसी दूसर लोग रखत हीं। मई तोहार अंस अउ मई इस्राएल क लोगन क बीच तोहार उत्तरधिकार अहइ।

21“इस्राएल क लोग जउन कछू ओनके लगे होइ ओकर दसवाँ हीसा देइहीं। इ तरह मई लेवी बंस क सन्तानन क दसवाँ हीसा देत अहउँ। इ ओनके उ काम क मजूरी अहइ जउन उ पचे मिलापवाला तम्बू में सेवा करत भए करत रहत हीं। 22मूला इस्राएल क दूसर लोगन क मिलापवाला तम्बू क निअरे कबहुँ नहीं जाइ चाही। यदि उ पचे अइसा करत हीं तउ ओनका अपने आप मरइ क होइ। 23जउन लेवी बंसी मिलापवाला तम्बू में काम करत अहइँ उ पचे एँकरे खिलाफ पाप क जिम्मेदार होइहीं। इ कनून हमेसा बरे होइ। लेवीबंसी उ भुइँया क न लेइहीं जेका मई इस्राएल क दूसर लोगन क बचन दिहेउँ ह। 24मूला इस्राएल क लोगन क लगे जउन कछू होइ ओकर दसवाँ हीसा मोका देइहीं। इ तरह मई लेवी बंसी मनइयन क दसवाँ हीसा देब। इहइ कारण अहइ कि मई लेवीबंसी मनइयन बरे कहेउँ ह: “उ पचे उ भुइँया क न पइहीं जेका मई इस्राएल क मनइयन क देइ क वचन दिहेउँ ह।”

25यहोवा मूसा स कहेस, 26“लेवी बंसी मनइयन स बात करा अउ ओमसे कहा, “इस्राएल क लोग हर एक चीज क दसवाँ हीसा यहोवा क देइहीं। उ दसवाँ हीसा लेवी बंसी मनइयन क होइ। मुला ओकर दसवाँ हीसा यहोवा क ओनकी भेंट क रूप में देइ चाही। 27अउर उ दसवाँ हीसा क इ समुझा जाब कि तू खरिहान स अनाज या दाखरस क कोलहू स दाखरस भेंट किहे रहा। 28इ तरह तू यहोवा क वइसेन ही भेंट देब्या जइसे इस्राएल क दूसर लोग देत हीं। तू इस्राएल क मनइयन क दीन्ह गवा दसवाँ हीसा पउब्या। अउर तू ओकर दसवाँ हीसा याजक हारून क देब्या। 29जब इस्राएल क लोग आपन हर एक चीज क दसवाँ हीसा देइँ तउ तोहका ओहमों स सबन त जियाब पवित्र हीसा चुनइ चाही। उहइ दसवाँ हीसा अहइ जेका तोहका यहोवा क देइ चाही।

30“मूसा, लेवी लोगन स इ कहा, “लोग जउन कछू तोहका देत ह ओका सबन त अच्छा हीसा जब तू भेंट करब। तउ इ अइसा होइ जइसा तू एका खरिहान स अनाज या दाखरस क कोलहू स दाखरस भेंट किहे रहा। 31जउन बाकी बची ओका तू अउ तोहार परिवार एँका कउनो जगह खाइ सकत ह। इ तू मनइयन क उ काम बरे मजूरी अहइ जउन तू पचे मिलापवाला तम्बू में करत बाट्या। 32अउर अगर तू एँकर सब स बढ़िया हीसा यहोवा क देत रहब्या तउ

तू कबहुँ दोखी न होब्या। तू इस्राएल क मनइयन क पवित्र भेंट क बरे दूसित न करब्या अउर तू मरब्या नाहीं।”

### लाल गइया क राखी

19 यहोवा मूसा अउ हारून स बात किहेस अउ कहेस, 2“इ सबइ कनून अउर नेमें अहइँ जेका यहोवा इस्राएल क मनइयन क दिहे अहइ। ओनका बिना दोखे क एक लाल गइया तोहार लगे लिआवइ। उ गइया क कउनो खोचा भी नाही लागी रहइ चाही। अउर न ही कबहुँ ओका काँधे पइ कउनो जुआ धर दीन्ह गवा ह। 3इ गइया क याजक एलीआज़ार क द्या। एलीआज़ार गइया क सिबिर स बाहेर लइ जाइ अउ हुवाँ गइया क मारी। 4तब याजक एलीआज़ार एँकर कछू रकत आपन अँगुरी प लगाइ। तब ओका कछू रकत पवित्र तम्बू क ओर छिछकारइ चाही। ओका इ सात दाई करइ चाही। 5तब पूरी गइया क उ समइ जलाइ चाही जब उ लखत ह। चाम गोस, रकत अउ गोबर सबन क फूँकि देइ चाही। 6तब याजक एक ठु देवदारु क लकड़ी, हिस्सप क डार अउ एक लाल तौत लेइ चाही। याजक क इ चीजन क उ आगी में नावइ चाही जेहमों गइया बरत होइ। 7तब याजक क अपने क अउ अपने ओढ़ना क धोवइ चाही। तब ओका सिबिर में लउटइ चाही। याजक सौँझ तलक असुद्ध रही। 8जउन मनई गइया क फूँकि ओका आपन क आपन ओढ़ना क पानी स धोवइ चाही। उ सौँझ तलक असुद्ध रही।

9“तब एक मनई जउन सुद्ध होइ, गइया क राखी बटोरी। उ इ राखी क सिबिर क बाहेर एक सुद्ध ठउरे प राखी। इ राख ओनका असुद्धता क सुद्धीकरण क उपयोग क लइ इस्राएलियन दुआरा रखइ जाब्या।

10“उ मनई जउन गइया क राखी बटोरेस, आपन ओढ़ना धोइ। उ सौँझ तलक असुद्ध रही।

“इ नेमें सदा चलतइ रही। इ नेमें इस्राएल क नागरिक लोगन बरे अहइ अउर ओन बिदेसी मनइयन बरे भी बाटइ जउन तोहरे बीच रहत हीं। 11जदि एक मनई कउनो मरे मनई क छुअत ह तउ उ सात दिन बरे असुद्ध होइ जाइ। 12ओका आपन क तीसरे दिन अउ फुन सतएँ दिन पानी स धोवइ चाही। जदि उ अइसा नहीं करत तउ उ सुद्ध नहीं होइ। 13जदि कउनो मनई लहास क छुअत ह तउ उ मनई जउन असुद्ध अहइ। जदि उ मनई जउन असुद्ध अहइ पवित्र तम्बू क जात ह तउ पवित्र तम्बू अपवित्र होइ जात ह। एह बरे उ मनई क इस्राएलियन स निकारइ दीन्ह जाइ। जदि सुद्धीकरण क जल उ असुद्ध मनई प नहीं छिरकइ जात ह, उ असुद्ध ही रहब्या।

14“इ नेमें ओन लोगन स जुड़ा बाटइ जउन तम्बू में मरि जात हीं। जदि कउनो व्यक्ति तम्बू में मरि जात ह तउ तम्बू क हर एक मनई अउर हर एक चीज असुद्ध होइ जाइ। उ सबइ सात दिना तलक असुद्ध रहहीं। 15अउर हर बे ढकना क कूँड़ा या बासन असुद्ध होइ जात ह। 16जदि कउनो लहास क छुअत ह तउ उ मनई सात दिना तलक असुद्ध रही। इ तब भी लागू होइ जब लहास खुला मैदान में या जुद्ध क

मइदान में मरा होइ। यदि कउनो मनई मरा भवा मनई क हाइ या कबर क छुअत ह तउ उ मनई सात दिना तलक असुद्ध रहब्या।

17“एह बरे तोहका बारी भइ गइया क राखी क प्रयोग उ मनई क फुन सदुध करइ बरे करइ चाही। बहता भवा जल गगरी में धरी राखी प डावा। 18सुद्ध मनई क एक हिस्सप डार लेइ चाही अउ ँका पानी में बोरइ चाही। तब ओका तम्बू, घारी अउ तम्बू में जउन मनइयन होई ओन पइ इ पानी छिरकइ चाही। तोहका ओन मनइयन क संग इहइ करइ चाही जउन ल्हासे क छुअई। तोहका इ ओकरे संग भी करइ चाही जउन लराइ में मारे मनइयन क ल्हासे क छुअत ह। या उ कउनो क संग भी जउन कउनो मरे मनई क हाइ क या कबर क छुअत ह।

19“तउ कउनो सुद्ध मनई इ जल क असुद्ध मनई प तीसरे दिन अउ फुन सतएँ दिन छिरकइ। सतएँ दिन उ मनई सुद्ध होइ जात ह। ओका आपन ओढ़ना क पानी में धोवइ चाही। उ साँझ तलक पवितर होइ जात ह।”

20“जदि कउनो मनई असुद्ध होइ जात ह अउ सुद्ध नाहीं होत तउ ओका इस्त्राएल क मनइयन स निकारइ दीन्ह जाइ। उ मनई प सुद्धीकरण क जल नाहीं छिरका गावा। उ सुद्ध नाहीं भवा। एह बरे उ पवितर तम्बू क असुद्ध कइ सकत ह। 21इ नेमें तोहरे बरे सदा होइ। जउन मनई इ सुद्धीकरण क जल क छिरकत ह ओका भी आपन ओढ़ना जरूर धोइ लेइ चाही। जउन मनई इ सुद्धीकरण क जल क छुइ उ साँझ तलक असुद्ध रही। 22जदि कउनो असुद्ध मनई कउनो दूसर क छुअइ तउ भी असुद्ध होइ जाइ। उ मनई साँझ तलक असुद्ध रही।”

### मिरियन मरत ह

**20** इस्त्राएल क मनई ‘सीन’ रेगिस्तान में पहिले महीना में पहुँचेन। लोग कादेस में रुकि गएन। मिरियन क मउत भइ अउ उ हुवाँ दफनाई गइ।

### मूसा क गलती

2उ जगह प मनइयन बरे पानी जियादा नाहीं रहा। एह बरे लोग मूसा अउ हारून क खिलाफ सिकाइत करइ बटुर गएन। अमनइयन मूसा स बहस कियेन। उ सबइ केहन, “इ नीक होत कि हम आपन भइयन क तरह यहोवा क समन्वा मर गए होतेन। 4तू यहोवा क मनइयन क इ रेगिस्तान में काहे लियाया? का तू चाहत ह कि हम अउ हमार गोरु हिअँ मरि जाई? 5तू हम पचन क मिस्त्र स काहे लिआया? तू हम पचन क बुरे ठउर प काहे लिआया ह? हिअँ कउनो अनाज नाहीं अहइ, कउनो अंजीर, अंगूर या अनार नाहीं अहइ। अउर हिअँ पिअइ बरे पानी नाहीं अहइ।”

6एह बरे मूसा अउ हारून उ मनइयन क तजि दिहन अउ उ पचे मिलापवाला तम्बू क दुआरे पहुँचेन। उ पचे हुअँ पैलगी कियेन। यहोवा क मौजूदगी क तेज ओन पइ परगट भवा।

7यहोवा मूसा स बात कियेस। उ कहेस, 8“आपन भाई हारून अउ मनइयन क भीड़ क संग ल्या अउ उ चट्टान

तलक जा। आपन टहरइ वाली कुबरी क ल्या। मनइयन क समन्वा चट्टान स बात करा। तबहिँ चट्टान स पानी बही। अउर तू उ पानी आपन मनइयन अउ जानवरन क दइ सकत ह।”

9टहरइ वाली कुबरी यहोवा क समन्वा पवितर तम्बू में रही। जइसा यहोवा कहे रहा, मूसा टहरइवाली कुबरी लिहस। 10मूसा अउ हारून मनइयन स चट्टाने क समन्वा मिलइ क कहेन। तब मूसा कहेस, “तू लोग सदा बिद्रोह करत ह। अब मोरउ सुना। का हम इ चट्टाने स पानी बहाउब?” 11मूसा आपन भुजा उठाएस अउ दुइ दाई चट्टानें प चोट कियेस। चट्टान स पानी बहइ लाग। मनइयन अउ गोरुअन पानी पिएन।

12मुला यहोवा मूसा अउ हारून स कहेस, “इस्त्राएल क सबहिँ मनइयन चारिहुँ कइँती बटुरा रहेन। मुला तू पचे मोका उ लोगन क समन्वा पवितर नाहीं ठहराया। तू पचे मनइयन क नाहीं बताएस कि मई चट्टान स पानी कइसा बहाएस ह। तू सबइ मनइयन क नाहीं बताया कि तू सबइ मोहे प पतियाना ह। मई ओन मनइयन क उ देस देब जेका देइ क मई बचन दिहेउँ ह। मुला तू सबइ उ देस में ओनका पहुँचावइ वाला न रहब्या।”

13इ ठउर क नाउँ मरीबा क पानी कहा जात रहा। इ उहइ ठउर अहइ जहाँ इस्त्राएल क मनइयन यहोवा स वाद-विवाद कियेन। अउर इ उहइ ठउर रहा जहाँ यहोवा इ देखीएँ रहा कि उ पवितर रहा।

### एदोम इस्त्राएल क पार नाहीं होइ दिहस

14जब मूसा कादेस में रहा, उ कउनो मनइयन क एदोम क राजा क लगे एक संदेसा क संग पठाएस। संदेसा इ रहा: “तोहरे भाई लोग तोहसे इ कहत हीं: तू जानत ह कि हम पचे केतनी तकलीफ उठावा ह। 15बहोत बहोतइ बरिस पहिले हमार पुरखन मिस्त्र चला ग रहेन। अउर हम पचे हुवाँ देर बरिस रहेन। मिस्त्र क मनई हम सबन बरे निर्दयी रहेन। 16मुला हम पचे यहोवा क मदद क बिनती कीन्ह। “अउर उ हम सबन क मदद बरे एक सरगदूत पठाएस। यहोवा हम पचन क मिस्त्र स बाहेर लइ आएन ह।

“अब हम पचे कादेस में अही जहाँ स तोहार पहुँटा सुरु होत ह। 17कृपा कइके आपन देस स हम पचन क जात्रा करइ देई। हम पचे कउनो खेत या अंगूर क बाग स जात्रा नाहीं करब। हम पचे तोहरे कउनो इनारा स पानी नाहीं पिअब। हम पचे सिरिफ राजपथ स जात्रा करब। हम पचे राजपथ क तनिके दाहिन बाएँ नाहीं बढ़ब। हम पचे तब तलक राजपथ प ठहरब जब तलक तोहरे धरती क पार नाहीं कइ जाइत।”

18मुला एदोम क राजा उत्तर दिहस, “तू हमरे देस स होइके जात्रा नाहीं कइ सकत्या। जदि तू हमरे देस स जात्रा करइ क कोसिस करत ह तउ हम पचे आउब अउ तोहसे तरवारे स लइब।”

19इस्त्राएल क मनइयन जवाब दिहन, “हम पचे बड़की सड़क स जात्रा करब। जदि हम या हमार गोरु तोहार कछू

पानी पीहीं तउ हम पचे ओकरे दाम क भुगतान करब। हम सबइ तोहरे देस स सिरिफ चलिके पार जाइ चाहित ह। हम सबइ एँका आपन बरे लेइ नहीं चाहित।”

20मुला एदोम फिन जवाब दिहस, “हम पचे आपन देस स होइके तोहका जाइ नहीं देब।”

तब एदोम क राजा एक ठु बहोत बड़वार अउ ताकतवर फउज बटोरिस अउ इस्त्राएल क मनइयन स लड़इ बरे निकर पड़ा। 21एदोम क राजा इस्त्राएल क मनइयन क अपने देस स जात्रा करइ बरे मना कइ दिहस। अउर इस्त्राएल क लोग मुड़ गए अउर दूसरे राहे स चल पड़ेन।

### हारून मरि जात ह

22इस्त्राएल क सब मनइयन कादेस स होर पहाड़े तलक जात्रा किहन। 23होर पहाड़ एदोम क चौहद्दी प रहा। यहोवा मूसा अउ हारून स कहेस, 24“अब हारून क मरि क समइ अउर आपन पुरखन क लगे जा मिलइ क समइ आ गवा ह। इ उ पहुँटा मैं न जाइ जेका देइ क मई इस्त्राएल क मनइयन क बचन दिहेउँ ह। मूसा, मई इ तोहसे कहत हउँ काहेकि मरीबा क पानी क बारे मैं तू अउ हारून मोरे दीन्ह ग हुकुम क खिलाफ बिद्रोह किहस।

25“हारून अउ ओकरे पूत एलीआज़ार क हॉर पहाड़े प लिआवा। 26हारून क खास ओढ़ना क ओसे ल्या अउ ओन ओढ़नन क ओकर पूत एलीआज़ार क पहिरावा। हारून हुवाँ पहाड़े प मरी। अउर उ आपन पुरखन क संग होइ जाइ।”

27मूसा यहोवा क हुकुम क मानेस। मूसा, हारून अउ एलीआज़ार हॉर पहाड़े प गएन। इस्त्राएल क सब मनइयन ओका जात लखेन। 28मूसा हारून क ओढ़ना उतार लिहस अउ ओन ओढ़ना क हारून क पूत एलीआज़ार क पहिराएस। तब हारून पहाड़े क चोटी प मरि गवा। मूसा अउ एलीआज़ार पहाड़े स उतरि आएन। 29तबहिं इस्त्राएल क सब मनइयन जान लिहन कि हारून गुजर गवा। एह बरे इस्त्राएल क हर मनई तीस दिना तलक हारून बरे गमी मनाएस।

### कनानीयन स जुद्ध

21 एक कनानी अराद क राजा रहा। उ नेगेव रेगिस्तान में रहत रहा। अराद क राजा सुनेस कि इस्त्राएल क मनइयन अथारीम कईंती जाइवाली सड़क स आवत अहई। एह बरे राजा बाहेर निकरा अउ इस्त्राएल क मनइयन प हमला किहस। उ ओहमाँ स कछू क धइ लिहस अउ ओनका बंदी बनाएस। 2तब इस्त्राएल क मनइयन यहोवा क इ बचन दिहन, “हे यहोवा! इ मनइयन क हरावइ मैं हमार मदद करा। एँका हमरे मातहत कइ द्या। जदि तू अइसा करब्या तउ हम पचे ओनके सहरन क पूरी तरह बरबाद कइ देब।”

3यहोवा इस्त्राएल क मनइयन क बिनती सुनेस। अउर यहोवा इस्त्राएल क लोगन स कनानी मनइयन क हरवाइ दिहस। इस्त्राएल क मनइयन कनानी लोगन अउ ओनके सहरन क पूरी तरह नास कइ दिहन। एह बरे उ ठउरे क नाउँ होरगा पड़ा।

### काँसा क साँप

4इस्त्राएल क मनइयन होर पहाड़े क तजेन अउ लाल सागर क जाइवाली सड़क स जात्रा प गएन। उ पचे अइसा एदोम क देस क चारिहुँ कईंती जाइ बरे किहेन। मुला मनइयन क धीरा नहीं रहा। 5उ सबइ परमेस्सर अउ मूसा क खिलाफ ओराहना सुरु किहन। मनइयन कहेन, “तू हम सबन क मिस्त्र स बाहेर काहे लिआया ह? हम पचे हिऑ रेगिस्तान में मरि जाब! हिऑ रोटी नहीं मिलत! हिऑ पानी नहीं! अउर हम पचे इ सड़ाइंध खइया स घिना करित ह।”

6एह बरे यहोवा मनइयन क बीच बिखैला साँपन पठाएस। साँपन ओन मनइयन क डस लिहस अउ बहोत स लोग मरि गएन। 7लोग मूसा क लगे आएन अउ ओसे कहेन, “हम पचे जानित ह कि जब हम पचे यहोवा अउ तोहरे खिलाफ बोलइ क पाप किहे अहउँ। यहोवा स पराथना करा अउ ओसे कहा कि इ साँपन क दूर करइ।” एह बरे मूसा लोगन बरे पराथना किहस।

8यहोवा मूसा स कहेस, “एक ठु काँसा क साँप बनावा अउ ओका एक ठु खम्बा प धरा। अगर कउनो मनई क साँप डसइ तउ उ मनई क खम्बा क ऊपर काँसा क साँप लखइ चाही। तब इ तरह उ मनई मरी नहीं।” 9एह बरे मूसा यहोवा क हुकुम मानेस अउ एक काँसा क साँप बनाएस अउ ओका एक खम्बा प धरेस। तब जब कबहुँ कउनो मनई क साँप डसत रहा तउ ओका खम्बा पइ काँसा क साँप क लखइ क होइ रहा। अउ जितत रहत रहा।

### होर पहाड़े स मोआब क घाटी तलक क जात्रा

10इस्त्राएल क लोग उ जगह क तजि दिहेन अउ ओबोत नाउँ क जहग प सिबिर डाएन। 11तब मनइयन ओबोत स इये अबारीम तलक क जात्रा किहन। अउर हुऑ सिबिर डाएन। इ मोआब क पूरब रेगिस्तान में रहा। 12तब मनइयन उ ठउर क छोड़ दिहन अउर जेरेद घाटी क जात्रा किहन। उ पचे हुवाँ सिबिर डाएन। 13तब उ पचे चलेन अउ रेगिस्तान क अर्नोन नदी क ओह पार सिबिर डाएन। इ नदी एमोरियन क चउहद्दी स सुरु होत रही। घाटी मोआब क चउहद्दी अउ एमोरी क बीचउ बीच रही। 14इहइ कारन अहइ कि “यहोवा क जुद्ध” किताबे मैं नीचे लिखा भवा हाल मिलत ह।”

“...अउर सूपा मैं बाहेब, अर्नोन क घाटी। 15अउर अर क बस्ती तलक पहोंचावइ वाली घाटी क किनारे क पहाड़ी। इ ठउर मोआब क चउहद्दी प अहई।”

16इस्त्राएल क मनइयन उ ठउर क तजेन अउर उ पचे बीर क जात्रा किहन। इ ठउर प एक ठु इनार रहा। यहोवा मूसा स कहेस, “हिऑ सबहिं मनइयन क बटोरा अउर मई ओनका पानी देब।” 17तब इस्त्राएल क मनइयन गीत गाएन:

“ए इनारा! उमड़िके पानी बहाउ। एकर गीत गावा।

18महा पुरखन इ इनारा क खोदेन। सज्जन लोग इ इनारा क खोदेन। उ पचे आपन राज-दण्डियन अउर लाठियन स एँका खोदेन। इ रेगिस्तान में एक ठु भेंट अहइ।”

तउ मनइयन ऐंका "मत्ताना" नाउँ क इनारा कहेन। 19तब मनइयन मत्ताना स नहलीएल क जात्रा किहेन। फुन उ पचे नहलीएल स बामोत क जात्रा किहेन। 20मनइयन बामोत स मोआब मँ घाटी तलक क जात्रा किहेन। इ ठउरे प पिसगा पहड़ क चोटी रेगिस्तान क ऊपर देखेई पड़त ह।

### सिहोन अउ ओर्गे

21इस्त्राएल क मनइयन कछू मनइयन क एमोरी लोगन क राजा सीहोन क लगे पठाएस। इ मनइयन राजा स कहेन, 22"आपन देस स होइ के हमका जात्रा करइ द्या। हम पचे कउनो खेत या अंगूरे क बगिया स होइके न जाब। हम पचे तोहरे कउनो इनारा क पानी न पिअब। हम सबइ सिरिफ राज-पथ स होइके जात्रा करब। हम सबइ तब तलक उ सड़क प ठहरब जब तलक हम पचे तोहरे देसे स होइके जात्रा पूरी नाहीं कइ लेइत।"

23मुला राजा सीहोन इस्त्राएल क लोगन क आपन देस स होइके जात्रा करइ क रजामन्दी नाहीं दिहस। राजा आपन फउज बटोरेस अउ रेगिस्ताने कईती चल पड़ा। उ इस्त्राएल क खिलाफ हमला करत रहा। यहज नाउँ क एक ठउरे प राजा क फउज इस्त्राएल क लोगन क संग लड़ाई लड़ेस।

24मुला इस्त्राएल क लोगन राजा क मारि डाएन। तब उ पचे अर्नोन घाटी स लड़ेके यब्बाक इलाका तलक ओकरे पहुँटा प कब्जा कइ लिहेन। इस्त्राएल क मनइयन अम्मोनी लोगन क हद तक क पहुँटा प कब्जा किहेन। उ पचे अउर जियादा इलाका प कब्जा नाहीं किहेन काहे की उ हद अम्मोनी लोगन क जरिए सुरच्छित रही। 25मुला इस्त्राएल अम्मोनी लोगन क सबहिँ सहरन प कब्जा कइ लिहेन। उ पचे हेसबोन नगर तलक अउ ओकरे चारिहुँ कईती क छोटके सहरन क भी हराइ दिहेन। 26हेसबोन उ सहर रहा जेहमा राजा सीहोन रहत रहा। ऐंकरे पहिले सीहोन मोआब क राजा क हराए रहा अउ सीहोन अर्नोन घाटी ताई सब पहुँटन प कब्जा कइ लिहे रहा। 27इहइ कारण अहइ कि गवइया इ गीत गावत हीं:

आवा हेसबोन क ऐंका फुन स बसावइ क बाटइ। सीहोन क सहरन क फुन स बनइ द्या।

28काहेकि आगी हेसबोन सहर स बाहेर चले गएस अउर सोला सीहोन सहर स बाहेर चला गवा। आगी मोआब मँ आर क नस्ट कइ दिहस। इ अर्नोन नदी क ऊपरी पहाड़ियन क सासकन क बार दिहस।

29हे मोआब! इ तोहरे बरे बुरा बाटइ, कामोस क मनई बरबाद कइ दीन्ह ग बाटेन। ओकर पूतन भाग पराइ गएन। ओकर बिटियन बन्दी बनाइ गइन। अमानीत लोगन क राजा सीहोन क जरिये।

30मुला हम पचे ओर्गे एमोरियन क हरावा, हम सबइ ओनका हेसबोन स दिबान तलक सहरन क, नसिम स नोपह तलक जउन मेदाब क निचके अहइ मिटाइ द्या।"

31एह बरे इस्त्राएल क मनइयन एमोरियन लोगन क देस मँ रहेन।

32मूसा कछू खुफिया लोगन क याजेर प नजर धरइ बरे पठाएस। मूसा क अइसा करइ क पाछे इस्त्राएल क मनइयन

उ सहर प कब्जा कइ लिहेन। उ पचे ओकरे चारिहुँ कईती क छोटके सहरन प भी कब्जा कइ लिहेन। इस्त्राएल क मनइयन उ ठउरे प बसइया एमोरी लोगन क उ ठउर तजि देइ क मजबूर किहेन।

33तब इस्त्राएल क लोग बासान कईती जाइवाली सड़क प जात्रा किहेन। बासान क राजा ओग आपन फउज लिहस अउ इस्त्राएल क लोगन क मुकाबला करइ निकरा। उ एद्रेइ नाउँ क पहुँटा मँ ओनके खिलाफ लड़ा।

34मुला यहोवा मूसा स कहेस, "उ राजा स जिन सिबिरअ। मई तोहका ओका हरावइ देब। तू ओकर पूरी फउज अउ पहुँटा क पउब्या। तू ओकरे संग उहइ करा जउन तू एमोरी लोगन क राजा सिहोन क संग किहा ह।"

35एह बरे इस्त्राएल क लोगन ओग अउ ओकर फउज क हाराया। उ सबइ ओका, ओकर बेटवन अउ ओकर सारी फउज क हराएन। तब इस्त्राएल क मनइयन ओकरे पूरे देस क कउनो क बिना जिउत छोड़इ क कब्जा कइ लिहेन।"

### बिलाम अउ मोआब क राजा

22 तब इस्त्राएल क मनइयन मोआब क समतल स होइ के यरदन नदी क पार यरीहो तलक जात्रा किहेन। 2-3सिप्पोर क पूत बालाक उ सब लखेस जेका इस्त्राएल क मनइयन एमोरी मनइयन क संग किहे रहेन। मोआब बहोतइ जियादा डेराइ ग रहा काहे की हुवाँ इस्त्राएल क बहोत मनई रहेन। मोआब इस्त्राएल क लोगन स बहोत ससान रहा।

4मोआब क राजा मिद्यान क नेता लोगन स कहेस, "मनइयन क इ बड़का झुण्ड हमरे चारिहुँ कईती क सब चीज क वइसे ही बरबाद कइ देइ जइसे कउनो गइया खेते क घास चरि जात ह।"

इ टेमें सिप्पार क पूत बालाक मोआब क राजा रहा। 5उ कछू मनइयन क बोर क पूत बिलाम क बोलावइ बरे पठाएस। बिलाम फरात नदी क निअरे पतोर नाउँ क पहुँटा मँ रहा। बालाक कहेस, "मनइयन क एक नवा रास्ट्र मिस्त्र स आवा ह। उ पचे एतना जियादा अहई कि समूचइ प्रदेस मँ संचर सकत हीं। उ पचे ठीक हमरे निअरे सिबिर डाए अहई।"

6आवा अउ इ मनइयन क संग भिड़इ मँ मोर मदद करा। उ पचे मोर ताकत स जियादा बरिआर ताकत वाला अहई। इ होइ सकत ह कि तब मई ऐंका हराइ सकउँ। तब मई ओनका आपन देस छोड़इ क मजबूर कइ सकउँ। मई जानत अहउँ कि तू बड़की ताकत धरत ह। अगर तू कउनो मनई क आसीबादि देइ तउ उ आसीसित होइ, अगर तू कउनो मनई क सराप देइ तउ उ मनई सापित होइ।\* एह बरे आवा अउ इ मनइयन क सराप देइ।"

7मोआब अउ मिद्यान क नेतन बालाम स मिलइ बरे गएन अउर आपन संग जादूइ सेवा क फीस भी लइ गएन। तब उ पचे, बालाक जउन कछू कहे रहा, ओसे कहेन।

अगर तू ... होइ इ उ वाचा क कईती इसारा करत ह जउन परमेस्सर इब्राहीम क संग उत्पत्ति 12:3 मँ किहेस ह "मई ओका आसिस देब जउन तोहका आसिस देत ह, मई ओका सराप देब जउन तोहका सराप देत ह।"

8बिलाम ओनसे कहेस, “हिआँ रात भइ ठहरा। मईँ यहोवा स बात करब अउर जउन जवाब, उ पचे मोका देइहीं, उ तोहसे कहबा।” एह बरे उ रात मोआबियन क नेता ओनके संग ठहरेन।

9परमेस्सर बिलाम क लगे आवा अउ उ पूछेस, “तोहरे संग इ सबइ कउन लोग अहईँ?”

10बिलाम परमेस्सर स कहेस, “मोआब क राजा सिप्पौर क पूत बालाक एक संदेसा मोका देइ बरे ओनका पठाए अहइ।” 11सँदेसा इ अहइ: मनइयन क एक ठु नवा रास्ट्र मिस्त्र स आवा अहइ। उ पचे ऐतना जियादा अहईँ कि समूचइ देस मँ फइलि सकत हीं। एह बरे आवा अउ इ मनइयन क खिलाफ कछू कहा। इ होइ सकत ह ओनसे लइइ मँ मईँ समर्थ होइ सकउँ अउ आपन देस तजि देइ क ओनका मजबूर कइ सकउँ।”

12मुला परमेस्सर बिलाम स कहेस, “ओनके संग जिन जा। तू ओनका सराप नहीं देइ चाही, काहेकि उ आसीबादि पाएस ह।”

13दूसर दिन बिलाम उठा अउ बालाक क नेता स कहेस, “अपने देस क लउटि जा। यहोवा मोका तोहरे संग नहीं जाइ देइहीं।”

14एह बरे मोआबी नेता बालाक क लगे लउटि गएन अउ ओसे इ बात कियेन। उ पचे कहेन, “बिलाम हम सबन क संग आवइ स मना कइ दिहे अहइ।”

15एह बरे बालाक दूसर नेता लोगन क बिलाम क लगे पठाएस। इ दाईँ उ पहिली दाईँ क अपेच्छा बहोत ढेर क मनई पठाएस। अउर इ नेता लोग पहिली दाईँ क अपेच्छा जियादा सम्मान रहेन। 16उ सबइ बिलाम क निअरे गएन अउ कहेन: “जिप्पार क पूत बालाक तोहसे कहत ह: कृपा कइके आपन क हिआँ आवइ स कउनो क रोकइ जिन द्या। 17जउन मईँ तोहसे मँगत अहउँ जदि तू उ करब्या तउ मईँ तोहका बहोत जियादा भुगतान करब। आवा अउ इ मनइयन क खिलाफ मोरे बरे कछू कहा।”

18मुला बिलाम उ मनइयन क जवाब दिहस। उ कहेस, “मोका यहोवा मोरे परमेस्सर क आग्या मानइ चाही। मईँ ओकरे हुकुम क खिलाफ कछू नहीं कइ सकत हउँ। मईँ बड़का-छोटका कछू भी तब तलक नहीं कइ सकत जब तलक परमेस्सर नहीं कहत कि मईँ ओका कइ सकत हउँ। अगर राजा बालाक आपन सोना चाँदी भी सुन्दर घर क भी दइ देइ तउ भी मईँ आपन परमेस्सर यहोवा क हुकुम क खिलाफ कछू नहीं करब। 19मुला तू भी ओन दूसर लोगन क तरह आज क रात हिआँ ठहर सकत ह। अउ रात मँ मईँ जान जाब कि यहोवा मोहसे क कहवावइ चाहत ह।”

20उ रात परमेस्सर बिलाम क लगे आवा। परमेस्सर कहेस, “इ लोग अपने संग लइ जाइ बरे कहइ खातिर फुन आवा अहईँ। एह बरे तू ओनके संग जाइ सकत ह मुला सिरिफ उहइ करा जउन मईँ तोहसे करइ क कहउँ।”

### बिलाम अउ ओकर गदहा

21दूसरे भिन्सारे बिलाम उठा अउ अपने गदहा प काठी धरेस। तब उ भी मोआबी नेता लोगन क संग गवा।

22बिलाम आपन गदहा प सवार रहा। ओकरे नउकरन मँ स दुइ ठु ओकर संग रहेन। जब बिलाम जात्रा करत रहा तउ परमेस्सर ओन प कोहाइ गवा। एह बरे यहोवा क सरगदूत बिलाम क समन्वा सड़के प खड़ा होइ गवा। सरगदूत बिलाम क रोकइ जात रहा।”

23बिलाम क गदहा यहोवा क सरगदूत क सड़क प खड़ा देखेस। सरगदूत क हाथ मँ एक तरवार रही। एह बरे सड़क स मुड़ा अउ खेत मँ चला गवा। बिलाम सरगदूत क नहीं लख सकत रहा। एह बरे उ गदहा प बहोत कोहान। उ गदहा क पीटेस अउ ओका सड़क प लउटइ क मजबूर किहस।

24पाछे यहोवा क सरगदूत अइसी जगह प खड़ा भवा जहाँ सड़क संकरी होइ गइ रही। इ दुइ अंगूर क बगियन क बीच क ठउर रहा। हुवाँ सड़क क दुइनउँ ओर देवार रहिन। 25गदहा यहोवा क सरगदूत क फुन निहारेस। एह बरे गदहा एक देवारे स चिपकिके निकरा। एहसे बिलाम क गोड़ देवारे स पिचक गवा। एह बरे आपन गदहा क फुन स पीटेस। 26एँकरे पाछे यहोवा क सरगदूत दूसर ठउर प खड़ा भवा। इ दूसर जहग रही जहाँ सड़क संकराइ ग रही। हुवाँ कउनो अइसी जगह नहीं रही जहाँ गदहा मुड़ सकइ। 27गदहा यहोवा क सरगदूत क लखेस। एह बरे गदहा बिलाम क आपन पीठ प लइके जमिन प बइठि गवा। बिलाम गदहा पर बहोतइ कोहान रहा। एह बरे उ ओका लाठी स पीटि डाएस।

28तब यहोवा गदहा क बोलइवाला बनाएस। गदहा बिलाम स कहेस, “तू मोहे प काहे कोहान अहा। मईँ तोहरे संग का किहउँ ह? तू मोका तीन दाईँ मार्या ह।”

29बिलाम गदहा क उत्तर दिहस, “तू मोर मज़ाक उड़ाएस ह, तू मोका गलत ठहराएस ह। जदि मोरे हाथे मँ अबहिँ सिरिफ एक तरवार होत तउ मईँ अबहिँ तोहका मारि डाइत।”

30मुला गदहा बिलाम स कहेस, “मईँ तोहार आपन गदहा अहउँ, जेह प तू आपन सारा जिन्नगी सवार भवा ह। अउर तू जानत ह कि मईँ अइसा एँकरे पहिले कबहुँ नहीं किहउँ ह।”

“इ सही अहइ।” बिलाम कहेस।

31तब यहोवा बिलाम क सड़क प खड़ा सरगदूत क लखइ दिहस। बिलाम सरगदूत अउ ओकर तरवारि निहारेस। तब बिलाम निहुरिके पैलगी किहस।

32तब यहोवा क सरगदूत बिलाम स पूछेस, “तू आपन गदहा क तीन दाईँ काहे मार्या ह? मईँ तोहका रोकइ बरे हिआँ आवा अहउँ। काहेकि तोहार जात्रा मोर आदेस क खिलाफ अहइ। 33गधा मोका लखेस। अगर गदहा न मुड़ा होत तउ मईँ तोहका मारि डाए होतेउँ। मुला मोका तोहरे गदहा क नहीं मारइ क रहा।”

34तब बिलाम यहोवा क सरगदूते स कहेस, “मईँ पाप किहेउँ ह। मईँ इ नहीं जानत रहेउँ कि तू सड़क प खड़ा अहा। अगर मईँ बुरा करत अहउँ तउ मईँ घर लउटि जाब।”

35यहोवा क सरगदूत बिलाम स कहेस, “नहीं, तू इ मनइयन क संग जाइ सकत ह। मुला होसियार रहा। सिरिफ उ बातन क कहा जउन मईँ तोहसे कहइ बरे कहबा।” एह

बरे बिलाम बालाक क जरिये पठए गए नेता लोगन क संग गवा।

36बालाक सुनेस कि बिलाम आवत अहइ। एह बरे बालाक ओसे मिलइ बरे अर्नोन नदी क निअरे मोआबी सहर गवा। इ ओकरे देस क उत्तरी छोरे प रहा। 37जब बालाक बिलाम क लखेस तउ उ बिलाम स कहेस, “मई एकरे पहिले आप स आवइ क कहेउँ रहा अउर इ भी बताएउँ रहा कि इ बहोत जियादा महत्व स भरा बाटइ। आप हमरे लगे काहे नाहीं आपन? का मई तोहका धन देइ क जोग्य नाहीं अहइ?”

38मुला बिलाम उत्तर दिहस, “मई अब तोहरे लगे आवा अहउँ।” मुला मई, जउन तू करइ क कहे रहा ओहमों स, साइद, कछू भी न कइ सकउँ। मई सिरिफ उहइ बातन तोहसे कइ सकत हउँ जउन यहोवा परमेस्सर मोसे कहइ क बताएस हा।”

39तब बिलाम बालाक क किर्यथूपोत गवा। 40बालाक कछू गोरु अउ कछू भेड़िन ओकरे भेंट क रूप में मारेस। उ कछू गोस बिलाम अउ कछू ओकरे संग क नेता लोगन क दिहस।

41दूसरे भिन्सारे बालाक बिलाम क बमोत बाल नगर लइ गवा। उ सहर स उ पचे इस्राएली मनइयन क कछू सिबिर क लखि सकत रहेन।

### बिलाम क पहिली भविस्सबाणी

**23** बिलाम कहेस, “हिआँ सात तु वेदी बनावा। अउ मोरे बरे सात तु बर्धा अउ सात भेड़ा तइयार करा।” 2बालाक उ सब किहस जउन बिलाम कहेस। तब बिलाम अउ बालाक हर एक वेदी प एक तु बर्धा अउ एक भेड़ा मारेस।

3तब बिलाम बालाक स कहेस, “इ वेदी क लगे ठहरा। मई दूसर जगह जाब। तब साइद यहोवा मोरे लगे अहहीं अउर बतइहीं कि मई का कहेउँ।” तब बिलाम एक ऊँचा जगह प गवा।

4परमेस्सर उ ठउर प बिलाम क लगे आवा। अउर बिलाम कहेस, “मई सात तु वेदी तइयार किहेउँ ह। अउर मई हर एक वेदी प एक तु बर्धा अउ एक भेड़ा मारेउँ ह।”

5तब यहोवा बिलाम क इ बताएस जउन ओका कहइ चाही। तब यहोवा कहेस, “बालाक क लगे जा अउ इ बातन क कहा जउन मई कहइ बरे बताएउँ ह।”

6एह बरे बिलाम बालाक क लगे लउटा। बालाक तब तलक वेदी क निचके खड़ा रहा। अउर मोआब क सबहिं नेता लोग ओकरे संग खड़ा रहेन। 7तब बिलाम इ सब बातन क कहेस:

मोआब क राजा बालाक मोका अरम स बोलाएस पूरबिया पहाड़न स। बालाक मोसे कहेस: “आवा अउ मोरे बरे याकूब क खिलाफ कहा, आवा अउ इस्राएलक क लोगन क खिलाफ कहा।”

8परमेस्सर ओन मनइयन क खिलाफ नाहीं अहइ, एह बरे मई भी ओनके खिलाफ नाहीं कहि सकत हउँ। यहोवा

ओनका बुरा होइ बरे नाहीं कहेस ह। एह बरे मई भी वइसा नाहीं कइ सकत हउँ।

9मई ओन सबन क पहाड़े स लखत हउँ। मई अइसे मनइयन क लखत हउँ जउन अकेले रहत हीं। इ मनइयन कउनो दूसरे रास्ट्र क अंग नाहीं अहइ।

10कउन याकूब क मनइयन क गन सकत ह? उ सबइ बालू क कणे क तरह ढेर क बाटेन। इस्राएल क मनइयन क एक चउथाई क भी कउनो गन नाहीं सकत। मोका एक तु नीक मनई क तरह मरइ द्या, मोका ओन मनइयन क तरह मरइ द्या।

11बालाक बिलाम स कहेस, “तू हमरे बरे का किहा ह? मई तोहका आपन दुस्मनन प सारप देइ बरे बोलाएउँ रहा। तू आपन सबन क आसीबादि दिहा ह।”

12मुला बिलाम जवाब दिहस, “यहोवा मोहसे जउन कहइ क चाहत ह ओका मोका जरूर कहइ चाही।”

13तब बालाक ओसे कहेस, “तउ मोरे संग कउनो दूसर ठउर प आवा। जहाँ तू ओन लोगन क लखि सकत ह। मुला तू ओनके एक हिंसा क लखि सकत ह, सबहिं क नाहीं लखि सकत ह। अउर उ ठउर स मोरे बरे ओनका सराप दइ सकत ह।” 14एह बरे बालाक बिलाम क जोफिम क मइदान\* में लइ गवा। इ पिसगा पहाड़े क चोटी प रहा। बालाक उ ठउर प सात वेदी बनाएस। तब बालाक हर एक वेदी प बलि क रूप में एक तु बर्धा अउ एक भेड़ा मारेस।

15एह बरे बिलाम बालाक स कहेस, “इ वेदी प खड़ा रहा। मई उ ठउरे प परमेस्सर स भेंटइ जाब।”

16तउ यहोवा बिलाम क लगे आवा अउ उ बिलाम क बताएस कि उ का कहइ। तब यहोवा बिलाम क बालाक क लगे लउटि आवइ अउ ओन बातन क कहइ बरे कहेस। 17एह बरे बिलाम बालाक क लगे गवा। बालाक तब वेदी क लगे खड़ा रहा। मोअब क नेता ओकरे संग रहेन। बालाक बिलाम क आवत भवा लखेस अउ ओसे पूछेस, “यहोवा का कहेस ह?”

### बिलाम क दूसर भविस्सबाणी

18तब बिलाम इ बातन क कहेस: “खड़ा हवा अउ मोर बात सुना। सिप्पार क पूत बालाक! मोरउ सुना।

19परमेस्सर मनई नाहीं; उ लबार न बोली। परमेस्सर मनई स पइदा पूत नाहीं, ओकर फइसला बदली नाहीं। अगर यहोवा कहत ह कि उ कछू करी तउ उ ओका जरूर करी। जदि यहोवा बचन देत ह तउ आपन बचन क जरूर पूरा करी।

20यहोवा मोका ओनका आसीबादि देइ क हुकुम दिहस ह। यहोवा ओनका आसीबादि दिहस ह, एह बरे मई ओका नाहीं बदल सकित।

21परमेस्सर याकूब क मनइयन में कउनो दोख नाहीं पाएस। इस्राएल क लोगन में कउनो पाप नाहीं रहा। यहोवा ओनकइ परमेस्सर अहइ अउ ओनके संग बाटइ। महाराजा क पुकार ओनके संग अहइ।

जोफिम क मइदान पहाड़ा पइ उ जगह जहाँ स चोकीदार दूर क चिजियन क लख सकत ह।

22परमेस्सर ओनका मिस्त्र स बाहेर लिआवा। इस्त्राएल क उ सबइ लोग जंगली सौंड़े क तरह बलवान अहई।

23कउनो ताकत नाहीं जउन याकूब क लोगन क हराइ सकइ। कउनो जादू इस्त्राएल क लोगन क नाहीं रोकइ सकत ह। याकूब क बारे में अउ इस्त्राएल क लोगन क बारे में भी मनइयन इ बात कहब्या, 'परमेस्सर जउन महान काम किहे अहइ ओन पइ धियान द्या।'

24मनई सेर क नाई सक्तीवाला होइहीं। उ सबइ सेर जइसे लड़िहीं। अउर इ सेर कबहुँ नाहीं आराम करी, जब तलक उ सिकार क खाइ नाहीं लेअत। जब तलक उ ओनकइ खून नाहीं पिअत जउन जुद्ध मई मारा गवा ह।"

25तब बालाक बिलाम स कहेस, "तू नाहीं ओका सराप द्या अउर नाहीं ओका आसीबादि।"

26बिलाम जवाब दिहस, "मई पहिले तोहसे कहि दिहेउँ ह कि मई सिरिफ उहइ करब जउन यहोवा मोका करइ बरे कहत ह।"

27तब बालाक बिलाम स कहेस, "एह बरे तू मोर संग दूसर ठउर प चला। साइद कि ओनका उ जगह स सराप देइ स परमेस्सर खुस होइ।" 28एह बरे बालाक बिलाम क पेऑर पहाड़े प लइ गवा। इ पहाड़ रेगिस्तान में दिखौं देत रहा।

29बिलाम कहेस, "हिआँ सात वेदी बनावा। तब सात तु सौंड़ अउ सात भेड़ा क वेदी प बलि बरे तइयार करा।" 30बालाक उहइ किहस जउन बिलाम कहेस। बालाक बलि क रूप में हरेक वेदी प एक तु सौंड़ अउ एक भेड़ा भोरेस।

### बिलाम क तीसरी भविस्सबाणी

**24** बिलाम क मालूम भवा कि यहोवा इस्त्राएल क आसीबादि देइ चाहत हीं। एह बरे बिलाम कउनो किस्म क जादू टोना क प्रयोग कइके ओका बदलइ नाहीं चाहेस। मुला बिलाम मुड़ा अउ उ रेगिस्तान कइँती लखेस। 2बिलाम रेगिस्तान क पार तलक लखेस अउ इस्त्राएल क सबहिं लोगन क लखेस। उ पचे आपन अलग-अलग परिवार समूहन क पहँटा में सिबिर डाए भए रहेन। तब परमेस्सर क आतिमा बिलाम प उतरी। 3अउर बिलाम इ शब्दन क बोला:

"बोर क पूत बिलाम क सँदेसा अहइ जउन मई साफ-साफ निहारत हउँ उहइ क बारे में बोलत हउँ

4"मई इ सँदेसा क परमेस्सर स सुनेउँ ह। मई लखेउ हँ जउन सर्वसक्तीमान परमेस्सर मोका देखौँएस ह। मई मूँड़ि निहुराइके बतावत हउँ जउन मई साफ-साफ देखँत हउँ।

5"याकूब क मनइयो! तोहार तम्बू बहोतइ सुन्नर अहई! इस्त्राएल क मनइयो! तोहार घर बहोतइ सुन्नर अहई!

6"तोहार तम्बू बगिया क नाई अहई जउन नदी क आगे लगावा गवा ह। तोहार घर उ बगिया क नाई बाटेन जउन नदी क किनारे बाढ़त रहत ह। तोहार घर मीठी महकउआ झाड़ी क नाई अहई जेका यहोवा उगाए बाटइ। तोहार घर सुन्नर बिरवा क नाई अहई जउन पानी स बाढ़त रहत हीं।

7"तोहका पिअइ क पानी हमेसा मिलत रही। तोहका खूब इफरत पानी बिआ क बाढ़इ बरे मिली। तोहार सबन क राजा अगग स बड़ा होइ। तोहरे राज्ज क बड़की महिमा होइ।

8"परमेस्सर ओन लोगन क मिस्त्र स बाहेर लिआवा। उ एँतना बरिआर सक्तीवाला अहइ जेतँना एक तु अनेर सौंड़। उ पचे आपन सबहिं दुस्मनन क नास कइ देब। उ ओकर हड्डियन क तोड़ देब अउ आपन तीरन स ओनका भेद देब।

9"उ सबइ सेर क नाई अहई जउन गुटुर-मुटुर बड़ठा अहइ अउर सोअत अहइ। कउनो मनई ओका जगावइ नाहीं चाहत। कउनो मनई जउन तोहका आसीबादि देइ, असीस पाइ। अउर कउनो मनई जउन तोहका सराप देइ उ पचे सराप पाइ।"

10तब बिलाम प बालाक बहोत कोहान। बालाक बिलाम स कहेस, "मई तोहका आपन दुस्मनन पइ सराप देइ बरे हिआँ बोलाएउँ रहा। मुला तू ओनका आसीबादि दिहे अहा। तू ओनका तीन दाई आसीबादि दिहे अहा। 11अब बिदा ह्वा अउ घरे जा। मई कहेउँ रहा कि मई तोहका बहोत जियादा अमीर बनाउब। मुला यहोवा तोहका इनाम पावइ स रोक रखे बाटइ।"

12बिलाम बालाक स कहेस, "का मई ओन संदेसवाहकन क जेनका तू मोरे लगे पठाएस रहा नाहीं कहेस रहा: 13'बालाक आपन सोना चाँदी स भरा आपन घर मोका दइ सकत ह। मुला मई तब भी सिरिफ उहइ बात कहि सकत हउँ जेका कहइ बरे यहोवा हुकुम दिहे अहइ। मई नीक या बुरा खुद कछू नाहीं कइ सकत हउँ। मोका उहइ करइ चाही जउन यहोवा क हुकुम होइ।' का तोहका याद नाहीं कि मई इ बातन तोहरे मनइयन स कहेउँ। 14अब मई आपने लोगन क बीच जात अहउँ; मुला मई तोहका एक चिताउनी देब। मई तोहसे कहब कि भविस्स मँ इस्त्राएल क इ लोग तोहरे संग अउ तोहरे लोगन क संग का करिहीं।"

### बिलाम क आखिरी भविस्सबाणी

15तब बिलाम इ बातन क कहेस:

"बोर क पूत बिलाम क इ सब्द अहई: इ सबइ सब्द उ मनई क अहई जउन चीजन क साफ साफ लिखि सकत ह।

16मई परमेस्सर स इ सँदेसा सुनेउँ ह। मई गियान पाएउँ ह जउन सर्वोच्च परमेस्सर दिहेस ह जेका सर्वसक्तीमान परमेस्सर दिहेस ह। मई उ निहारेउँ ह। मई दण्डवत कइके कहत हउँ जउन मई निहारेउँ ह।

17"मई लखत अहउँ कि यहोवा आवत बा, मुला अबहिं नाहीं। मई ओकर अवाई लखत हउँ, मुला हाली नाहीं। याकूब क परिवार स एक तारा आई। इस्त्राएल क मनइयन मँ स एक नवा राजा आई। उ राजा मोआबी मनइयन क मूँड़ खूँद देइ। उ सेथ क सबहिं पूतन क मूँड़न क चकना-चूर कइ देइ।

18इस्त्राएल ताकतवर होइ! उ एदोम क राज्ज पाई। उ आपन दुस्मन सेइर क राज्ज पाई।

19"उ याकूब क परिवार स सासन करब। सहर मँ उ सबन लोगन क नास करी जउन जिअत बचा भवा बाटेन।"

20तब बिलाम आपन अमालेकी मनइयन क लखेस अउ इ बातन क कहेस:

“सब रास्ट्रन में स अमालेकी सबन त जियादा बरिआर रहा। मुला अमालेकी भी बरबाद कइ दीन्ह जाइ!”

21तब बिलाम केनित मनइयन क लखेस अउ ओसे इ सब बात कियेस:

“तू सबइ पतियात ह कि तोहार देस उहइ तरह सुरच्छित बा, जइसे कउनो ऊँचे पहाड़े प एक चिरइया क झोंझ।

22“मुला तू कनित लोगो नस्ट होइ जाब्या जइसे यहोवा केन क नास कियेस ह। अससूर तोहका बन्दी बनाइ लेइ।”

23तब बिलाम इ बतिया कहेस:

“कउनो मनई नहीं जी सकत जब परमेस्सर अइसा करत ह।

24कितियन क घाट स जहाज अइहीं। उ सबइ अससूर अउ एबर क हरइहीं। मुला तब सब जहाज नस्ट कइ दीन्ह जइहीं।”

25तब बिलाम उठा अउ आपन घर लउटि गवा अउ बालाक भी आपन रहे चला गवा।”

### पेऑर में इस्त्राएल

**25** इस्त्राएल क लोग अबहिं सितीमी क इलाका में सिबिर डाए रहेन। उ समई इस्त्राएली मनसेधूअन मोआबी मेहररुअन क संग वेस्यावृत्ति करइ लागेन। 2-3मोआबी मेहररुअन मनसेधूअन क आवइ अउ आपन मिथ्य देवतन क भेंट चढ़ावइ में मदद करइ क न्यौतेन। इस्त्राएली लोगन हुवाँ भोजन किहन अउ देवतन क पूजन। उ ठउरे प इस्त्राएल क लोग इ तरह लबार देवता-पोर क बाल क पूजा सुरु किहन। यहोवा इ लोगन प किरोध कियेस।

4यहोवा मूसा स कहेस, “इ मनइयन क नेता लोगन क लिआवा। ओनका धूप में यहोवा क समन्वा लट्काइ द्या। तब यहोवा इस्त्राएल क मनइयन प न कोहाइ।”

5तउ मूसा इस्त्राएल क जजन स कहेस, “तू पचन में स हर एक क आपन परिवार समूह में ओन लोगन क हेरिके निकारब अहइ जउन मनइयन क पेऑर क लबार देवता बाँल क आराधना खातिर अगुअइ किहन ह। तब तोहका उ मनइयन क जरुर मारि डवइ चाही।”

6उ समई मूसा अउ सबहिं इस्त्राएल क नेतन मिलापवाला तम्बू क दुआरे प एक संग बटुरा रहेन। एक इस्त्राएली मनई एक मिद्यानी मेहरारु क आपन परिवारे में आपन घरे लिआवा। उ इ हुवाँ कियेस जहाँ ओका मूसा अउ सारे देवता लखि सकत रहेन। मूसा अउ नेतन मिलापवाला तम्बू क समन्वा रोवत रहेन। 7याजक हारून क पोता अउ एलीआज़ार क पूत पीनहास एँका लखेन। एह बरे बइठक क तजि दिहस अउ आपन भाला उठाएस। 8उ इस्त्राएली मनई क पाछे पाछे ओकरे तम्बू में गवा। तब उ इस्त्राएली मनसेधू अउ मिद्यानी मेहरारु क आपन भाला स मारि डाएस। उ तम्बू में आपन भाला क दुइनउँ क बदन स भोंकि के पार कइ दिहस। उ टेमें इस्त्राएल क लोगन में एक बड़की बेरामी सँचरी रही। मुला जब पीनाहास इ दुइनउँ मनइयन क मारि डाएस तउ

बेरामी रुकि गइ। 9 बेरामी स 24,000 मनई मरि गवा रहेन।

10यहोवा मूसा स कहेस, 11“याजक हारून क पोता अउ एलीआज़ार क पूत फिनहस इस्त्राएल क लोगन क मोरे किरोध स बचाइ लिहस। उ लोगन क बीच में मोर बरे व्यग्रसील रहा। एह बरे मई लोगन क आपन व्यग्रता में नाहीं मारब्या। 12एह बरे फिनहम स कहा कि मई ओकरे संग एक सान्ति क करार करइ चाहत हउँ। 13उ अउ ओकरे पाछे बंसे में जन्मा मोरे संग एक करार करिहीं। उ पचे सदा याजकन रइहीं। काहे की उ आपन परमेस्सर क सम्मान बरे व्यग्रसील रहा उ इस्त्राएल क लोगन क पाप बरे प्रायश्चित कियेस।”

14जउन इस्त्राएली मनई मिद्यानी मेहरारु क संग मारा गवा रहा ओकर नाउँ ज़िम्निरा रहा। उ साल क पूत रहा। उ सिमोन क परिवार समूह क नेता रहा। 15अउर मिद्यानी मेहरारु क मारी गइ रही ओकर नाउँ कोजबी रहा। उ जूर क बिटिया रही। उ अपने परिवार क मुखिया रहा। अउर उ मिद्यानी परिवार समूह क नेता रहा।

16यहोवा मूसा स कहेस, 17“मिद्यानी लोग तोहार दुस्मन अहइँ। तोहका ओनका मारि डवइ चाही। 18उ पचे पहिले ही तोहका आपन दुस्मन बनाइ लिहे अहइँ। उ पचे तोहका ललचाएस अउ तू आपन लबार देवतन क पोर में पूजवाया। उ पचे तोहमाँ स एक मनई क कोजबी क संग वेस्यावृत्ति क अपराध करइ बरे बहकाएस। उ मिद्यानी नेता क बिटिया रही। मुला इहइ मेहरारु तब मारी गइ जब इस्त्राएली लोगन में महामारी फइली। इ महामारी एह बरे सँचर गइ काहेकि लोगन क संग लबार देवता बाल-पेऑर क आराधना करइ बरे छल कीन्ह ग रहा।”

### दूसर जन-गणना

**26** बड़की बेरामी क पाछे, यहोवा मूसा अउ हारून क पूत याजक एलीआज़ार स बात कियेस। 2उ कहेस, “सबहिं इस्त्राएली लोगन क गनती करा। हर एक परिवार क लखा अउ बीस बरिस या ओसे जियादा उमर क हर एक मनसेधू क गना जउन इस्त्राएल क फउज में सेवा करइ जोगग अहइँ।”

3इ टेमें लोग मोआब क मइदानन में सिबिर डाए रहेन। इ जारिको स लइके यरदन नदी क उस पार तलक बसा भवा रहा। एह बरे मूसा अउ याजक एलीआज़ार मनइयन स बात कियेन। उ पचे कहेन, 4“तोहका बीस बरिस या ओसे जियादा उमर क हर एक मनसेधू क गनइ चाही। इहइ उ हुकुम रहा जउन यहोवा मूसा क मानइ बरे दिए रहा।” हिओँ ओन इस्त्राएल क लोगन क सूची बाटइ जउन मिस्त्र स आए रहेन:

5इ सबइ रूबेन परिवार क लोग रहेन। (रूबेन इस्त्राएल क पहिलौटी क पूत रहा) इ सबइ परिवार रहेन:

हनोक - हनोकी परिवार

पल्लू - पल्लियत परिवार

6हेस्त्रोन - हेस्त्रोनी परिवार।

कर्मी - कर्मी परिवार।

7रूबेन क परिवार समूह में उ सबइ परिवार रहेन। जोड़ में सब 43,730 मनसेधु रहेन।

8पल्लू क पूत एलीआब रहा। 9एलीआब क तीन पुत्र रहेन-नमूएल, दातान अउ अबीराम। इ याद राखा कि दातान अउ अबीराम दुइ नेता रहेन जउन मूसा अउ हारून क खिलाफ होइ गएन। उ पचे कोरह क मनवइया रहेन अउ कोरा यहोवा क बिरोधी होइ गवा। 10उहइ टेमें रहा जब धरती फाटि गइ अउ कोरह अउर ओकरे सबहिं मनवइयन क धरती लील लिहिस। सब 250 मनसेधु मरि गएन। इ इस्त्राएल क सब मनइयन बरे एक संकेत अउ चिताउनी रही। 11मुला कोरह क परिवार क दूसर लोग नाहीं मरेन।

12सिमोन क परिवार समूह क इ परिवार रहेन।

नमूएल - नमूएल परिवार  
यामीन - यामीन परिवार  
याकीन - याकीन परिवार  
13जेरह - जेराही परिवार  
साऊल - साऊल परिवार।

14सिमोन क परिवार समूहन में उ सबइ परिवार रहेन। एहमें कुल 22,200 मनसेधु रहेन।

15गाद क परिवार दलन में इ सबइ परिवार रहेन:

सपोन - सपोन परिवार  
हाग्गी - हाग्गी परिवार  
सुनी - सुनी परिवार  
16ओजनी - ओजनी परिवार  
एरी - एरी परिवार  
17अरोद - अरोद परिवार  
अरेली - अरेली परिवार

18गाद परिवार समूह क उ सबइ परिवार रहेन। एहमें कुल 40,500 मनसेधु रहेन।

19-20यहूदा परिवार समूह क इ सबइ परिवार रहेन:

सेला - सेलनी परिवार  
पेरेस - पेरेस परिवार  
जेरह - जेरह परिवार यहूदा क दुइ पूत एर अउ ओनान-कनान में मर गए रहेन।

21पेरेस क इ सबइ परिवार रहेन:

हेस्त्रोन - हेस्त्रोनी परिवार  
हामूल - हामूल परिवार

22यहूदा क परिवार समूह क उ सबइ परिवार रहेन। एँके कुल मनसेधुअन क गनती 76,500 रही।

23इस्साकर क परिवार समूह क इ सबइ परिवार रहेन:

तोला - तोला परिवार  
पुव्वा - पुव्वा परिवार  
24यासूब - यासूब परिवार  
सिम्रोन - सिम्रोन परिवार

25इस्साकर परिवार समूह क इ सबइ परिवार रहेन। एहमें कुल मनसेधुअन क गनती 64,300 रही।

26जबूलून क परिवार समूह क इ सबइ परिवार रहेन:

सेरेद - सेरेद परिवार  
एलोन - एलोन परिवार  
यहलेल - यहलेल परिवार

27जबूलून क परिवार समूह क उ सबइ परिवार रहेन। एहमें कुल मनसेधुअन क गनती 60,500 रही।

28यूसुफ क दुइ पूत मनसे अउ एप्रैम रहेन। हर एक पूत आपन परिवार क संग परिवार समूह बन गवा। 29मनसे अउ परिवार में इ सबइ रहेन:

माकीर - माकीर परिवार। (माकीर गिलाद क बाप रहा।)

गिलाद - गिलाद परिवार

30गिलाद क परिवार क इ सबइ रहेन:

ईएजेर - ईएजेर परिवार  
हेलेक - हेलेकी परिवार

31अस्त्रीएल - अस्त्रीएली परिवार

सेकेम - सेकेमी परिवार

32समीदा - समीदा परिवार

हेपेर - हेपेरी परिवार

33हेपेर क पूत सलोफाद रहा। मुला ओकर कउनी पूत नाहीं रहा। सिरिफ बिटिया रही। ओकरी बिटियन क नाउँ महला, नोआ, होग्ला, मिल्का अउ तिसा रहेन।

34मनसे परिवार समूह क इ सबइ परिवार रहेन। एहमें कुल मनसेधुअन 52,700 रहेन।

35एप्रैम क परिवार समूह क इ सबइ परिवार रहेन:

सूतेलह - सूतेलही परिवार

बेकरे - बेकरी परिवार

तहन - तहनी परिवार

36एरान सुतेलह परिवार क रहा। ओकर परिवार एरनी रहा।

37एप्रैम क परिवार समूह में उ सबइ परिवार रहेन। कुल मनसेधुअन क गनती 32,500 रही। उ पचे अइसे सब लोग रहेन जउन जौसेफ क परिवार समूह क रहेन। 38बिन्यामीन क परिवार समूह क परिवार इ सबइ रहेन:

बेला - बेला परिवार

असबेल - असबेली परिवार

अहीरम - अहीरमी परिवार

39सपूपाम - सपूपाम परिवार

हूपाम - हूपामी परिवार

40बेला क परिवार में इ सबइ रहेन:

अर्द - अर्दा परिवार

नामान - नामानी परिवार

41बिन्यामीन क परिवार समूह क इ सबइ परिवार रहेन। एहमौं मनइयन क कुल गनती 45,600 रही। 42दान क परिवार समूह मँ इ सबइ परिवार रहेन:

सूहाम - सूहामी परिवार समूह।

दान क परिवार समूह स उ परिवार समूह रहा। 43सुहमीत परिवार-दल मँ बहोत स परिवार रहेन। एहमौं मनसेधुअन क गनती 64,400 रही। 44आसेर क परिवार समूह क इ सबइ परिवार रहेन:

यिम्ना - यिम्नी परिवार

यिस्त्र - यस्त्री परिवार बरीआ-बरीआ परिवार।

45बरीआ क इ सबइ परिवार अहईं:

हेबेर - हेबेरी परिवार

मल्कीएल - मल्कीएली परिवार।

46(आसेर क एक बिटिया सेरा नाउँ क रही।) 47आसेर क परिवार समूह मँ उ सबइ परिवार रहेन। एहमौं मनसेधुअन क गनती 53,400 रही।

48नेपाली क परिवार समूह क इ सबइ परिवार रहेन:

यहसेल - यहसेली परिवार

गूनी - गुनी परिवार

49येसेर - येसेरी परिवार

सिल्लेमे - सिल्लेमी परिवार

50नेपाली क परिवार समूह क उ सबइ परिवार रहेन। एहमौं मनसेधुअन क कुल गनती 45,400 रही। 51इ तरह इस्त्राएल क कुल मनसेधुअन क गनती 6,01,730 रही।

52यहोवा मूसा स कहेस, 53“हर एक परिवार क धरती दीन्ह जाइ। इ उहइ प्रदेस अहइ जेकरे बरे मई बचन दिहेउँ ह। हर एक परिवार समूह ओन मनइयन बरे ढेर क धरती पाइ जइहीं जेनका गना गवा। 54बड़कवा परिवार समूह जियादा भुइयौं पाई अउ छोटा परिवार समूह कमती भुइयौं पाई। मुला हर एक परिवार समूह क भुइयौं मिली, जेकरे बरे मई बचन दिहेउँ ह। अउर जउन भुइयौं क उ पचे पइहीं। उ ओनके गनी भइ गनती क बराबर होइ। 55हर एक परिवार समूह क पाँसा डाइ के आधार प तय कइके धरती दीन्ह जाइ। अउर उ पहँटा क उहइ नाउँ होइ जउन उ परिवार समूह क होइ। 56उ पहँटा जेका मई लोगन क देइ क बचन दिहेउँ ह, ओकरे बपोती मँ होइ। इ बड़के अउ छोटके परिवार समूह क दीन्ह जाइ। तय करइ बरे तोहका पाँसा फेंकइ क होइ।”

57लेवी क परिवार समूह भी गना गवा। लेवी क परिवार समूह क इ परिवार अहईं:

गोर्सोन - गोर्सोन परिवार

कहात - कहात परिवार

मरारी - मरारी परिवार

58लेवी क परिवार समूह स इ भी परिवार रहेन:

लिब्नी परिवार

हेब्रानी परिवार

महली परिवार

मुसी परिवार कहात परिवार

अग्राम कहात क परिवार समूह क रहा। 59अग्राम क मेहरारु क नाउँ योकेबेद रहा। उ भी लेवी क परिवार समूह क रही। ओकर जन्म मिस्त्र मँ भवा रहा। अग्राम अउ याकेबेद क पूत हारून अउ मूसा रहेन। ओनकइ एक बिटिया मिरियम भी रही।

60हारून नादाब, अबीहू, एलीआज़ार अउ इतामार क बाप रहा। 61मुला नादाब अउ अबीहू मर गएन। काहे की उ पचे यहोवा क उ आगी स भेंट चढ़ाएन जउन ओनके बरे ओनकइ अधिकार नाहीं रहा।

62लेवी परिवार समूह क सबहिं मनइयन क गनती 23,000 रही। मुला इ सबइ इस्त्राएल क दूसर लोगन क संग नाहीं गना गएन उ धरती नाहीं पाइ सकेन जेका दूसर लोगन क देइ क बचन यहोवा दिहे रहा।

63मूसा अउ याजक एलीआज़ार इ सबहिं मनइयन क गनेन। उ पचे इस्त्राएल क लोगन क मोआब क मइदान मँ गनेन। इ यरीहो स यर्दन नदी क पार रहा। 64बहोत टेमें पहिले मूसा अउ याजक हारून इस्त्राएल क मनइयन क रेगिस्तान, मँ गने रहेन। मुला उ सबइ लोग मरि गवा रहेन। मोआब क मइदान मँ मूसा जउन लोगन क गनेन। उ पचे पहिले गना गए भए मनइयन स अलग रहेन। 65इ एह बरे भवा कि यहोवा इस्त्राएल क लोगन स इ कहे रहा कि उ सबइ रेगिस्तान मँ मरिहीं। ओकर मारइ क पाछे जउन सिरिफ दुइ बचा रहेन उ यपुने क पूत कालेब अउ नून क पूत यहोसू रहेन।

### सलोफाद क बिटियन

27 सलोफाद हेपेर क पूत रहा। हेपेर गिलाद क पूत रहा। गिलाद माकीर क पूत रहा। माकीर मनस्से यूसुफ क पूत रहा। सलोफाद क पाँच बिटियन रहिन। ओनकइ नाउँ महला, नोवा, होगला, मिल्का अउ तिसा रहा। 2इ पाँचउ मेहररुअन मिलापवाला तम्बू मँ गइन अउ मूसा याजक एलीआज़ार, नेता लोग अउ एक संग बटुरे मनइयन ओनका लखेन।

पाँचउ बिटियन कहेन, 3“हमार बाप उ सबइ मरि गएन जब हम पचे रेगिस्तान मँ जात्रा करत रहिन। ओकर मउत ओकर पाप बरे भइ। उ ओन मनइयन मँ नाहीं रहा जउन कोरह क दल मँ मिलि गवा। (कोरह उहइ रहा जउन यहोवा क खिलाफ होइ गवा रहा।) हमरे बाप क कउनो बेटवा नाहीं रहा। 4एकर इ अरथ भवा कि हमरे बाप क नाउँ न चली। इ ठीक नाहीं कि हमरे पिता क नाउँ नाहीं चलइ। ओकर नाउँ मेट जाइ काहे की ओकरे कउनो पूत नाहीं अहइ। एह बरे हम पचे माँग करित ह कि हमका कछू भुइयौं उ भूइँया क अलवा दीन्ह जाइ जेका हमरे पिता क भाई लोग उत्तराधिकार क रूप मँ पइहीं।”

5एह बरे मूसा यहोवा स पूछेस कि उ का करइ। 6यहोवा ओसे कहेस, 7“सलोफाद क बिटियन फुरे कहत हीं। तोहका ओनके चाचा क संग संग ओनका भी धरती क हींसा देइ चाही, जउन तू ओनके बाप क देत्या।

8“एह बरे इस्राएल क मनइयन बरे ऐंका कनून बनइ द्या। ‘जदि कउनो मनई क पूत न होइ अउर उ मरि जात ह तउ हर एक चीज ओकर बाटइ ओकरे बिटिया क होइ। 9जदि ओका कउनो बिटिया न होइ तउ जउन कछू भी होइ ओकरे भइयन क दीन्ह जाइ। 10जदि ओकर कउनो भाई न होइ तउ जउन कछू ओकर होइ ओकरे पिता क भाइयन क दीन्ह जाइ। 11अगर ओकरे बाप क कउनो भाई न होइ तउ जउन कछू ओकर होइ ओकरे परिवार क सबन न निचेक क नातेदाद क दीन्ह जाइ। इस्राएल क लोगन में इ कनून होइ चाही। यहोवा मूसा क इ हुकुम देत ह।”

### यहोसू नवा नेता अहइ

12तब यहोवा मूसा स कहेस, “उ पहाड़न क कतारन में एक क ऊपर चढ़ा जउन यरदन नदी क पूरब रेगिस्ताने में बा। तु उ धरती क निहरब्या जेका मई इस्राएल क मनइयन क देत अही। 13जब तू इ पहुँटा क लखि लेब्या तब तू आपन भाई हारून क तरह मरि जाब्या। 14उ बात क सुमिरा जब लोग सीन क रेगिस्तान में पानी बरे कोहान रहेन। तू अउ हारून दुइनउँ मोर हुकुमबदूली किहा ह। तू पचे मोर मान नाहीं किहा अउ मनइयन क अगवा पक्वितर नाहीं बनाया रहा।” (इ पानी जिन क रेगिस्तान में कादेस क भीतर मरीबा में रहा।)

15मूसा यहोवा स कहेस, 16“यहोवा परमेस्सर अहइ। उहइ जानत ह कि लोग का सोचत अहइँ। यहोवा मोर बिनती अहइ कि तू इ मनइयन बरे एक नेता चुना। 17मई बिनती करत हउँ कि यहोवा एक अइसा नेता चुनी जउन ओनका इ प्रदेस स बाहेर लइ जाइ अउर ओनका नवा पहुँटा में पहुँचाई। तब यहोवा क लोग बे गइरिया क भेड़ी क नाई न होइहीं।”

18एह बरे यहोवा मूसा स कहेस, “नून क पूत यहोसू नेता होइ। यहोसू बहोत बुद्धिमान अहइ। ओवा नवा नेता बनावा। 19ओसे याजक एलीआज़ार अउ पूरा धार्मिक मण्डली क समन्वा खड़ा होइ क कहा। तब ओका सबहिँ लोगन क समन्वा नवा नेता बनावा।

20“मनइयन क इ देखौंवा कि तू ओका नेता बनावत अहा, तब सबहिँ ओकर हुकुम मनिहीं। 21जदि यहोसू कउनो खास निर्णम लेइ चाही तउ ओका याजक एलीआज़ार क लगे जाइ क होइ। एलीआज़ार उरिम क प्रयोग यहोवा क जवाब जानइ बरे करी। तब यहोसू अउ इस्राएल क सब लोग उ करिहीं जउन परमेस्सर कइहीं। जदि परमेस्सर कहत ह ‘बाहर जा।’ तब उ पचे ओनका बाहर लइ जाइ, अउर अगर उ कहत ह, ‘घरे प अराम करा।’ तउ उ पचे घर में आराम करिहीं।”

22मूसा यहोवा क आग्या मानेस। मूसा यहोसू याजक एलीआज़ार अउ इस्राएल क सब लोगन क समन्वा खड़ा होइके कहेस। 23तब मूसा आपन हाथे क ओकरे मूँडे प

देखौंवाइ बरे धरेस कि उ नवा नेता अहइ। उ वइसे ही किहेस जइसा यहोवा कहे रहा।

### रोज क भेंट

28 तब यहोवा मूसा स बात किहेस। उ कहेस, 2“इस्राएल क मनइयन क इ हुकुम द्या। ओनसे कहा कि उ पचे मोर बलिदानन अउर अन्नबलि क भोजन जेकर सुगन्ध मोका प्रसन्न करत हीं क भेंट बारी गइ भेंट दुआरा चढ़ावई। इ निहचित करा कि ओका उचित समइ में भेंट करइ चाही। 3इ होमबलि क ओनका यहोवा बरे चढ़ावइ चाही। ओनका दोख क बिना एक बरिस का दुइ तु मेमना रोज भेंट क रूप में चढ़ावइ चाही। 4मेमनन में स एक क भिन्सारे चढ़ावा अउ दूसर मेमना क सर्यास्त क टेमें। 5ऐंकरे अलावा एपा क दसवाँ हींसा अन्नबलि हीन क चौथाई जइतून क तेल क संग मिला भवा आटा क द्या।” 6इ रोज क होम बलि अहइ जउन सीनै पहाड़ प प्रथम दाई सरू किहे गवा रहेन। इ बारी गइ भेंट रही जउन यहोवा बरे सुहावना सुगन्ध अहइ। 7मनइयन क बारी गइ भेंट क संग पयेबलि करइ चाही। ओनका हर एक भेड़ क संग हीन क एक चौथाई दाखरस देइ चाही। उ पयेबलि क पक्वितर ठउरे में वेदी प डवा। इ यहोवा क भेंट अहइ। 8दूसरे भेड़ क भेंट गोधूरि क टेमें चढ़ावा। ऐंका भिन्सारे क भेंट क तरह चढ़ावा। अन्नबलि अउ दाखरस क एक ही तरीका स भेंट करिहीं। इ बारी गइ भेंट रही जउन यहोवा बरे सुहावना सुगन्ध अहइ।”

### सबित भेंट

9“सबित क दिन एक बरिस क बेदोखे क दुइ मेमना जइतून क तेल क संग मिला एपा क दुइ दसवाँ हींसा बढ़िया आटा क अन्नबलि अउ पयेबलि अउ दाखरस भी चढ़ावा। 10इ हरेक सबित क दिन क खास भेंट अहइ। इ भेंट रोजाना राजे क भेंट अउ दाखरस क भेंट क अलावा अहइ।”

### नवा चन्द्रिमा क भेंट

11“हर एक महीना क पहिले दिन तू यहोवा क होमबलि चढ़उब्या। इ भेंट बेदोखे क दुइ बर्धी, एक भेड़ अउ एक बरिस क सात मेमना होइ। 12हर एक बर्धी क संग जइतून क तेल क संग जेहमा एपा क तीन दसवाँ हींसा बढ़िया आटा क भेंट भी चढ़ावा। हर एक भेड़ क संग जइतून क तेल क संग मिला एपा क दुइ दसवाँ हींसा बढ़िया आटा क भेंट भी चढ़ावा। 13हर एक भेड़ क बच्चा क संग जइतून क तेल क संग मिला भवा एपा क दसवाँ हींसा बढ़िया आटा क भेंट भी चढ़ावा। इ होमबलि अहइ जे आगी में तइयार भवा अहइ इ यहोवा बरे सुहावना सुगन्ध अहइ। 14पयेबलि में आधा हीन दाखरस हर एक बर्धी क संग, तिहाई हीन दाखरस हर एक भेड़ क संग अउ चौथाई हीन दाखरस हर एक मेमना क संग होइ चाही। इ होमबलि अहइ जउन बरिस क हर एक महीना चढ़ावइ जाइ चाही। 15हेमेसा रोजाना क होमबलि अउ पयेबलि क अलावा तोहका यहोवा क एक बोकरा देइ चाही। उ बोकरा पापबलि होइ।

### फसह त्यौहार

16“पहले महीना नीसान क चउदहवौं दिन यहोवा क सम्मान में फसह पर्व होइ। 17उ महीना क पन्द्रहवौं दिन बे खमीरे क रोटी क दवत सुरु होत ह। इ पवित्र जलसा सात दिनों तलक रहत ह। तू सिरिफ उहइ रोटी खाइ जउन बे खमीरे क होइ। 18इ पवित्र जलसा क पहिले दिन तोहका खास बइठक बोलावइ चाही। उ दिन तोहका कउनो काम नाहीं करइ चाही। 19तू यहोवा क होमबलि देब्या। इ होमबलि दोख क बिना दुइ बर्धा, एक ठु भेड़ा अउ एक बरिस क सात ठु मेमना होइ। 20-21हर एक बर्धा क साथ जइतून क तेल क साथ साना भवा एपा क तीन दसवौं हींसा बढ़िया आटा, भेड़ा क संग जइतून क तेल क संग साना भवा एपा क दुइ दसवौं हींसा बढ़िया आटा अउर हर एक मेमना क संग एपा क दसवौं हींसा जइतून क तेल क संग साना भवा बढ़िया आटा क अन्नबलि भी होइ। 22तोहका एक बोकरा भी देइ चाही। उ बोकरा तोहरे बरे पापबलि होइ। इ तोहरे पाप क ढोंपि देइ। 23तू पचन क ओन भेंटन क अलावा देइ चाही जउन तू हर एक भिन्सारे होमबलि क रूप में देत रहत ह।

24“उहइ तरह तोहका सात दिनों तलक बलि भेंट देइ चाही। इ आगी क दुआरा होमबलि क रूप में अन्न भेंटन होइ। इ यहोवा बरे सुहावना सुगन्ध अहइ। तू नेमें स होमबलि अउ एकर दाखरस भेंट चढ़उब्या। एकरे अलावा तू भोजन चढ़उब्या। होमबलि क अलावा इ भेंट क तोहका देइ चाही जउन तू रोज देत ह।

25“तब फसह क सतएँ दिन तू एक पवित्र सभा बुलाउब्या, अउर उ दिन तू कउनो काम नाहीं करब्या।

### हप्ता क त्यौहार (पिन्तेकुरस्त)

26“पहिले फल क उत्सव क अवसर पइ तोहका यहोवा क एक नवा अनाज क भेंट जरूर देइ चाहीं। उ टेमें प तोहका एक खास बइठक बोलावइ चाही। तू उ दिन कउनो काम नाहीं करब्या। 27तू पचे होमबलि चढ़उब्या। उ बलि यहोवा बरे सुहावनी सुगन्ध होइ। तू सबइ बे दोखे क दुइ साँड़, एक-एक बरिस क भेड़ा अउ सात मेमना क भेंट चढ़उब्या। 28तू हर एक साँड़ क संग जइतून क तेल क संग साना भवा एपा क तीन दसवौं हींसा बढ़िया आटा, हर एक भेड़ा क संग एपा क दुइ दसवौं हींसा 29अउ हर एक मेमना क संग एपा क दसवौं हींसा आटा क भेंट चढ़उब्या। 30तोहका आपन पापे क ढोंपइ बरे एक ठु बोकरा क बलि चढ़ावइ चाही। 31तोहका इ भेंट रोजाना क दग्ध-भेंट अउ एकर अन्नबलि क अलावा चढ़ावइ चाही। ठान ल्या कि गोरुअन में कउनो दोख नाहीं हो। अउर इ निहचय करि ल्या कि पयेबलि ठीक बाटइ।

### तुरहियन क त्यौहार

29“सातवौं महीना क पहिले दिन एक खास बइठक होइ। तू सबइ उ दिन कउनो काम नाहीं करब्या। उ तुरही बजावइ क दिन अहइ। 2तू पचे होमबलि चढ़उब्या। इ भेंटन यहोवा बरे सुहावनी सुगन्ध होइ। तू बेदोखे क एक साँड़ एक भेड़ा अउ एक-एक बरिस क सात मेमना चढ़उब्या।

3तू पचे एपा क तीन दसवौं हींसा तेल स सना भवा नीक आटा हरेक बर्धा क संग, अउ एपा क दुइ दसवौं हींसा भेड़ा क संग चढ़ाउब्या। 4सात मेमना में स हरेक क संग एपा क दसवौं हींसा आटा क भेंट चढ़उब्या। 5एकरे अलावा पापबलि बरे एक बोकरा भी चढ़उब्या। इ तोहरे पापे क ढोंपी। 6इ भेंटन नवा चन्द्रिमा भेंट अउ ओकरे अन्नबलि क अलावा होइ। अउर इ रोज क भेंट, एकर अन्नबलि अउ पयेबलि क अलावा होइहीं। इ नेम क मुताबिक कीन्ह जाइ चाही। एनका आगी बारइ चाही। इ यहोवा क बरे सुहावनी सुगन्ध होइ।

### प्रायश्चित क दिन

7“सतएँ महीना क दसवौं दिन एक खास बइठक होइ। उ दिन तू उपवास रखब्या अउर तू कउनो काम नाहीं करब्या। 8तू होमबलि भेंट करब्या। इ यहोवा बरे सुहावनी गन्ध होइ। तू बे दोखे क एक ठू साँड़ एक ठु भेड़ा अउ एक बरिस क सात मेमना भेंट चढ़उब्या। 9हर एक बर्धा क संग जइतून क तेल स साना भवा एपा क तीन दसवौं हींसा आटा, भेड़न क संग एपा क दुइ दसवौं हींसा आटा। 10अउ हर एक सातहु मेमना क संग एपा क दसवौं हींसा आटा क भेंट चढ़उब्या। 11तू एक बोकरा भी पापबलि क अलावा भेंट करब्या। इ पाप बरे प्रायश्चित क अतिरिक्त होइ। इ रोजाना क बलि, अन्नबलि अउ पयेबलि क अलावा भी होइ।

### कुटीर क त्यौहार

12“सतएँ महीना क पन्द्रहवौं दिन एक खास बइठक होइ। इ कुटीर क त्यौहार होइ। तू उ दिना कउनो काम नाहीं करब्या। तू यहोवा बरे खास छुट्टी सात दिना तलक मनउब्या। 13तू होमबलि चढ़उब्या। इ यहोवा बरे सुहावनी सुगन्ध होइ। तू तेरह बर्धा, दुइ भेड़ा अउ एक बरिस क चउदह मेमना चढ़उब्या। 14तू तेरह बर्धा में स हर एक बरे जइतून क तेल क संग साना भवा एपा क तीन दसवौं हींसा आटा, दुइनउँ भेड़न में स हर एक बरे एपा क दुइ दसवौं हींसा 15अउ चउदह भेड़न में स हर एक बरे एपा क दसवौं हींसा आटा क भेंट चढ़उब्या। 16तोहका एक ठु बोकरा भी पाप भेंट क रूप में अर्पित करइ चाही। इ रोजाना क भेंट अउ एकर अनाज अउ दाखरस भेंट क अलावा होइ।

17“इ पवित्र दिन क दूसरे दिन तोहका बारह बर्धा, दुइ भेड़ा अउ चउदह एँक बरिस क मेमना चढ़ावइ चाही। इ सबइ बिना दोख क होइ चाही। 18तोहका साँड़, भेड़ा अउ मेमना क संग गनती क मुताबिक तउले में अन्नबलि अउ पयेबलि भी चढ़ावइ चाही। 19तोहका पापबलि क रूप में एक ठु बोकरा क भी भेंट चढ़ावइ चाही। इ रोजाना क भेंट अउ अन्न अउ पयेबलि क अलावा भेंट होइ।

20“इ पवित्र दिन क तीसर दिन तोहका बे दोखे क गियारह साँड़, दुइ भेड़ा अउ एक एक बरिस क मेमना क भेंट चढ़ावइ चाही। 21तोहका बर्धा, भेड़ा अउ मेमना क ठीक गनती क मुताबिक अन्न अउ पयेबलि चढ़ावइ चाही। 22तोहका पापबलि क रूप में एक बोकरा क भी देइ चाही। इ रोजाना क भेंट अउ अन्नबलि अउ पयेबलि क अलावा भेंट होइ।

23“इ पवित्र दिन क चउथा दिन तोहका बे दोखि क दस साँड़, दुइ भेड़ा अउ एक-एक बरिस क चउदह मेमना भेंट चढ़ावइ चाही। इ सबइ बेदोख होइ चाही। 24तोहका बर्धा, भेड़ा अउ मेमना क ठीक सख्यौं क मुताबिक अन्न अउ पयेबलि चढ़ावइ चाही। 25तोहका पापबलि क रूप में एक बोकरा क भी चढ़ावइ चाही। इ रोजाना क भेंट अउ अन्नबलि अउ पेयबलि क अलावा होइ चाही।

26“इ पवित्र दिन क पँचए दिन तोहका बेदोख क नौ साँड़, दुइ भेड़ा अउ एक-एक बरिस क चउदह मेमना भेंट चढ़ावइ चाही। इ सबइ बेदोख होइ चाही। 27तोहका बर्धा, भेड़ा अउ मेमना क ठीक सख्यौं क मुताबिक अन्न अउ पयेबलि चढ़ावइ चाही। 28तोहका पापबलि क रूप में एक बोकरा क भी भेंट चढ़ावइ चाही। इ रोजाना क भेंट अउ अन्नबलि अउ पेयबलि क अलावा होइ चाही।

29“इ पवित्र दिन क छठएँ दिन तोहका बे दोखे क चउदह साँड़, दुइ भेड़ा अउ एक-एक बरिस क चउदह मेमना क भेंट चढ़ावइ चाही। 30तोहका बर्धा, भेड़ा अउ मेमना क संग जेतौना होइ चाही उ मात्रा में अन्न अउ पयेबलि चढ़ावइ चाही। 31तोहका पापबलि क रूप में एक बोकरौं क भी भेंट देइ चाही। इ रोजाना क भेंट अउ अन्नबलि अउ पयेबलि क अलावा भेंट होइ।

32“इ पवित्र दिन क सतएँ दिन तोहका बेदोख क सात साँड़, दुइ भेड़ा, अउ एक एक बरिस क चउदह मेमना क भेंट चढ़ावइ चाही। 33तोहका बर्धा, भेड़ा अउ मेमना क संग गनी भइ गन्ती में अन्न अउ पयेबलि चढ़ावइ चाही। 34तोहका पापबलि क रूप में एक बोकरा क भी भेंट देइ चाही। इ रोजाना क भेंट अउ अन्नबलि तथा पयेबलि क अलावा भेंट होइ।

35“इ पवित्र दिन क अठवाँ दिन तोहका एक समापन बइठक करइ चाहीं। तोहका उ दिन कउनो काम नाहीं करइ चाही। 36तू होमबलि अउ आगी क भेंट चढ़ावा। इ यहोवा बरे सुहावनी सुगंध होइ। तोहका बेदोखे क एक साँड़, एक भेड़ा अउ एक एक बरिस क सात मेमना भेंट में चढ़ावइ चाही। 37तोहका साँड़, भेड़ा अउ भेड़ी क बच्चा बरे गनी भइ मात्रा में अन्न अउ पयेबलि देइ चाही। 38तोहका पापबलि क रूप में एक बोकरा क भी भेंट देइ चाही। इ रोजाना क भेंट अउ अन्नबलि अउ पयेबलि क अलावा भेंट होइ चाही।

39“उ सबइ तोहार खास दिन यहोवा क सम्मान बरे अहइ। तोहकाएपा क दसवाँ हींसाओन बचन भेंट, आपन स्वेच्छा भेंट, होमबलि, अन्नबलि, पयेबलि अउ मेलबलि क अलावा इ पतिर दिनन म मानइ चाहीं।”

40मूसा इस्त्राएल क लोगन स ओन सबहिं बातन क कहेस जउन यहोवा ओका हुकुम दिहे रहा।

### दीन्ह गवा खास बचन

**30** मूसा सबहिं इस्त्राएली परिवार समूहन क नेता लोगन स बात किहेस। मूसा यहोवा क इ आदेस क बारे में ओनसे कहेस।

2“अगर कउनो मनई परमेस्सर क खास बचन देइ चाहत ह या जदि उ मनई परमेस्सर क कछू खास न्यौछावर करइ क बचन देत ह तउ ओका वइसे ही करइ द्या। मुला ओन मनई क ठीक वइसेन ही करइ चाही जइसा उ बचन दिहे अहइ।

3“होइ सकत ही कि कउनो जवान मेहरारु आपन पिता क घर रहत होइ जउन जवान अहइ। अउर उ मेहरारु यहोवा क कछू चढ़ावइ क बचन देत होइ। 4अउर ओकर बाप इ बचन क बारे में सुनत ह अउर ओकर बरे (बचन क रद्द करइ बरे) कछू नाहीं कहत ह तउ उ जवान मेहरारु क बचन तउ जरुर पूरा कइ देइ चाही जेका करइ क उ बचन दिहे अहइ। 5मुला अगर ओकर बाप ओकर दीन्ह गवा बचन क बारे में सुनिके ओका पूरा करइ स मना करत ह तउ उ मेहरारु क उ बचन पूरा नाहीं करइ चाही जेका उ बचन लिहेस ह। काहेकि ओकर बाप ओका रोकेस। एह बरे यहोवा ओका छिमा करिहीं।

6“होइ सकत ह कि कउनो मेहरारु बात ही बातन में बे सोचे बिचारे कउनो किरिया खाइ लेत ह अउ पाछे ओकर बियाह होइ जात ह। 7अउर भतार दीन्ह गवा बचन क बारे में सुनत ह अउ अउर ओकर (बचन क रद्द करइ) बरे कछू नाहीं कहत ह। तउ उ मेहरारु क आपन दीन्ह गवा बचन क मुताबिक काम क पूरा कइ लेइ चाही। 8मुला जदि भतार दीन्ह गवा बचन क बारे में सुनत ह अउ ओका अंगीकार नाहीं करत ह तउ मेहरारु क दीन्ह गवा बचन क पूरा नाहीं करइ क पड़ी। ओकर भतार ओकर बचन रोकि दिहन-उ ओका कही गइ बात क पूरा नाहीं करइ दिहस। एह बरे यहोवा ओका छिमा करिहीं।

9“कउनो रँड़ या तलाक दीन्ह गइ मेहरारु खास बचन दइ सकत ह। अगर उ अइसा करत ह तउ ओका आपन ठीक बचन क मुताबिक करइ चाही। 10एक बियाही मेहरारु यहोवा क कछू चढ़ावइ क बचन, या कछू स अपने आप क बचाइ क बचन दइ सकत ह। 11अदि ओकर भतार दीन्ह गए बचन क बारे में सुनत ह अउ ओका आपन बचन क पूरा करइ देत ह तउ ओका ठीक आपन दीन्ह गए बचन क मुताबिक ही उ काम करइ चाही। 12मुला अगर ओकर भतार ओकर दीन्ह गए बचन क सुनत ह अउर ओका बचन पूरा करइ स मना कइ देत ह तउ ओका आपन दीन्ह गए बचन क मुताबिक उ काम पूरा नाहीं करइ क होइ। एँकर कउनो महत्व न होइ काहे की उ का बचन दिहे रहा, ओकर भतार उ बचन क भगं कइ सकत ह। अगर ओकर भतार उ बचन क तोड़ देत ह तउ यहोवा ओका छिमा करिहीं।

13“एक बियाही मेहरारु यहोवा या परमेस्सर क कउनो खास बचन दइ सकत ह। भतार ओकरे बचन में स कउनो क रोक सकत ह या भतार उ बचन में स कउनो क पूरा करइ देइ सकत ह। 14भतार आपन मेहरारु क कइसे बचन पूरा करइ देइ? अगर उ दीन्ह ग बचन क बारे में सुनत ह अउ ओनका रोकत नाहीं तउ मेहरारु क आपन दीन्ह ग बचन क मुताबिक काम क पूरा करइ चाही। 15अगर भतार दीन्ह ग बचन क बारे में सुनत ह अउ ओकर पाछे ओका

बचन पूरा करइ स रोकत ह तउ ओकर बचन तोड़इ क जिम्मेदारी भतार प होइ।”

16इ सबइ हुकुम अहइ जेनका परमेस्सर मूसा क दिहेस। इ सब आदेस एक मनई अउ ओकरे मेहरारू क बारे में अहई अउ बाप अउ ओकरे बिटिया क बारे में अहइ जउन उ जवान मेहरारू रहइ अउ अपने बाप क घरे में रहत होइ।

### इस्त्राएल मिदियन क खिलाफ फुन हमला किहेस

**31** यहोवा मूसा स बात किहेस। उ कहेस, “मई इस्त्राएल क लोगन क संग मिद्यानी लोग जउन किहे बाटई, ओकरे बरे मई सजा देब। ओकरे पाछे मूसा तू मरि जाब्या।”

3इ बरे मूसा मनइयन स बात किहेस। उ कहेस, “आपन कछू मनइयन क जुद्ध बरे तइयार करा। यहोवा ओन मनइयन क प्रयोग मिदियानी लोगन क सजा देइ में करिहीं। 4अइसे 1,000 मनइयन क इस्त्राएल क परिवार समूहन स चुना। 5इस्त्राएल क सबहि परिवार समूहन स 12,000 सिपाही होइहीं।”

6मूसा ओन 12,000 मनइयन क जुद्ध बरे पठाएस। उ याजक एलीआज़ार क पूत पनीहास क ओनके संग पठाएस। पनीहास आपन संग पवितर चीजन, सींगं अउ तुरहियन लइ लिहेस। 7इस्त्राएल क लोग मिदियानी लोगन क नरसिंग वइसेन ही लड़ेन जइसा यहोवा मूसा क हुकुम दिहे रहा। उ पचे सबहि मिद्यानी मनइयन क मारि डापन। 8जउन मनइयन क उ पचे मारि डापन ओहमों एवी, रकैम, सूर, हूर अउ रेबा इ सबइ पाँच मिद्यानी राजा रहेन। उ पचे बेऑर क पूत बिलाम क भी तरवारे स मारि डापन।

9इस्त्राएल क लोग मिद्यानी मेहररुअन अउ गदेलन, ओनकइ सब भेड़ी, गइयन अउ सब चीजन क बन्दी बनाइ लिहन। 10तब उ पचे ओनके सब डेरन में अउ सहरन में आगी लगाइ दिहन जहाँ उ पचे रहत रहेन। 11उ पचे सब मनइयन अउ गोरुअन क लइ लिहन, 12अउर ओनका मूसा, याजक एलीआज़ार अउ इस्त्राएल क सब लोगन क लगे लइ गएन। उ पचे ओन सबहि इस्त्राएल क सिबिर में लाएन जेनका उ पचे हुवों पाइ लिहन। इस्त्राएल क लोग मोआब क समतल में बसा यरदन घाटी में सिबिर डाप रहेन। इ यरीहो क निचके यरदन नदी क पूरब कईती रहा। 13तब मूसा, याजक एलीआज़ार अउ मनइयन क नेता, सिपाहियन स मिलइ बरे डेरन स बाहेर गएन।

14मूसा सेनापति लोगन प बहोत कोहान रहा। उ ओन 1,000 क फउज क संचालक लोगन अउ एक सौ क फउज क संचालक लोगन प कोहान रहा जउन जुद्ध स लौटिके आए रहेन। 15मूसा ओनसे कहेस, “तू आदमी लोग मेहररुअन क काहे जित रहइ दिहा? 16लखा इ अउरत ही रही जेकरे वजह स बिलाम क घरना में इस्त्राएलियन बरे समस्या पइदा भइन अउ पेऑर में यहोवा क खिलाफ होइ गएन जेहसे इस्त्राएल क मनइयन क महामारी भोगइ क पड़ी। 17तउ अब मिद्यानी नर गदेलन क मारि डवा। अउर ओन सबहि मिद्यानी मेहररुअन क मारि डवा जउन कउनो मनई क संग रही होई। ओन सब मेहररुअन क मारि डवा

जेकर कउनो मनई क संग सारीरिक सम्बंध होइ। 18तू सिरिफ ओन सबहि बिटियन क जिअइ द्या जेकर कउनो मनई क संग सारीरिक सम्बंध नहीं भइ। 19तब एकर बाद तू सबइ सिपाहियन क जउन लोगन क मारेस या लहास क छुएस सात दिना तलक सिबिर क बाहर रहइ क पड़ी। तीसरे अउ सताएँ दिनन तू अउर तोहार बन्दी सुद्ध होब्या। 20तोहका उहइ काम सातवें दिन फिर करइ क होइ। तोहका आपन सबहि ओढ़ना धोवइ चाही। तोहका चाम क बनी हर चीज ऊनी अउ काठे क बनी चीजन क भी धोवइ चाही। तोहका सुद्ध होइ जाइ चाही।”

21तब याजक एलीआज़ार सिपाहियन स कहेस कउन जुद्ध क लउटेस ह। उ कहेस, “इ उहइ नेम बाटेन जेका यहोवा मूसा क दिहे रहा। 22-23मुला जउन चीजन आगी में डाइ जाइ सकत हीं ओकरे बारे में अलग अलग नेमें अहई। तोहका सोना, चाँदी, काँसा, लोहा, टिन या सीसा क आगी में डवइ चाही। जब तू ओनका सुद्धीकरण बरे लाल गाय क राख मिला भवा पानी स धोवा उ सबइ सुद्ध होइ जइहीं। जदि चीजन आगी में न नाई जाइ सकई तउ तोहका ओनका पानी स धोवइ चाही। 24सतएँ दिन तोहका आपन सारा ओढ़ना धोवइ चाही। जब तू सुद्ध होइ जाब्या। ओकरे बाद तू पचे सिबिर में आइ सकत ह।”

25तब यहोवा मूसा स कहेस, 26“मूसा तोहका याजक एलीआज़ार अउ सबहि नेता लोगन क चाही कि तू पचे ओन बन्दियन, गोरुअन अउ सबहि चीजन क गना जेनका फउजी लोग जुद्ध स लाए होई। 27तब ओन सबहि विजियन क जुद्ध में भाग लेइ वालन आधा फउजी लोगन अउ बाकी आधा इस्त्राएल क मनइयन में बाँटे देइ चाही। 28जउन सिपाही जुद्ध में भाग लेइ ग रहेन ओनसे ओन चीजन क कर ल्या। उ हींसा यहोवा क होइ। हर एक पाँच सौ चीजन में स एक यहोवा क हींसा होइ। एहमों मनई, गाय, गदहन अउ भेड़ी सामिल अहई। 29जउन फउजी जुद्ध में जउन चीजन क पाएन ह, ओनका आधी हींसा कर क रूप में ल्या। तब ओन चीजन क (प्रति एक पाँच सौ में स एक) याजक एलीआज़ार क द्या। तब हींसा यहोवा क होइ। 30अउर तब बाकी लोगन क आधा में स हर एक पचास चीजन में स एक चीज ल्या। एहमों मनई, गाय, गदहन, भेड़ी या दूसर जनावर सामिल बाटेन। इ हींसा लेवी बंसी मनइयन क द्या। काहे? काहेकी लेवी बंसी यहोवा क पवितर तम्बू क देखत रेखत हीं।”

31इ तरह मूसा अउ एलीआज़ार उहइ किहन जउन मूसा क यहोवा क हुकुम रहा। 32फउजी सिपाही 6,75,000 भेड़िन, 33बहतर हजार गोरु, 34इक्सठ हजार गदहन, 35बत्तीस हजार मेहररुअन छूटे रहेन। इ सबइ अइसी मेहररुअन रहिन जेनकइ कउनो मनई क संग सारीरिक सम्बंध नहीं रहा। 36जउन सिपाही जुद्ध में गए रहेन उ सबइ आपन हींसा क 3,37,500 भेड़िन क पाइ लिहन। 37फउजियन स लीन्ह ग यहोवा क कर 675 भेड़ रहा। 38फउजियन क 36,000 गाइयन मिलि गएन। उ पचे बहतर यहोवा क दिहेन। 39फउजी 30,500 गदहा पाइ गएन। उ पचे यहोवा क इक्सठ दिहेन। 40फउजियन क 16,000

मेहरारू मिलिन। उ सबइ यहोवा क बतीस दिहेन। 41यहोवा क हुकुम क मुताबिक मूसा यहोवा बरे दीन्ह गइ ओन सारी भेंटन क याजक एलीआज़ार क दिहस।

42तब मूसा मनइयन स मिला भवा आधा हींसा क गनेस। इ उ हींसा रहा जेका मूसा जुद्ध में जाइवालन फउजियन स लिहे रहा। 43मनइयन 3,37,500 भेड़ी, 44छत्तीस हजार गाइयन, 45तीस हजार पाँच सौ गदहा 46अउ 16,000 मेहरारू पाएन। 47मूसा हर एक पचास चीजन प एक चीज यहोवा बरे लिहस। एहमा गोरू अउ मनई दुइनऊ सामिल रहेन। तब ओन चीजन क उ लेवी बंसी लोगन क दिहस। काहेकि उ यहोवा क पवित्र तम्बू क देखत रेखत रहेन। मूसा इ यहोवा क हुकुम क मुताबिक किहस।

48तब सेना क संचालक 1,000 सिपाहियन क सेनापति अउ एक सौ सिपाहियन क सेनापति मूसा क निअरे गएन। 49उ पचे मूसा स कहेन, “हम पचे आपन फउजियन क गना ह। हम पचन में स कउनो भी कम नहीं अहइ। 50एह बरे हम लोग हर एक तु सिपाही स यहोवा क भेंट लइ आवत अही। हम पचे सोना क चीज बाजूबन्द, कड़ा, मुँदरी, बाली अउ हबेल लइ आवत अही। इ सब भेंट यहोवा क समन्वा हमार पाप बरे प्रायश्चित्त बरे होइ।”

51एह बरे मूसा उ सबइ सोना क चीज लिहस अउ याजक एलीआज़ार क ओन चीजनक दिहस। 52एक हजार फउजियन क सेनापतियन अउ एक सौ मनइ क सेनापतियन जउन सोना बटोरन ओकर वजन 16,750 सेकेल रहा। 53हर एक फउजी लड़ाई में मिली भइ बाकी चीजन क हींसा अपने लगे रख लिहस। 54मूसा अउ याजक एलीआज़ार एक हजार फउजियन क सेनापतियन अउर एक सौ मनइयन क सेनापतियन स सोना अंगीकार किहस। तब उ पचे सोना क मिलापवाला तम्बू में धरेस। इ भेंट एक यादगार क रूप में इस्त्राएल क लोगन बरे यहोवा क समन्वा रहिन।

### यरदन नदी क पूरब क परिवार समूहन

32 रूबेन अउ गाद परिवार समूहन क लगे ढेर तदाद में मवेशियन रहेन। ओर्ने मनइयन याजेर अउ गिलाद क निचके क धरती लखेन। उ पचे बिचारेन कि उ धरती ओनके गोरू बरे ठीक अहइ। 2एह बरे रूबेन अउ गाद परिवार समूहन क लोग मूसा क निअरे आएन। उ पचे मूसा, याजक एलीआज़ार अउ मनइयन क नेता लोगन स बात किहेन। 3-4उ पचे कहेन, “आपक सेवक हम सबन क लगे भारी तदाद में गोरू अहइँ। अउर उ भुइयों जेका परमेस्सर हम लोगन क जीतइ अउर कब्जा करइ क दिहस, गोरूअन बरे एक ठू बाढ़ियों चरागाह अहइ। इ पहुँटा में अतारोत, दीबोन, याजेर, हेसबोन, एलाले सबाम, नबो, बोन सामिल अहइँ। 5अगर आप लोगन क रजामन्दी होइ तउ हम पचे चाहब कि इ पहुँटा हम पचन क दीन्ह जाइ। हम लोगन क यरदन नदी क दूसर कईती न लइ जाइँ।”

6मूसा रूबेन अउ गाद क परिवार समूहन स पूछेस, “का तू पचे हिओँ बसब्या अउ आपन भाइयन क हिओँ स जाइ अउ जुद्ध करइ देब्या? 7तू पचे इस्त्राएल क लोगन क

उत्साह काहे भंग करइ चाहत बाट्या? होइ सकत ह उ पचे यरदन नदी क पार जउन पहुँटा यहोवा ओनका दिसह ह नाहीं लेइ चाहीं। 8तोहार बाप अउ दादा मोरे संग अइसा ही किहिन। जब मई कादेसबर्ने स जासूसन क प्रदेस क छान-बीन करइ पठाएँ रहेउँ। 9उ पचे एँस्कोल घाटी तलक गएन। उ सबइ प्रदेस क लखेन। अउर उ सबइ इस्त्राएल क लोगन क उ धरती प जाइ क उत्साह भंग कइ दिहस। उ पचे इस्त्राएल क लोगन क उ पहुँटा में जाइ क इच्छा नहीं करइ दिहन जेहसे यहोवा ओनका दइ दिहे रहा। 10यहोवा मनइयन प बहोतइ कोहान। यहोवा इ कठोर निसेध अग्या क बनाएस: 11‘मिस्र स आवइ वालन लोगन अउ बीस बरिस या जियादा उमर क कउनो भी मनई क उ भूइँया क जेकरे बरे मई इब्राहीम, इसहाक अउ याकूब क बचन दिहेउँ रहा। लखइ क आग्या नाहीं होब्या। मई इ भूइँया क लोगन क देइ क बचन दिहेउँ रहा। मुला उ पचे मोर ठीक तरह नाहीं मानेन। एह बरे उ पचे इ भूइँया क न पइहीं। 12सिरिफ कनजी यपुन्ने क पूत कालेब अउर नून क पूत यहोसू यहोवा क पूरी तरह मानेस।’

13“यहोवा इस्त्राएल क लोगन क खिलाफ बहोतइ कोहान रहा। एह बरे यहोवा मनइयन क 40बरिस तलक रेगिस्तान में रोके रहा। यहोवा ओनका तब तलक रोके रहा, जब ताई उ पचे यहोवा क खिलाफ पाप किहे रहेन, मर नाहीं गएन। 14अउर अब तू पचे उहइ करत अहा जउन तोहार पुरखन किहिन ह। अरे पापियो! का तू चाहत ह कि यहोवा इस्त्राएल क लोग क खिलाफ अउ जियादा कोहाइ जाइ? 15अगर तू पचे ओकर पाछा करइ स मुड़ि जाब्या तउ यहोवा इस्त्राएल क अउर जियादा समइ तलक रेगिस्ताने में ठहराइ देइ। तब तू इ सब मनइयन क नास कइ देब्या।”

16मुला रूबेन अउ गाद परिवार समूहन क लोग मूसा क लोगे गएन। उ सबइ कहेन, “हिओँ हम पचे आपन गदेलन बरे सहर अउ आपन गोरूअन बरे बाड़ा बनउबइ। 17तब हमार गदेलन दूसर लोगन स सुरच्छित रइहीं जउन इ प्रदेस में रहत हीं। मुला ह पचे खुसी स अगवा बढिके इस्त्राएल क लोगन क मदद करब। हम लोग ओनका ओनके देस में लइ जाब। 18हम पचे तब तलक घर नाहीं लउटब जब तलक हर एक मनई इस्त्राएल में आपन धरती क हींसा पाइ जात। 19हम लोग यरदन नदी क पच्छिम में कउनो धरती नाहीं लेब, हम सबन क धरती क हींसा यरदन नदी क पूरब ही बाटइ।”

20तउ मूसा ओनसे कहेस, “जदि तू पचे इ सब करब्या तउ इ रेगिस्तान तू पचन क होइ। मुला तोहरे फउजियन क यहोवा क समन्वा जुद्ध में जाइ चाही। 21तोहरे सिपाहियन क यरदन नदिया पार करइ चाही अउ दुस्मनन क उ देस तजि देइ बरे मजबूर करइ चाही। 22जब हम सबन क धरती पावइ में यहोवा मदद कइ चुकई तब तू सबइ घर जाइ सकत ह। तब यहोवा अउ इस्त्राएल तोहका अपराधी नाहीं मनिहीं। तब यहोवा तू पचन क इ पहुँटा लइ लेइ देइहीं। 23मुला अगर तू सबइ इ बातन पूरी नाहीं करत्या तउ तू लोग यहोवा क खिलाफ पाप करब्या। अउर उ गाँठ बाँधा कि तू आपन पाप खातिर सजा पउब्या। 24आपन गदेलन बरे सहर अउ गोरूअन

बरे बाड़ा बनावा। मुला ओकरे पाछे ओका पूरा करा जेका करइ क तू पचे बचन दिहे अहा।”

25तब गाद अउ रूबेन परिवार समूहन क लोग मूसा स कहेन, “हम पचे आप क सेवक अही। आप हमार सुआमी अहइँ। एह बरे हम लोग उहइ करब जउन आप कहत हीं। 26हमार मेहरारु, गदेलन अउ हमार गोरुअन गिलाद नगर में रहहीं। 27मुला आपक सेवक हम यरदन नदी क पार करब। मुला हम पचे यहोवा क समन्वा आपन सुआमी क कहे क मुताबिक जुद्ध में कूदि पड़ब।”

28मूसा याजक एलीआज़ार, नून क पूत यहोसू अउ इस्त्राएल क परिवार समूहन क सबहिं नेतागणन क ओकरे बारे में हुकुम दिहस। 29मूसा ओनसे कहेस, “गाद अउ रूबेन क मनई यरदन नदी क पार करिहीं। उ पचे यहोवा क अगवा जुद्ध में धावा बोलिहीं। उ सबइ देस जीतइ में तोहार मदद करिहीं। अउर तू पचे गिलाद क प्रदेस ओनके हींसा क रूप में ओनका दोब्या। 30मुला जदि उ पचे आपन सिपाहियन क तोहार संग पार नाहीं भेजइ तउ होइ सकत ह कि उ कनान प्रदेस में तोहार लोगन क बीच सिरिफ पैतृक सम्पत्ति ही पाइ।”

31गाद अउ रूबेन क लोग जवाब दिहन, “हम पचे उहइ करइ क बचन देत अही जउन यहोवा क हुकुम अहइ। 32हम पचे यरदन नदी पार करब अउ कनान देस प यहोवा क समन्वा धावा बोलब। अउ हमरे देस क हींसा यरदन नदी क पूरब क धरती होइ।”

33इ तरह मूसा उ प्रदेस क कछू भाग गाद क लोगन, रूबेन क लोगन अउ मनस्से परिवार समूहन क आधे लोगन क दिहस। (मनस्से यूसुफ क पूत रहा।) उ प्रदेस में एमोरियन क राजा सिहोन क राज्ज अउ बसान क राजा ओग क राज्ज मिला रहा। उ प्रदेस में उ इलाका क चारहों कइँती क सहर भी मिला रहेन।

34गाद क मनइयन दीबोन, अतारोत, अरोएर, 35अत्रौत, सोपान, याजेर, योगबहा, 36बेतनिम्रा अउ बेथारान सहरन क बनाएन। उ पचे मजबूत चहर-देवार क संग सहरन क बनाएस अउ आपन गोरुअन क बाड़ा बनाएन।

37रूबेन क मनइयन हसबोन, एलाले, कियतैन, 38नबो, बालमोन अउर तित्पा सहर। उ दूसर सहरन क नाउँ दिहस जेका उ बनाए। मुला नेबो अउ बाल मिआँन क नवा नाम स पुकारेस। 39मनस्से परिवार समूह क सन्तान माकीर स जन्मा लोग गिलाद क गएन। उ पचे सहर क हराएन। उ पचे ओन एमोरी क हराएन जउन हुवाँ रहत रहेन। 40एह बरे मनस्से क परिवार समूह क माकीर बरे मूसा गिलाद दिहस। एह बरे ओकर परिवार हुवाँ बस गवा। 41मनस्से क परिवार समूह क यैर नान्ह-नान्ह सहरन जेका हेवोल यार्ईर कहा जात ह क जीत लिहस ह। 42तउ नोबह कनात अउ ओकरे लगे क नान्ह-नान्ह सहरन क हराएस। तब उ उ ठउर क नाउँ आपन नाउँ प नोबह धरेस।

### मिस्र स इस्त्राएलियन क जात्रा

33 इ सबइ इस्त्राएली लोगन क जात्रा अहइ जउन उ मूसा अउ हारून क अगवाइ में आपन परिवार

समूहन क संग मिस्र स बाहर आएन। 2मूसा ओनेँ जात्रन क बारे में लिखे अहइ जेनका यहोवा हुकुम दिहेस रहा। उ सबइ जात्रा हिआँ दर्ज अहइँ।

3पहिले महीना क पन्द्रहवाँ दिन उ पचे रामसेस तजेन। फसह क पाछे भिन्सारे इस्त्राएल क मनइयन बिजयी क संग मिस्र स बाहेर गएन। मिस्र क सब मनइयन लखेन। 4मिस्र क लोग आपन पहिलौठा पूतन क दफनावत रहेन जेका परमेस्सर मार डाए रहेन। परमेस्सर मिस्र क देवता लोगन क खिलाफ आपन निर्णय देखाए रहा।

5इस्त्राएल क लोग रामसेस क तजि दिहेन अउ सुक्कोत में सिबिर डाएन। 6सुक्कोत स उ पचे एताम क जात्रा किहेन। हुवाँ प लोगन रेगिस्तान क छोर प सिबिर डाएन। 7उ सबइ एताम क तजेन अउ पीहहीरोत क गएन। इ बालसपोन क लगे रहा। उ सबइ मिंगदोल क लगे सिबिर डाएन।

8लोगन पीहीरोत तजि दिहेन अउ समुद्दर क बीच स चलेन। तब उ पचे तीन दिन तलक एथम रेगिस्तान स होइके चलेन। लोगन मरा में सिबिर डाएन।

9लोगन मरा क तजि दिहेन अउ एलीम में सिबिर डाएन। हुवाँ प बारह पानी क झरना रहेन अउ 70 खजूर क बृच्छ रहेन।

10लोग एलीम तजेन अउ लाल-सागर क लगे सिबिर डाएन।

11लोग लाल-सागर तजेन अउ सीन रेगिस्तान में सिबिर डाएन।

12लोग सीन रेगिस्तान क तजेन अउ दोपका में सिबिर डाएन।

13लोग दोपका तजेन अउ आलूस में सिबिर डाएन।

14लोग आलूस तजेन अउ रपीदीम में सिबिर डाएन। हुवाँ लोग क पानी पिअइ बरे नाहीं रहा।

15लोग रपीदीम तजेन अउ सिनाइ रेगिस्तान में सिबिर डाएन।

16लोग सिनाइ रेगिस्तान तजेन अउ किब्रोथताबा में सिबिर डाएन।

17लोग किब्रोताबा तजेन अउ हसेरोत में सिबिर डाएन।

18लोग हसेरोत क तजेन अउ रिम्मा में सिबिर डाएन।

19लोग रिम्मा क तजेन अउ रिम्मोनपेरेस में सिबिर डाएन।

20लोग रिम्मोनपेरेस क तजेन अउ लिब्ना में सिबिर डाएन।

21लोग लिब्ना तजेन अउ रिस्सा में सिबिर डाएन।

22लोग रिस्सा तजेन अउ कहेलाता में सिबिर डाएन।

23लोग कहेलाता तजेन अउ सेपेर पहाड़े प सिबिर डाएन।

24लोग सेपेर पहाड़ तजेन अउ हरादा में सिबिर डाएन।

25लोग हरादा तजेन अउ मखेलोट में सिबिर डाएन।

26लोग मखेलोट तजेन अउ तहत में सिबिर डाएन।

27लोग तहत तजेन अउ तेरह में सिबिर डाएन।

28लोग तेरह तजेन अउ मिक्का में सिबिर डाएन।

29लोग मिक्का तजेन अउ हसमोना में सिबिर डाएन।

30लोग हसमोना तजेन अउ मोसेरोत में सिबिर डाएन।

31लोग मोसेरोत तजेन अउ बने-याकन में सिबिर डाएन।

32लोग बने-याकन तजेन अउ हॉर होर्हिंग्गदगाद मँ सिबिर डाएन।

33लोग होर्हिंग्गदगाद तजेन अउ योताबात मँ सिबिर डाएन।

34लोग योतबात तजेन अउ अब्रोना मँ सिबिर डाएन।

35लोग अब्रोना तजेन अउ एस्योनगेबेर मँ सिबिर डाएन।

36लोग एस्योनगेबेर तजेन अउ सीने रेगिस्तान मँ कादेस मँ सिबिर डाएन।

37लोग कादेस तजेन अउ होर मँ सिबिर डाएन। इ एदोम देस क सिवाने प एक पहाड़ रहा। 38याजक हारून यहोवा क आग्या मानेस अउ उ हॉर पहाड़े प चढ़ा। हारून पाँचवाँ महीना क पहिले दिन मरा। उ मिस्र क इस्राएल क लोगन क जरिया तजि देइ क चालिसवाँ बरिस रहा। 39हारून जब होर पहाड़े प मरा तब उ 123 बरिस क रहा।

40अरत कनान क नेगेव प्रदेस मँ रहा। कनानी राजा हुवाँ सुनेस कि इस्राएली लोगन आवत अहई। 41लोग हॉर पहाड़े क तजेन अउ सलमोना मँ सिबिर डाएन।

42लोग सलमोना क तजेन अउ पूनोन मँ सिबिर डाएन।

43लोग पूनोन तजेन अउ ओबोस मँ सिबिर डाएन।

44लोग ओबोस तजेन अउ इये अबारीम मँ सिबिर डाएन। इ मोआब देस क चउहद्दी प रहा।

45लोग इयीन (इये अबारीम) क तजेन अउ दिबोन-गाद मँ सिबिर डाएन।

46लोग दिबोन-गाद तजेन अउ अल्मोनदिबलतैम मँ सिबिर डाएन।

47लोग अल्मोनदिबलतैम तजेन अउ नबो क लगे अबीराम पहाड़न प सिबिर डाएन।

48लोग अबीराम पहाड़न क तजेन अउ यरदन नदी क लगे मोआब क प्रदेस मँ सिबिर डाएन। इ जेरिको क निअरे रहा। 49उ पचे मोआब मँ यरदन घाटी मँ यरदन नदी क निअरे सिबिर डाएन। ओनकइ डेरन वेत्यसीमोत स अबेलसितीम चरागाह तलक फइला रहेन।

50उ ठउरे प यहोवा मूसा स बात किहेस, 51“इस्राएल क लोगन स कहा। ओनसे इ बातन क बतावा: तू सबइ यरदन नदी पार करब्या। तू पचे कनान देस मँ जाब्या। 52तू पचे ओनें लोगन स भुइयाँ लइ लेब्या जउन हुवाँ रहत ह तू पचन क ओनकइ खोदी भइ मूरत अउ प्रतिमा क नस्ट कइ देइ चाही। तोहका ओनके सबहिँ ऊँच ठउरे क नास कइ देइ चाही। 53तू पचे उ देस लेब्या अउ हुवाँ बसि जाब्या। काहे? काहे की इ देस मई तू सबन क देत अहउँ। इ तोहरे परिवारे क होइ। 54तोहार हर एक परिवार भुइयाँ क हींसा पाई। तू पचे इ बात बरे गोटी दुउब्या कि देस क कउन सा हींसा कउन परिवारे क मिलत ह। बड़का परिवार भुइयाँ क बड़का हिंसा पाइ। नन्ह परिवार देस क नन्ह नन्ह हींसा पाइ। भुइयाँ ओनें लोगन क दीन्ह जाइ जेकर नाउँ गोटी तय करी। हर एक परिवार समूह आपन भुइयाँ पाइ।

55“तू पचन क दूसर लोगन स देस खाली कराइ लेइ चाही। अगर तू पचे ओनें लोगन क आपन देस मँ ठहरइ देब्या तउ उ पचे तोहरे बरे बहोतइ परेसानी पइदा करिहीं। उ पचे तोहरी आँखी क पिन या तोहरी कखरी क काँटा क

तरह होइहीं। उ पचे तोहका परेसानी देइहीं जहाँ तू रहब्या। 56अगर अइसा ह तउ इ होइ सकत ह मुझे तू लोगन क संग भी उहइ करइ क होइ जउन जोजना मई ओन लोगन संग करइ बरे किहउँ।”

### कनान क चउहद्दी

34 यहोवा मूसा स बात किहस। उ कहेस, 2“इस्राएल क लोगन क इ हुकुम द्या: तू पचे कनान देस मँ आवत अहा। तू लोग इ देस क हरउब्या। तू पचे पूरा कनान देस लइ लेब्या। 3दक्खिनी अउ तू लोग एदोम क निअरे सीन रेगिस्तान क हींसा पाइ लेब्या। दक्खिनी सिवान मृत-सागर क दक्खिनी छोर स सुरु होइ। 4इ बिच्छूदरे क दक्खिन कइँती स गुजरी। इ सीन रेगिस्तान स होइके कादेसबर्ने तलक जाइ, अउर तब हसरद्दार तथा तब इ अस्मोन स होइके चली। 5अस्मोन स सिवान मिस्र नदी तलक जाइ अउ एकर आखिर भूमध्य सागर प होइ। 6तोहार पच्छिउ क सिवान भूमध्य सागर होइ। 7तोहार उत्तरी सीमा भूमध्य सागर प सुरु होइ अउ होर पहाड़े तलक जाइ। लबानोन मँ 8इ लबानोन मँ हॉर पहाड़े स लबोहामात तलक जाइ क प्रवेस दुआर अहइ। एकर बाद इ सदद तक जाइ। 9तब इ चउहद्दी जिप्रोन क जाइ अउर इ हसेरनान प खतम होइ। इ तरह इ तोहार उत्तरी चउहद्दी होइ। 10तोहार पुर्बिहा चउहद्दी एनान प सुरु होइ अउर इ सपान तक जाइ। 11सपान स चउहद्दी ऐन क पूरब रिबला तलक जाइ। किन्नेरत समुद्दर गलील क सागर क संग क पहाड़ियन क संग सिवान चलत रही। 12तब सिवान यरदन नदी क संग संग चली। एकर अन्त मृत-सागर प होइ। तोहरे देस क चारिहुँ कइँती क चउहद्दी हिअँइ बा।”

13मूसा इस्राइल क लोगन क हुकुम दिहस, “इहइ उ देस अहइ जेका तू पउब्या। तू लोग नौ परिवार समूहन अउ मनस्से परिवार समूह क आधा मनइयन बरे धरती बाँटइ खातिर ओनके नाउँ क गोटी डउब्या। 14रूबेन, गाद अउ क परिवार समूहन मनस्से क आधा परिवार समूह क मनइयन पहिलेन ही आपन प्रदेस लइ लिहे अहई। 15उ अढ़ाई परिवार समूहन यरीहो क निचके यरदन नदी क पूरब आपन पहँटा लइ लिहे अहइ।”

16तब यहोवा मूसा स बात किहेस। उ कहेस, 17“इ सबइ उहइ लोग अहई जउन भुइँया बाँटइ मँ तोहार मदद करिहीं: याजक एलीआज़ार, नून क पूत यहोसू, 18अउ हर एक परिवार समूहन स तू पचे एक ठु नेता चुनब्या। इ लोग भुइँया क बँटवारा करिहीं। 19नेता लोगन क नाउँ इ अहई:

यहूदा क परिवार समूह स युपुने क पूत कालेब।

20सिमोन क परिवार समूह स, अम्मीहूद क पूत समूएल।

21बिन्यामीन क परिवार समूह स, किसलेस क पूत एलीहदद।

22दान क परिवार समूह स, योगिल क पूत बुक्की।

23मनस्से (यूसुफ क पूते) क परिवार समूह स, एपोद क पूत हन्नीएल।

24एप्रैम (यूसुफ क पूते) क परिवार समूह स, सिप्तानी क पूत कमूल।

25जबूलन क परिवार समूह स, पर्नाक क पूत एलीसापान।

26इस्साकार क परिवार समूह स, अज्जान क पूत पलतीएल।

27आसर क परिवार समूह स, सलोमी क पूत अहीदूद।

28नपताली क परिवार समूह स, अम्मीहूद क पूत पदहेल।”

29यहोवा इ मनइयन क इस्त्राएल क लोगन में कनान क भुइँया बॉटइ बरे चुनेस।

### लेवी बंस क सहर

**35** यहोवा मूसा स बात किहस। इ यरीहो क पार मोआब में यरदन घाटी में यरदन नदी क निचके रहा। यहोवा कहेस, 2“इस्त्राएल क लोगन स कहा कि ओनका आपन हीसा क देस में कछू सहर लेवी-बंस क लोगन क देइ चाही। इस्त्राएल क लोगन क सहर अउ ओकरे चारिहुँ कइँती क चरागाह लेवी-बंस क देइ चाही। 3लेवी बंसी लोग ओन सहरन म रइहीं। अउ सब गोरुअन, अउ दूसर जनावर, जउन लेवी बंसी मनइयन क होइहीं, सहर क चारिहुँ कइँती क चरागाह में चरि सकिहीं। 4तू पचे केतनी भुइँयाँ लेवी बंसी मनइयन क देब्या? सहर क देवों स 1,500 फुट बाहेर सहर क पूरब में नापत जा 5अउ सहर क दक्खिन में 3,000 फुट अउर सहर क पच्छिउँ में 3,000 फुट, पूर्व 3,000 फुट अउ उत्तर में 3,000 फुट- उ सारी भुइँयाँ लेवी बंसियन क होइ। उ भुइँयाँ क बीच सहर होइ। 6ओन सहरन में छः सहर सरण क सहर होइहीं। जदि कउनो मनई कउनो क कतल कइ डवत ह तउ उ सुरच्छा बरे ओन सहरन में पराइ सकत ह। ओन छः सहरन क अलावा तू लेवी बंसियन क बियालीस दूसर सहर देब्या। 7इ तरह तू पचे कुल अरचालीस सहर लेवी बंसी लोगन क देब्या। तू पचे ओन सहरन क चारिहुँ कइँती भुइँया भी देब्या। 8इस्त्राएल क बड़का परिवारन क भुइँया क बड़का भाग देइहीं। इस्त्राएल क नान्ह परिवारन क भुइँया क छोटा भाग देइहीं। सबहिँ परिवार समूहन लेवी बंसी मनइयन क आपन सहरन में स कछू सहर देइहीं।”

9तब यहोवा मूसा स बात किहस। उ कहेस, 10“मनइयन स इ कहा: तू पचे यरदन नदी क पार करब्या अउ कनान देस में जाब्या। 11तोहका “सरण-सहर” बनावइ बरे सहरन क चुनइ चाही। जदि कउनो मनई संजोग स कउनो क मारि डवत ह तउ इ सुरच्छा बरे इ सहरन में स कउनो में पराइके जाइ सकत ह। 12उ ओ कउनो मनई स बचा रही जउन मरे परिवार क होइ अउ ओका धरइ चाहत होइ। उ तब तलक सुरच्छित रही जब तलक अदालन में ओकरे बारे में फइसला नाहीं होइ जात। 13अउ छः सहर जेका तू चुनिहीं उ तोहार “सरण-नगर” होइहीं। 14ओन सहर में स तीन सहर यरदन नदी क पूरब में होइहीं। अउर तीन दूसर सहर कनान

प्रदेस में यरदन नदी क पच्छिउँ में होइहीं। 15उ सबइ सहर नागरिक लोगन, स्थाई निवासियन अउ अस्थाई निवासियन बरे सरण-ठउर होइहीं। कउनो भी मनई संजोग स कउनो क मारि डवत ह, इ कउनो एक सहर में पराइके जाइ सकत ह।

16“जदि कउनो मनई कउनो क मारइ बरे लोहा क हथियार बइपरत ह तउ मनई क मरि जाइ चाही। 17अउर जदि कउनो मनई एक पाथर उठावत ह अउ कउनो क मारि डवत ह तउ ओका भी मरइ चाही। पाथर उ आकार क होइ चाही जेका मनइयन क मारइ बरे अक्सर बइपरा जात ह। 18अगर कउनो मनई कउनो लकड़ी का प्रयोग करत ह अउ कउनो क मारि डवत ह तउ ओका मरइ चाही। लकड़ी एक हथियार क सेकेल में होइ चाही जेकर प्रयोग अक्सर लोग मनइयन क मारि डवइ बरे करत हीं। 19मरे भए मनई क परिवार क निअम्बर उ हत्यारा क पाछा कइ सकत ह अउ ओका मार सकत ह।

20-21“कउनो मनई कउनो प हाथ स हमला कइ सकत ह अउ ओका मारि डइ सकत ह। या कउनो मनई कउनो क धकियाइ सकत ह अउ ओका मारि डइ सकत ह। या कउनो मनई कउनो प कछू बहाइ सकत ह अउ ओका मारि सकत ह। अगर उ मरवइया घिना स अइसा किहस तउ उ हत्यारा अहइ। उ मनई क मारि डवइ चाही। मरे भए परिवार क कउनो मनई उ हत्यारा क पाछा कइ सकत ह अउ ओका मार सकत ह।

22“मुला जदि कउनो मनई संजोग स कउनो क मारि सकत ह। उ मनई उ मनई स घिना नाहीं करत रहा, उ होनी संजोग स होइ गइ। या कउनो मनई कछू लोकाइ सकत ह अउ संजोग स कउनो क मार सकत ह, उ मारइ क इरादा नाहीं किहे रहा। 23या कउनो मनई कउनो बड़वार पाथर बहाइ सकत ह। अउ उ पाथर कउनो अइसे मनई प भहराइ पड़इ जउन ओका न लखत होइ अउ उ ओका मारि डवइ। उ मनई कउनो क मारि डवइ क इरादा नाहीं किहे रहा। उ मृतक मनई बरे घिना नाहीं राखत रहा। इ सिरिफ संजोग स भवा रहा। 24जदि अइसा होइ तउ बिरादरी फइसला करी कि का कीन्ह जाइ। जाति बिरादर क अदालत इ फइसला देइ कि मृतक मनई क परिवार क निअम्बर ओका मारि डइ सकत ह। 25अगर अदालत क इ फइसला देइ क होइ कि उ जिअत रहइ तउ ओका आपन “सरण-सहर” मई जाइ चाही। ओका हुवों तब तलक रहइ चाही जब तलक महा याजक मरि जाइ। इ महा याजक उहइ होइ चाही जेकर अभिसेक पवितर तेल स भवा होइ।

26-27“उ मनई क आपन “सरण-सहर” क चउहदूदी स कबहुँ बाहेर नाहीं जाइ चाही। अगर उ सिमान पार करत ह अउ मृतक मनई क परिवार क निअम्बर ओका धरत ह अउ ओका मारि डवत ह तउ उ मनई हत्या क अपराधी नाहीं होत। 28उ मनई क जेका, जउन संजोग स कउनो क मारि डवइ ह, “सरण-सहर” में महा याजक क मरि तलक रहइ सकत ह। महा याजक क मरइ क पाछे उ मनई आपन भुइँया क लउटि सकत ह। 29तू जउन कहुँ भी रहा इ नेमें तोहार आवइ वाले नसलन बरे कानून क तरह होइ जाब।

30“हत्तियारा क तबहिं मउत-सजा दीन्ह जाइ सकत ह। जब ओकरे बिरोध में एक स जियादा गवाही होइहीं। जदि एक ठु ही गवाह होइ तउ कउनो मनई क मउत क सजा नाहीं दीन्ह जाइ।

31“जदि कउनो मनई हत्तियारा अहइ तउ ओका मारि डावइ चाही। धन क बदले ओका नाहीं छोड़ दीन्ह जाइ चाही। उ हत्तियारे क मार दीन्ह जाइ चाही।

32“अगर कउनो मनई कउनो क मारेस अउ उ पराइके कउनो “सरण-सहर” में गवा तउ घर लउटइ बरे ओसे धन जिन ल्या। उ मनई क उ नगर में तब तलक रहइ क पड़ी जब तलक महायाजक न मरइ।

33“भोले मनइयन क खून स आपन देस क जिन दुसित करा। जदि कउनो मनई कउनो क मारि डावत ह तउ इ अपराध क बदला इहइ अहइ कि उ मनई क मार दीन्ह जाइ। दूसर कउनो अइसा बदला उ जुर्म बरे नाहीं बा कि हत्तियारा क जान स मारि डावा जाइ। दूसर कउनो चारा नाहीं कि उ देस क अजाद कइ सकइ। 34मई यहोवा हउं! मई इस्त्राएल क लोग क बीच तोहरे देस में सदा रहत रहबइ। मई उ देस में रहत रहब। एह बरे बे अपराधी मनइयन क खून स उ देस क दुसित जिन करा।”

### सलोफाद क बिटियन क देस

**36** मनस्से यूसुफ क पूत रहा। माकीर मनस्से क पूत रहा। गिलाद माकीर क पूत रहा। गिलाद परिवार क नेता मूसा अउ इस्त्राएल क परिवार समूहन क नेता लोगन स बात करइ गएन। 2उ पचे कहेन, “महोदय, यहोवा हमलोगन क लौटरी क आधार पइ भुइँया बाटइँ क हुकम दिहस ह। अउर महोदय, यहोवा हुकुम दिहस कि सलोफाद क भुइँयाँ ओकरी बिटियन क मिलइ। सलोफाद हम लोगन क भाई रहा। 3इ होइ सकत ह कि कउनो दूसर परिवार समूह क मनई सलोफाद क कउनो बिटिया स बियाह करइ। का उ भुइँया हमरे परिवारे स निकरि जाइ? का उ दूसरे

परिवार समूह क मनई उ भुइँया क पाइ लेइहीं? का हम लोग उ भुइँया क खोइ देब जेका हम लोग लौटरी क आधार प पावा ह। 4लोग आपन भुइँया बेचं-बिकिन सकत हीं। मुला जुबली क बरिस में सारी धरती उ परिवार समूह क लउटी जात ह जउन एकर असली मालिक होत ह। उ टेमें सलोफाद क बिटियन क भुइँयाँ कउन पाई? अगर वइसा होत ह तउ हमार परिवार उ भुइँयाँ क सदा न पाइ सकी।”

5मूसा इस्त्राएल क लोगन क इ हुकुम दिहस। इ हुकुम यहोवा क रहन “यूसुफ क परिवार समूह क इ सबइ मनई ठीक कहत हीं। 6सलोफाद क बिटियन बरे इ हुकुम अहइ: जदि तू कउनो स बियाह करइ चाहति हउ तउ तोहका आपन परिवार समूह क कउनो मनई क संग बियाह करइ चाही। 7इ तरह इस्त्राएल क लोगन में भुइँयाँ एक परिवार समूह स दूसर परिवार समूह में नाहीं जाइ। हर एक इस्त्राएली आपन पुरखन क भुइँया क ही आपन लगे रखी। 8अउर जदि कउनो बिटिया बाप क भुइँया पाइ जात ह तउ ओका आपन परिवार समूह में स ही कउनो क संग बियाह करइ चाही। इ तरह हर एक मनई उहइ भुइँयाँ अपने लगे रखी जउन ओकरे पुरखन क रही। 9इ तरह इस्त्राएल क लोगन में एक परिवार समूह स दूसर परिवार समूह में न जाइ। हर एक इस्त्राएली उ भुइँया रखी जउन ओकरे आपन पुरखन क रही।”

10सलोफाद क बिटियन, मूसा दुआरा प्राप्त भवा यहोवा क हुकुम क पालन किहेस। 11एह बरे सलोफाद क बिटियन महला, तिसा, होगला, मिल्का अउ नोआ आपन चचेरा भाइयन क संग बियाह किहन। 12ओनकइ भतार मनस्से क परिवार समूह क रहेन। एह बरे ओनकइ भुइँया ओनके बाप क परिवार अउ परिवार समूह क बनी रही।

13इ तरह उ सब कनून अउ हुकुम यरीहो क पार स यरदन नदी क किनारे मोआब इलाका में यहोवा मूसा क दिहे रहा। मूसा यहोवा क ओन कनूनन क अउ हुकुमन क इस्त्राएल क लोगन क दिहस।